

近代中國史料叢刊續編第三十三輯
沈雲龍主編

龔端毅公（鼎孳）奏疏

龔士稚編

卷一——卷四

文海出版社
有限公司
印行

秦 魏

躡 端


毅

心

光緒癸未
汪彞
書屋重校刊

10238/3

先端毅公所著定山堂詩集四十三卷詩餘
四卷已於今春丐貲重刻校讐之頃有友人
以先仲圭公所刻端毅公奏疏八卷見示謹
受而讀之一切立綱陳紀薄斂省刑諸大政
悉剴切敷陳而忠君愛國之誠溢於楮墨昔
人比之賈太傅陸宣公良有以也因亟付手
民重刻而藏之家塾俾吾子孫世守焉時
光緒癸未清和月十四世孫彥緒謹識



序

門人吉水李振裕撰

吾師大宗伯合肥龔端毅公奏疏刻成公子仲圭
不遠二千餘里遣一介之使情文有加而致辭曰
昔我先公之棄養也士稚生始八年孩提無知未
獲悉觀先公立朝大業因念歐陽子有云欲報國
恩獨唯文章而報國文章章奏爲大今年秋士稚
鳩集兒子志爽諸孫曾懿曾憲曾恕曾恕曾
聰以先公奏疏竭蹶授梓已於事而竣矣弁首之

言敢丐夫子余逡巡無以應既而思之吾師與先
司馬同朝最稱莫逆余小子當趨庭時卽奉吾師
之教久矣庚戌南宮幸邀摸索丙寅選拔之役仲
圭又以余爲舉主是師友之誼重疊交互固莫余
若也振裕其曷敢辭迺熏沐卒讀往復再四而歎
吾師真仁人也本乎剴切發爲詳明一以仁心佐
成寬政志存國是弭災變於旣形功在聖門議尊
崇之加厚賢才宜亟取士作人無難極口以敷陳
桑梓堪憐善後當厄不憚悉心而入告復秋決恤

婦女莫非體上帝之慈祥酌民例嚴被論總欲養
彙臣之廉恥他如糾彈權要罔辟怨嫌申明職守
弗遺瑣屑禁奢靡以敦本計防江海以消患萌忠
憂溢於毫端誠懇透乎紙背語其大者有美畢收
類而推之無微不至中間雖控抑請明退地請給
公署不自知遷客流人始終荷

優隆

予之乘傳

予之祭葬何以報高天厚地固宜一堂都俞不只

四海歡呼者矣。振裕門牆下士末由仰贊高深。顧
受知最親。論交尤篤。且於仲圭此舉。旣樂其亟欲
表章先人。并喜右臣原禮輩之能相助以有成也。
使旋敬返其儀。而舉一言以頌吾師。曰仁人之言
其利溥。再舉一言以祝仲圭。諸君曰仁者必有後
其爲吾以前所稱。非敢私阿所好。以後所稱。則已
拭目俟之矣。

傳

江南通志

龔鼎孳字孝升孚肅子崇禎甲戌進士歷官兵垣
王師入關爲

世祖皇帝所重由太常卿晉刑戶二部侍郎尋遷
左都御史以事謫上林苑丞後起爲都御史旋晉
司寇多所平反疏滯獄復秋決所活無辜甚衆遷
大司馬改太宗伯培士氣正文體疏請優禮學校
復天下歲薦廣郡縣子衿兩主庚戌癸丑會試所

得皆老成英俊累蒙

皇上獎諭寵眷有加卒諡端毅

廬州府志

龔鼎孳字孝升幼奇穎總角以詩文名年二十成
進士才望重一時授蘄水縣知縣敘守城功擢兵
科抗疏劾時宰下詔獄久之得釋順治初以原官
召用疏辭不獲進掌科累遷都察院左都御史再
請再起仍原官移刑部尙書治獄多平反疏久淹
復秋決所活無辜甚衆改官大司馬復改禮部僉

倦於士氣文體復天下歲貢廣郡州縣取士額主
庚戌癸丑會試卒

賜祭葬諡端毅公清操雅量領袖人文通籍四十
年宦橐如洗俸錢輒以應故交寒士獎掖後進孜
孜不遑於桑梓疾苦尤爲畱意請蠲請賑前後奏
牘甚多及卒四方聞者多爲隕涕詩詞古文卓然
名家封事詳明愷切每一疏出臺垣傳誦此大江
南北數十年來所僅有也著作甚富有定山堂集
行世

合肥縣志

龔鼎孳字孝升號芝麓幼奇穎書一寓目輒不忘
總角能文年二十成進士授蘄水令勸農興學聽
斷如神蘄人德之立生祠祀焉以守城功擢兵科
抗疏劾時宰下詔獄久乃得釋順治初以原官召
疏辭不獲進掌科累遷都察院左都御史再謫再
起移刑部尙書疏淹獄釋無辜所活甚衆旣而以
葬親告歸哀毀一如初喪旋以兵部起用奏請往
來兵馬勿得入城擾民歲餘改禮部奏復天下歲

貢廣州縣取士額主庚戌癸丑會試所得皆名士
多至顯位者卒

賜祭葬諡端毅公生平正色立朝不稍撓屈慨然
以天下爲己任忠言讜論每動

宸聽有大興革必問龔某之議云何其倚重如此
尤加意柔梓篤於故舊所得俸錢輒資貧乏沒之
日囊無餘貲誠子孫以清白世守至其詩古文詞
卓乎大家雖賓從雜逸笙歌鼎沸中千言立就海
內之士翕然宗之子二士禛以廕仕至湖廣僉事

士稚拔貢有文名

大宗伯龔端毅公傳

門人孝感嚴正矩撰

龔端毅公諱鼎孳字孝升生時庭產紫芝因號芝麓端毅則其今諡也先世自江西臨川徙廬之合肥再傳而爲寧揆公登萬厯癸卯賢書厯官滇南祿勸州又傳而爲眉齋公以詩古文名世俱以公貴贈光祿大夫兵部尙書加一級公生而岐嶷穎慧夙成祿勸公林居極憐愛之手授經書親加課

督不丙夜不就寢年甫舞勺精於制舉義每一篇
出冠絕儕耦兼博通騷史善詩賦古文詞老宿見
之罔不推服受知於太守烏程嚴公大尹新建熊
公補博士弟子癸酉甲戌聯捷時年纔二十耳聞
卷房牘膾炙海內有露澣園稿百篇學士家爭傳
誦之是年停館選公筮得蘄水令時值流寇蔓延
江北州邑多陷公受事甫浹旬寇至率家丁枕戈
城頭號令嚴明恩信并結士民皆爲死守一日探
賊在二十里外急率衆往擊各備柴束燒死賊數

百賊怒亟攻城用火藥擊之稍稍引去因增城浚濠濠深城堅寇忽夜襲城下濠水高丈餘不可涉兼干振嚴整賊顧視曰是城不可撼矣暇則與士民講說詩禮激發忠義問民疾苦興除利弊又爲闡揚理學勤課多士有問奇風始諸集齊安九州邑文士多來就社丙子分校楚闡總裁爲婁東吳駿公萊陽宋九青兩先生稱文壇名宿與公氣誼甚合藻鑑相同所拔皆奇儁得士解元周壽明等七人中甲科者五不肖矩與焉周則公季試蘄水

所首拔士也葢蘄七載日與寇相持屢挫賊鋒城
得巋然無恙善政縷縷詳山聲室集中撫按交章
累薦舉卓異行取陛見

上注視嘉悅拜兵科給事中卽日命察理畿南廣
平等處徧厯州邑詳覽形勢一月疏凡十七上自
固邦本以及善後畫沙聚米皆切實急著居兵垣
十閱月諸如疆圉大勢狡寇情形賢姦進退國事
安危知無不言言無不盡而於人才士氣尤爲諄
諄致意云於司寇徐公石麒之去國特疏請留極

論言官章公正宸惠公世揚憲臣劉公宗周金公
光宸等皆當賜環因及錢公謙益楊公廷麟忤璫
同難之方公震孺俱不宜終老巖穴又因同官請
卹宋公攷并請卹抗節殞身之范淑泰又言河南
撫軍王公漢死永城叛帥之變宜下明詔卹忠討
賊遣官致祭以動兩河父老忠君仇賊之心收拾
鼓舞所關甚大聞詞臣黃公道周杖後蹇殘不能
步履淒然淚下卽引以請罷詔獄廷杖復請蠲流
寇焚劫之郡邑三年租賦以安民心條上金陵十

事一扼要害一聯聲援一練水師一葺戰艦一覈
軍實一積糧儲一詰姦宄一固人心一禁侈靡一
修實政言皆石畫時中原淪亡京師孤注名雖扼
狡寇之窺意實備留都之遷其長顧遠慮若此抨
擊時宰則有大姦本乎大貪之疏政本關係安危
已誤不容再誤之疏糾論怙惡之疏至庶貪誤國
一疏則專擊首揆以此下公於理旋釋爲城旦其
因事納忠敢言極諫考古載籍所傳如公者寧可
多得耶寇陷都城公闔門投井爲居民救甦寇脅

從不屈夾拷慘毒脛骨俱折未遂南歸

本朝義旗東來狂氛電掃召以原官就職疏辭至

再三不允起吏科右給事中條上吏治之要曰尊

賢禮士曰辨論人才曰優隆臺諫曰崇獎恬讓陞

禮科都給事中有酌禮儀以垂一代定制定取士

之規以昭文治天變可畏乞加修省江南既定亟

舉賓興諸疏旋擢太常寺少卿丙戌丁外艱歸守

制服闋起補館職疏稱譯館之設辨習文字通化

柔遠關係甚重條應行四款俱見採納公負性剛

直不附時宰致相牴牾遂欲俗甄別出之外藩引
見日

世祖大悅之擢刑部右侍郎上疏臚列七事一謂
國運方新民生甫離湯火無非於剛罰飭法之中
寓下車泣罪之意時大小獄情同堂有清書而無
漢書重大事情又從清字翻出訊鞫時漢官倉卒
不及察何滿司獨勞漢司獨逸必滿漢公同質訊
詳注呈堂覆審從清字翻出者必引律敘招堂官
覆加看語然後具題一請參稽典例取決重囚必

仍從該科僉發駕帖將應決人犯姓名逐一注明
其有情罪失當者許科臣卽時執奏駕帖旣出照
例會集御史等官公同監決仍酌議行覆奏之法
以全萬一之生

上俱允行焉轉戶部左侍郎未匝月推少宰

上特簡都察院左都御史任事一載疏章累百其
最著者有敬陳職掌共砥勿欺之疏有圖治方殷
綜覈貴收實效之疏有推明德意之疏有刑官萬
難汰減之疏有敬陳治平八事之疏有海寇釀禍

密疏有暫停秋決之疏公在法司每事好持兩議人爲公言滿漢異議未便公弗聽果奉

上諭法司章奏每倡另議曲引寬條鑄秩八級又以巡方不法再鑄四級補上林苑監署丞頒詔粵東途次量移太僕寺主簿再移上林苑丞京察部議鑄級補外奉

旨畱內補國子監助教

上固鑒其忠直聊於裁抑中寓意往例降職官多不入署理事公以官無大小俱應供職無缺在上

林上疏請退出屯莊二十二處仍歸民闢業主辦
納丁糧在國學課諸生勉學力行士多興起了繼
母艱泣請奔喪奉

旨任守制癸卯服闋仍起補左都御史有寬民
力以裕賦稅之疏惜人才以收器使之疏有感誦
皇仁安插投誠諸疏甲辰調刑部尙書公曰予性
好生非刑官不能生人每對罪囚哀矜惻怛慘見
眉宇反覆招詳稍有疑竇必爲招雪有復秋決恤
婦女之疏星變陳言有請赦密疏有寬失出宥小

過恤株累諸疏皆切中時務語多忌諱丙午調兵部區畫方畧覈軍實嚴紀律有酌投誠重言路諸疏有寬奏銷疏已酉調禮部釐正京官儀從復歲貢廷試復試錄進呈庚戌主會試得宮夢仁等三百八人癸丑復主試得韓莢等一百五十九人公力掃時文靡滑之調故兩榜士皆瀟正古雅風氣大振壬子正月嬰疾疏請假治不允五月復請又不允六月疾大作

上遣學士傅侍衛吳醫官茹至寓存問公謝表有

閭巷驚傳爲僅見舉朝共慶其遭逢之句感荷
殊恩力疾入署以圖報稱勞輒疾發屢疏乞解任
調理皆荷

温綸慰留至癸丑八月疾益難支痛切乞骸歸
上念其情懇特允之著令馳驛病痊起用乃謝事
未及一月而卒公風格秀整目如巖電早歲巍科
名噪京國風采言論奔走豪雄其由令拜梧垣年
尙未三十也遭時不造禍及宗社慷慨赴難死而
復甦念誰爲我復君父之仇討弑逆之賊者殆未

可與往代革命同日而語矣前後疏章累數百通
其最大而行之既效者則寬民力以裕賦稅之疏
蠲江南積逋三百餘萬星變求言請赦密疏援引
古管謂朝頒赦而夕星滅及赦頒彗果夕滅其響
應如此至寬奏銷疏則請復江南降黜紳士不下
千人於迹涉嫌時多躓之公毅然曰以我一官贖
千萬人職何不可諸如疏中有疑難者每奉詰問
輒爲剖析條暢婉而不屈卒荷
溫綸更加引重焉

世祖常覽公詩文歎爲真才子又嘗書公名掌握
之示近臣射覆近臣以某某對曰非是以公名對
上曰是也朕固欲大用之但才氣太盛姑養以俟
今上辛亥元日慶賀

兩宮禮成

召至輦傍詢問平日所作詩古文眷注有加以故
屢疏乞歸不允疾則遣學士存問云公天材宏肆
行文如泉涌霞蒸筆不加點酒餘好卽席限韻擊
鉢灑翰工藻絕倫律詩常一夕三十首排律古體

至千字詞林譚玉章嘗語人江南有文士欲爲其
父乞公文知寓中無暇晷又稔悉公喜於席閒作
詩文乃備綾十二幅簡請郊原讌集車騶至日已
薄西出綾求文公縱筆疾書爲文累千二百字書
成劇飲以歸其敏捷類此公才旣高好自標持往
往爲異已者所忌百計擠排以致屢起屢躓公無
纖芥畱意遇人藹吉尤樂獎藉人善人有所毀若
不聞知固其德量有以大過人者與丈夫子二長
士稔兩中副車以廕候補次士稚尙幼

嚴正矩曰天之降才亦靳甚爾何至於公獨縱也
公賦才既殊以救時行道爲心以秉正嫉邪爲性
以敢言極諫爲忠以勁直不回爲節方之於古殆
司馬君實蘇子瞻之流亞與至於文詞豪邁警敏
絕世多者數千言少或數百言搖筆立就備極工
麗則陳思之七步青蓮之倚馬未之或先也雖有
忌公擠公者荷

至尊洞鑒寵任彌篤將欲大用公而公遽逝人不
可以無年信夫

龔端毅公奏疏

男士雅孫

志爽續祖

曾孫

曾懿曾憲

授梓

會恕會憲

會聰會愨

卷一 順治

甲申十一月起
癸巳五月止

條陳吏治疏

臣智術駢陋又當憂患之餘久不敢言天下事而
職守攸繫有不容寢默抑心者謹麤舉大端條列
如左開坐請

旨惟

陛下省覽行之臣不勝大幸一日尊賢禮士聖帝
明王所由興隆也往册班班姑不具述夫豈有創
業垂統而不與賢士共功名者乎諸臣遭罹顛越
身爲賤俘幸荷

生全敢復侈慕崇榮辱天下士然

陛下旣已薰祓而登進之俾得齒於衣冠之列矣
士大夫棄墳墓捐親戚依光

日月舍此無家正賴

朝廷愛護而保持之庶幾收召驚魂少延生趣卽
間有狂惑失足文網亦姑念

新朝法制未定稍示包荒手足腹心忍昧所天之
報蓋上之人重且愛之則士將自重自愛也上之
人厭且棄之則士亦將自厭自棄也嬰木索而對
獄吏辱莫大焉積漸以往恐虧所以待大臣之體
貴金錢而賤首領愚莫甚焉人各不同未可以此
槩天下之士臣願自今以往誕布
寬仁新舊諸臣恩禮如一非甚不肖姑與養其廉

章立山先生文集卷之二十一
一
恥而俾之自新其法祇應罷免者但須付之考功
不必遽投司敗至懲貪之典尤宜斟酌情法畫爲
章程使愚智曉然相戒不犯無論諸臣沐浴

至化共慶更生於以慰海隅之嚮風與貽卜年之
忠厚咸視乎此矣一曰辨論人才從來應運之英
懷琛抱奇與氣數相輝映鳳凰芝草一見爲佳遠
則宋劉皆能以其文章爲國藻黼日者

詔書數下揖進儁髦而剡章亦旣屢騰矣姑不他
引求如明初四先生其人亦何可遽得卽以文妙

當世學追古人之李雯國士無雙名滿江左石渠
天祿寶罕其儔今僅屈首俛眉有同傭作騏驎珠
玉進前不親而遙賁輪纁筮其馬骨恐非所以招
延神駿丹黃大猷也臣謂中人之才及胥史雜流
當循尺幅如農有畔戒彼越思至於英俊殊尤不
可限以常調必宜拔其姿異假之羽毛庶幾非常
之寶馳想

闕廷荆璧楚珩不招斯集是亦用人之第一義也
一曰優隆臺諫夫臺諫之官名爲侍從條臧列否

仰佐

高淡故指及乘輿則天下改容論及百職則宰相待罪合天下之大四海之衆利病得失豈繫一端而萃於數人使言之任至重也從諫則聖古有格言補牘牽衣風徽未泯魏徵受知明主抒忠攄讜遂令一時朝宁奉若蒼龜慶厯名賢肩背相摩而四諫嶙峋獨稱物望豈非氣併則昌氣痿斯懦歟今管雖殊人才宜不相遠往者囂陵詬誅誠謂非宜然至計危言有時而中自頃以來大僚會推不

與聞考選諮訪不相及

國有大事不復詢謀

朝會燕饗之時僅僅與郎署末流交相叅錯卽偶有建白無復覆行取具數而已夫臺諫七品小臣去就甚易而所言則繫乎

廊廟之闕違此未可以品級差等論也請自今以往特示優崇寧慎其選而不可不隆其體言苟有當立見施行論出至公宜資參決務懸敢諫之賞而究嘉言之功使封駁糾彈各舉其職勿徒以隨

例一發抄辨給舍之勤惰凌晨一侍班見臺郎之風采而

廟堂之上亦必實有容言納諫之意寓於懸鞞設鐸之中庶幾士氣剛明百僚振悚所謂虎豹隱威藜藿不采正此道也一日崇獎恬讓巢由孤竹揚聲治朝周黨嚴光蔚然隆軌廉頑立懦貴在聞風豈必纓鞶而能勵世自世風寢下利祿熏心苟可褰裳幾同攘袂求其屣遺軒組實有難言故朝廷待士之方不可以一端盡也其才堪經世爲

時所需者固宜廣示甄收以備明堂之楨榦若品
誠孤邁足表貪濁者尤當特昭風勵以樹名教之
外臣今

天威所加遐邇率服藹藹多士接軫駢肩用之不
窮浩若煙海不患無人以服官正恐無官以待人
則仕止進退之間不妨漸從其適使天下知

朝廷所貴者在乎廉靜寡欲之士而不在乎喜事
躁進之人庶幾搶攘不形而仕途清曠至如遷除
請調省親養病等事并宜早立規制使人共遵勞

逸適均羣才倍奮其於求賢致治裨益良多奉
聖旨這本內各欵非係濟時急務該部知道

酌議禮儀疏

臣惟帝王之興莫不制禮作樂垂之無窮若臣子
瞻對

君父趨蹌

朝廟則禮爲尤重凡以升降拜跪周規折矩非止
肅

朝廷之體統亦以侖海宇之觀瞻故禮不可太簡
簡則玩心生玩則肆非所以尊

朝廷也然避簡而趨於太煩煩則厭心生厭則怠

亦非所以式久遠也恭惟

皇上聖由天縱德備莊臨斟酌百世之典章邇追
三代之隆盛固已儀四方而型百辟且將服周冕
而聽虞韶日者

郊廟諸大禮以時舉行凡在羣僚莫不燕喜又俯
從臣等之請每遇

朝賀令滿漢諸臣分班行禮雍雍秩秩對越有嚴
爲臣子者際此休明尙不精白一心以爛軌度其
何辭之與有乃臣竊觀贊禮諸臣沿守舊格瑣文

末節或失則煩當于官立仗之時萬方送喜之會
每勤晉接於移日不念

聖躬之過勞臣竊怵怵懼滋咎戾用是不揣冒昧
上請

聖裁乞

諭禮臣并鴻臚寺堂上官除滿洲諸臣禮儀遵
旨另行外仍將漢官行禮事宜再加詳訂如遇
聖壽元旦長至諸大節呼嵩舞蹈應循舊儀其餘
拜跪層節之間有近似重複可以稍減者亦當酌

量省裁畫爲定制務令煩簡得所損益適中旣不
悖雍容莊正之大觀亦并去苛細繁難之故習庶
幾威儀不忒而敬共逾生又如章服以辨等威原
有定式乃諸臣遭罹寇患衣服墮於劫灰委珮飄
纓誠多缺畧因循旣久漸至參差今者日對

龍螭虔申虎拜安可保殘守陋不爲齊一之規請
并

勅下禮部通行申飭自茲以往每遇朝會章服無
許異同其有冠裳未備者傳示刻期速備以便一

體恪遵令之不從則以白簡繩其後是亦悚人心
正朝儀之一端也至於各官入

朝舊制懸帶牙牌以防混冒謹微辨分亦有淡意
存焉近以此制漸湮遂令末流雜職昂首鵷班甚
之市儈輿臺駢肩

紫禁初則恣其出入繼且辱及簪紳

朝宁森嚴此風亦何可長誠欲一切禁止莫如速
復牙牌前臣同官郝傑已奏請得

旨并乞申

論該部覆議製給施行臣無任悚切待
命之至奉

聖旨該部酌議具奏

敬陳孔廟事宜疏

近該國子監祭酒臣李若琳等奏爲先師之牌位
宜肅等事奉

聖旨先師諡號信宜尊崇著詳稽往例確議具奏
新牌就本監製造如議行禮工二部知道欽此仰
見

聖明崇儒重道詳慎周至如此也臣備員禮垣職
掌攸繫安敢無說而處此謹按孔子刪定六經垂
教千古德侔天地功竝日月學者宗之比於罔極

生民以來歎其未有惟德盛則享名宜隆惟功高則食報宜厚自古聖帝明王教育海內未嘗不以崇祀先聖爲兢兢也考周敬王四十二年魯哀公誅孔子曰尼父漢平帝元始元年追諡孔子曰褒成宣尼公東漢和帝永元四年封孔子爲褒尊侯北魏孝文帝太和十六年改諡孔子爲文聖尼父後周靜帝大象二年封孔子爲鄒國公隋文帝贈孔子爲先師尼父唐太宗貞觀二年尊孔子爲先聖十一年尊孔子爲宣父高宗顯慶二年復尊孔

子爲先聖乾封二年追贈孔子爲太師天授元年
封孔子爲隆道公玄宗開元二十七年追謚孔子
爲文宣王宋真宗大中祥符元年加謚孔子爲玄
聖文宣王五年改封爲至聖文宣王元武宗大德
十一年加封孔子爲大成至聖文宣王明洪武初
年爵謚一仍元舊至嘉靖九年始從大學士張璁
之請改稱至聖先師孔子夫無位而奉以王號吳
沈已有懼得罪聖人之文塑像而被以冕章邱濬
亦謂非神而明之之義璁之議改不爲無見但易

王而師可矣因師而遂削其大成文宣之號可乎
易塑像而木主可矣因木主而并殺其佾舞籩豆
之數可乎此先臣王世貞所以致歎於輔臣禮官
曲加迎傳天下後世不免有所窺見而愾然倡光
復之論也今者

聖明御宇一道同風禮樂咸興文明丕顯不亟乘
此時有所釐正以示萬世之法程毋論大典有所
未光是亦臣等誦法孔子者之罪矣謹就祭酒臣
若琳等所請而稍抒一得以備參稽可乎其謂先

師牌位宜仍定爲大成至聖文宣先師孔子此誠
至當不易之論無俟臣言按謚法經緯天地曰文
聖善周聞曰宣而當日張璠持議則謂宣之一字
於謚爲輕不足盡聖人之德夫謚之爲言舉一端
而全體備旣云聖善已著大凡何至槩抹前日
爲荒誕故謂宣輕而思有增益焉可也因議宣而
槩爲削斥焉不可也此所當確議者也侑舞益而
八簋豆益而十二雖曰天子禮樂乎然旣素王奉
之矣德足配天則不可以位限況聖功大於堯舜

者哉且成均者天子釋菜尊師之地也以天子自
尊其師而用天子之禮樂誰曰不宜先朝憲孝二
宗與賢臣王恕周洪謨等考據增加有由來矣當
時議減者誠近偏畸及今追復焉何疑僭濫此所
當確議者也大成殿額更爲先師廟意存簡樸實
匪舊章幾令峻極之宮牆不得與梵寺琳宮竝稱
比美紳衿之士入駿奔而出瞻仰能無色沮心慙
乎矧廟者統詞也殿則安神之所也譬之堂焉室
焉各有其處殿之不可稱廟猶夫室之不可稱堂

也烏得而淆之故大成殿名之不可不復蓋章章也此所當確議者也從祀諸賢遠不具論若宋元以來人品醇疵了然在人耳目稍辨黑白者能知之嘉靖中登歐陽修而遺范仲淹先臣王世貞以爲餘憾其謂仲淹力振綱常首扶神器兼於戎馬倥偬之際以中庸誨引張載俾成大儒彬彬乎歐陽子之右矣夫生爲名臣表章聖道而後乃寂焉不得分芹俎之末光事理不平孰甚於此他如元之劉因守道淑人終身不忒祀典未載臣亦不能

無疑此所當確議者也又漢儒劉向以旁通方術
蒙譏吳沈以宋士仕元見黜漢文苛責識者傷之
一則上封極諫孤忠獨砥而經術蔚爲文章一則
著書立言道統紹明而體用幾於醇備皆足鼓吹
聖奧啟迪後賢大節無玷於生平公論益彰於久
遠豈得與附會圖讖之賈逵美新大夫之揚雄同
日語哉平心觀之其人斯在此所當確議者也抑
臣附有請焉先朝二百餘年名賢輩出其得與於
從祀者薛瑄王守仁陳憲章胡居仁四人而已誠

憂憂乎難之以臣愚所見聞如故憲臣鄒元標性
兼忠孝學本聖賢當輔臣張居正奪情時抗疏批
鱗天下想聞風采繼起謫戍敷歷數十年直道彌
章要歸和粹日與諸賢研究大道至老不衰其所
著書咸謂得濂洛關閩之正以立朝之風節合諸
居鄉之品行言動皎然內外無間誠卓乎大儒也
講學一事或以迹涉標榜歸咎宗盟不知此皆依
附門牆之濫觴而非主持名教者初意至如元標
理學實無可譏以之從祀黌宮允與四賢媲美伏

乞

皇上下臣章令諸臣博議如芻蕘可採一併覆議
施行蓋今日教胄子於虎闈羽籥管絃聿新圜橋
之聽睹異時拔名卿於髦士衣冠文物共襄一代
之治平皆先聖先賢之所憑依而亦

聖子神孫之所取法者也臣雖閭陋竊幸畢其區
區之愚至如衍聖公來朝

京師宜加優禮以示隆重闕里之廟庭禮器宜
勅諭所司以時修飭用肅觀型是則

聖朝自有曠恩而非微臣所敢贅矣奉
聖旨孔廟謚號加稱大成至聖文宣先師孔子既
監科考訂僉同准如議行一應禮儀照明朝舊例
不必更改該部知道

11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100

請定取士之規疏

恭惟

皇上武功大定文德誕敷薄海俊民莫不翹企風雲翺翔

天路況今歲賓興伊始羣矚尤切聳觀弗善置羅何資鼓舞顧一代之興必有一代之制作自經義創於王安石而前代因之又加飾焉二百餘年獨尊制舉始未嘗不登進馴雅而後漸頹靡支離也風趨愈下其病多端誠欲一切正之無如變法然

守常道故士子之恒矯首試期又在眉睫責其胸
宿盡蕩鼂采別生則亦不能以臣之愚今歲取士
之文宜仍舊貫但須釐正體式一以醇雅爲歸凡
夫浮蔓不經詭誕無紀一語之佳衆腕互用八比
之內排偶疊增貌若離奇而中實無有如是者悉
垂厲禁必斥勿收要以法不掩才才不廢法本乎
有諸已之學蔚爲不猶人之文語不得襲用六朝
字不得多踰七百還題目之位置開風會之先幾
如是則文體立矣夫臣爲此說非抑奇昂庸也惟

奇士兼能守法而庸人決難見才真贗殊途炳焉
日火卽何得題珠爲玉質質以皮故獎庸之辜與
墮體等然臣又念之服古之儒襲經組史名山大
業重於國門合二三場以觀而其長乃見往者主
司止重七藝槩畧其餘遂使讀等身之書不能奪
一語之雋今欲求實學必貴淹通博覽窮搜於斯
爲要亦必大懸厲格以覈主司若二三場披閱不
虔漫無點定許諸生於放榜之後抱牘自陳聽監
臨御史彈治之其首場有兼通五經文詞贍茂者

尤宜拔置高等以章窮經好古之功如是則蒐采
無遺實學必出蒼彝和璧燦然於前矣夫主司者
士子之磁石也不得其人則毒甚於盲霧今欲製
器必務擇工豈有掄英而富率畧故求士之道莫
如妙選主司自非夙負才名研通今古者勿以領
棘闈之役其人旣得斯無遁才耳目薰然動於雷
鼓管歐陽修知貢舉而軋茁爲之改絃是則握本
之一說也又今者寇灰甫滌

天宇大鼎中外馳驅需賢甚迫與其索之於皤白

之明經與刀筆之胥史倖心易啓朝氣不揚無如
科目求才猶爲拔十得五矧

聖人御宇萬化欣瞻鳳噉鸞騫難拘常格必於科
額之外酌量

畿省特示增加轉瞬南宮奏第萬國計偕推廣
德心益廓斯典庶幾士願立

朝者庶而官以得人則修至於滿洲子弟俊秀能
文者亦須一體入試用光

天紘但當別立字號量減篇數俾之樂遵於以昭

朝廷佗人之功而生多士從

龍之色所關非尠他如二晉三秦及大河南北之士既離湯火延想弓旌提學一官實司化鐸且科試已迫囊筆如林不有名彥提衡安能勝任愉快遴簡得當卽宜急為題補以廣薪楨又聞

京師貢院漸成圯蕪誠恐因循日久光復為難宜及今茲鳩工修葺非止隆重

大典實以嚴蒞關防伏乞

勅下該部再加參酌於臣所請正文體崇實學擇

主司增科額補督學修試闡諸款逐一議覆上請
聖裁施行多士幸甚臣愚幸甚奉

聖旨禮部詳議具奏

條上江

日者

王師遄征四
后臣鄉江北
王化勞來滯
仁恩蓋奠新
安天下敢以
皇上陳之二
日得見太平

生全之樂謂宜

嚴飭行間凡駐師處所務宜申明紀律草木無驚
禁搶掠平貿易使民之室家各休倚而今完聚民
之膏血管腠剝而今保全其誰不歌舞以拜

聖明之賜一曰蠲免征徭廬鳳皖罹賊禍者十年
淮揚之震鄰而苦轉輸者亦十年頃諸鎮虐使其
民暴斂苛征又復不知紀極敲肌及骨言之摧心
謂宜迅沛

恩綸一切新舊賦稅及無名之征悉行停免其傷

殘最甚者仍自順治二年始特免三年鳩鵲遺黎
庶幾溥沾

實惠一日消弭民害江北之爲民患者無如積年
驕縱之兵而縱兵殃民實爲債帥此輩狡猾怯懦
中懷多端謂宜於投順地方散遣士卒使之歸農
其領兵各官非衝鋒効死爲我前驅者悉斥勿用
此後緊要將領務須經由部選乃許受事旣清積
弊亦協羣心一日急除守令督撫道彈壓一方固
稱極重之選而守令與民最親其疾苦尤爲關切

今蒙臣仰體

德意孜孜用人秦豫有司靡不朝缺夕補江北諸郡邑瘡痍已甚拊摩更殷謂宜遴選真才急爲銓補仍令刻期到任早一日則民受一日之福一日招徠民望者碩俊民一方之表輝山媚澤莫不翹想風雲謂宜

勅下督撫按道諸臣凡江北現在鄉紳才望著聞者卽日起送來京以備

朝廷器使譽望旣集弓旌益光一曰作興文教江

北士子久困戈鋌橐筆如林寧無中熱謂宜急
遣學臣星言考較秋闈在卽樸棧大興旣予以功
名之門卽可收得人之效以上數款實係目前切
要事宜伏冀

聖明裁鑒允行臣鄉幸甚天下幸甚

江南底定乞舉賓興疏

恭惟

皇上天威震疊南國來歸一統之業已成萬年之
基伊始善後諸策所宜急圖如留陪京以重咽喉
設官僚以理庶務頒曠蕩之

恩詔以昭

德意減久苛之賦額以慰人心招徠賢才滌除疾
苦厚培元氣廣樹風聲一切治定功成潤色太平
之事諸臣當次第條上

聖慈自立見施行而目前所甚急者莫如開科取士蓋士爲四民之首觀感尤先欲鼓向風宜收民望況南國人文甲於天下掄才舊額特異恆區今屈指仲秋時日已迫恐稍存延緩或至後時當龍飛籲俊之初豈可有俊髦向隅之歎乞亟

遣江南學臣與已

遣江北學臣星馳前往料理棘闈諸務其科場條費但仍舊貫自不至缺誤周章總求不逾

恩詔內乙酉鄉試之期庶來春計偕多英畢集而

闢門盛典萬世爲昭矣至府尹一官職司提調科
場事務細大必經非得精心敏手未易勝任乞
勅部速行推舉刻期受事以煥薪樵他如剛經恩
拔等款尤望比照

畿省事例一體舉行於以宏樸棧而肇文明所關
非淺尠也臣垣職掌所在不敢不言伏冀
迅裁施行

乞修省以弭天變疏

臣見我

朝自去年五月大兵入關後和風甘雨麥秀河清
人心悅安

天休滋至臣民熙熙若遊三五之世矣乃今歲六
月淫霖弗止震霆屢作本月初八日大雨連日夜
不息民間牆屋傾頽聞多壓死者他若雷火冰雹
見於宣督保撫之疏復不一而足此不可謂非變
異也書曰天視自我民視天聽自我民聽詩曰敬

天之怒無敢戲豫是亦

朝廷恐懼修省之日矣請自今

兢兢業業仰承

上帝仁愛之意修德省刑親賢遠佞勤圖治理急
求民瘼近而

畿甸遠而四方何以撫綏得人何以安輯得所務
使匹夫匹婦無不沾被

堯舜之澤庶幾

天心允協禎祥益臻又古帝王遇災而懼皆下詔

廣求直言凡以通幽隱祛壅蔽也今

皇叔父攝政王霽顏虛受既已納諫如流臣謂宜
倣唐貞觀故事日輪科道一員遇部院大臣奏事
時隨班入侍凡

詔令不便奏對不當皆得應時執爭民間疾苦亦
許隨事陳奏不待令出而後議非惟下情畢達亦
且章疏不煩至中外大小諸臣皆宜精白恪勤以
謹

天戒而內院輔弼大臣號稱政本變理陰陽尤其

專職漢時每遇災變策免三公其責重矣諸大臣
遭逢

聖明臧否易見苟能開誠布公宣

德達隱亦何變之難回當毋以

天怒不足畏民隱不足恤而泄泄視之也臣備員
禮垣災異之事職所當言故不避忌諱如此伏乞
聖鑒施行

請宏作人之化疏

日者寓學諸生科試一事經學臣曹溶再疏上請
未蒙

俞旨夫學臣豈好爲市恩哉亦以士心不可不收
下情不可不恤

詔令不可不信耳諸士身依

輦轂歸順最先必亟開功名之門乃益作從

王之志此謂收士心也故鄉修阻跋涉艱煩棘闥
之時日易愆失路之金裘易盡此謂恤下情也設

立寓學奉有

恩綸草昧初開

切揮之使去

詔令也今若

畿士之外廣

承成均之乏

愚只就寓學

二三名亦無

倖濫之憂行

作人盛化裨益良多又浙江江西湖廣皆已平定
提學職司造士貴得真才宜及今茲早行推舉併
三省鄉試迫在眉睫亦乞

勅部議定場期不至臨時紛紜羣情展轉庶士氣
知奮而

大典益光矣

乞假省親疏

臣於去年七月內因思親成病再啓乞身奉

皇叔父攝政王令旨冀鼎孳旣奉

旨盡心圖報何得復以私情陳請著速出供職該部知道敬此臣拜誦

溫文祇深感涕爾時道途多梗亦未敢更及烏私然每念亂後庭幃飄零無地中宵嗚咽意往形留感溫嶠絕裾之非心如剗刃讀李密陳情之表血欲沾衣況臣家最窶貧數遭烽火流離瑣尾餽粥

難供其於人子至情尤爲獨苦今幸

天威遐暢薄海歸心臣鄉江北久入版圖子舍白雲依稀在望是則臣披胸露心之時矣伏見

聖明以孝治天下昆蟲草木咸被

湛恩恤下深仁尤殷錫類如戶部侍郎任濬乞假省親舊臺臣李仲熊乞假看母翰林院庶吉士李呈祥乞假視親悉軫

宸慈俯垂允可臣敢援斯例仰丐

同仁伏乞

聖明念臣至情原無假托陳請已非一朝特沛
俞綸俾得生入里門少申省覲從此不先犬馬填
溝壑感

恩圖報豈後他人瞻覲

高穹伏俟

矜許臣鼎孳可勝激切戰悚之至

Handwritten text in the right margin, possibly bleed-through from the reverse side of the page.

懇回籍養親疏

恭惟

聖朝孝治天下諸臣以養親省親請者無不朝上而夕

報可此

天地父母之恩也臣家有二親久遭烽火流離貧苦饘粥難供每一思維心如剗刃向以道途梗阻莫遂烏私今臣鄉江北久入版圖子舍白雲依稀入望敢乞

天慈錫類許臣回籍養親從茲定省無愆莫匪
隆恩再造感銜

高厚沒齒難窮臣薄劣狂愚素稱孤立自去年五
月以至今日兢兢奉職幸追罪愆惟近於

召對之頃發言無狀觸忤輔臣雖荷

睿鑒之優容終難隱忍而就列況瞻馳胝謁實有
至情正思依

日月之光又已切庭闈之戀私中展轉涕雨交零
跂望

穹幃伏俟矜許臣鼎孳可勝激切誠懇之至

欽定四庫全書

卷一百一十五

三十一

皇朝家範正編卷

再乞歸養疏

臣至愚極陋無足比數自去年五月初旬感
聖朝除凶雪恥救民水火之

大恩隨舊同官朱徽後竭蹶趨事爾時草昧初闢
六垣皆虛無人徽與臣早暮拮据罔辭瘠瘁嗣是
科員漸次鱗集垣務稍稍修舉臣以思親成病自
列罪狀兩啓乞休疊被

溫綸令臣盡心圖報兢兢奉職又歷年餘誠鮮建
明幸逃咎戾至今年九月吏部察俸推臣荷

恩允用拜

命之頃感惕交深一則人微望眇懼貽誚於糝糠
一則觸忌違時方驚心於刀俎罪固多矣臣猶知
之而不意啓事未幾謗篋果騰卽以拔擢之

隆恩爲指摘之談柄是堪冷齒實恥自明臣所危
者此身之久蹈禍機臣所信者此心之可對

君父今處分已定是非已昭若澳澀苟偷不卽引
退則眞寡廉鮮恥無惑乎人言之詬譏矣且臣以
南方孤鳥依光

日月臣之身

皇上生之臣父臣母亦

皇上生之鄉夢初通有路灑陳情之血

國恩欲報灰心聞逐客之書再若遷延必生狼狽
伏乞

聖明憫臣謀身之甚拙念臣孤立之至難特沛

天慈放歸侍養從此不先犬馬填溝壑捐糜矢志
豈後他人非惟彰

保全臣子之恩亦以示拙直寡援之勸矣

1875
1876
1877
1878
1879
1880
1881
1882
1883
1884
1885
1886
1887
1888
1889
1890
1891
1892
1893
1894
1895
1896
1897
1898
1899
1900

乞賜恩卹疏

臣於本月初十日聞臣父之喪卽具呈本衙門代
題今蒙部覆奉

聖旨准臣回籍守制

天恩高厚感激涕零念臣自順治元年五月初旬
蒙

恩錄用未幾以思親成病具啓乞歸疊荷

溫綸令臣盡心供職望雲路杳黽勉馳驅而南中
一二用事者刀俎橫加遂無寧日臣父流離奔竄

險阻備嘗

天兵渡江幸免於難是臣父臣母皆賴

皇上再生之也捫心自矢但有捐糜敢不俯仰烏
私仰酬

鴻造豈意臣罪深釁重禍延所生甫沾澤於

光天遽溘先乎朝露聞報摧隕萬死猶賒今臣父
已矣生不能侍湯藥歿不能親含殮顧視天地何
以爲心所不卽從臣父地下者冀幸

國恩寵施幽壤則起骨加肉之仁臣子所爲籲

天而泣血者也察禮部會典開載萬曆六年夏定
一款凡文官四品本身及父母皆
賜祭一壇無葬出自

特恩者不拘順治二年四月內府丞張若麒據例
以請隨蒙

允給臣叨佐太常已歷十月躬逢

恩詔臣與臣父母俱應得四品誥封所有臣父祭
典實與例合懇祈

皇上勅部查照給賜豈惟臣戴

恩圖報沒齒爲期卽臣父亦銜結

皇仁於九泉之下矣臣無任哀懇待

命之至

申明職守事宜疏

竊照四譯館之設所以統率官生辨習文字遠聲教而柔遠人也恭逢

皇上開天立極萬國來同德威普邕於遐方珙球肇基於萬禩臣備員提督職掌攸關際茲王會之隆敢昧素餐之戒謹以應行事宜爲

皇上陳之一請給公署以便肄習臣衙門職司朝貢繫重譯之觀瞻可以歷年而不用不可一日而不備故舊設十館館有公曹所以安處多員時

其考課也自舊署別用討給司經局未幾復改充
都察院衙門矣屢經移文院部卒未補給嗣是僑
棲寺廟僻隘難居旣於體制非宜亦且教習無所
乞

勅下工部比照太醫院改給會館事例查撥空閒
官房以充公署庶稽考有地而職業不隳矣一選
儲後學以永傳習各國文字懸殊翻譯實難猝辦
舊制譯字生或十年一收考或十餘年一收考家
傳幼習緩急不苦乏人今各館有官無生旣已晨

星落落而暹羅館則官生俱絕百譯館亦官止一員脫或譯學失傳誰執其咎日今廣撫題報暹羅有進貢之期矣除臣一面招集本館世業子弟刻期習學外查順治二年前任館臣考定子弟六十餘名堪補遴充因陞任未經具題遂致渙散祈勅下禮部照例考試選補庶傳習有人不至貽誤於臨時也一開註缺冊以重職守十館各官舊由吏部題授自元年投誠以原官辦事禮部冊檔可查又經內院裁定經制准設堂屬五十六員底冊

亦存戶部年來

朝參慶賀支俸頒賞皆得與焉其爲實厯見任之
官明矣止因投誠之始提督乏員故册存禮部未
移銓司嗣是丁憂起復及事關遷轉皆以缺册無
名致煩查駁夫辦事食俸則有人誤

朝參罰則有人而姓名不列於銓曹宜各館之悵
惘自失也且譯學之傳皆由世業教之累世尙恐
未精今十館缺員已虛經制之半倘復日消月耗
整頓彌難祈

勅吏部查照節次造送職名准以入冊其丁憂者
查無違礙照例題補庶寒官爭勉於職業而拮据
不虛矣一申飭勸懲以別勤惰舊例譯學官生除
逐日教習外有月課有季考有歲參分別等第開
送內院凡遇史館

誥勅謄錄需人亦於十館職名選用其繩約至嚴
而擇至精也臣受事以後按季考課亦孜孜罔敢
怠荒矣今序班等官供俸九載俱當給由之期其
考覆稱職者似應查照會典量與加銜而譯字官

習學年滿亦宜試其優劣酌題授職一切選取薦
送仍請照例舉行明開向用之門使不以散曹自
棄自此以往仍有玩日偈月不供乃職者臣請呈
報內院不時參處特示罷黜庶羣心知奮而學業
彌勤矣以上四款皆係職守要務字稍逾格竝乞
聖明鑒宥施行奉

聖旨該部議奏

龔端毅公奏疏

會恕
會憲

男士稚孫

志爽續祖

會孫

會憲會憲

授梓

會聰
會愨

卷二

順治

癸巳五月起
甲午八月止

遵 諭陳言疏

臣材質最爲駑下蒙

恩簡擢俾佐秋官奉三尺而不阿者臣之職致

盛治於刑措者臣之心頃值

皇朝通志卷之二十一
皇上省躬求言甘霖立應

天心

君德感召甚微顧事天以實不以文修德以恆不以暫謹就職事切要臚爲七事上

聞仰冀

鑒裁少裨

明允一定罪貴乎按律也治刑者之有律猶制樂者之有鍾呂銖黍不容或差若舍律而弗遵將輕重任意人無所適從矣漢張釋之曰法者天子所

與天下公共也今法如是更重之是法不信於民也請自今

申飭諸司問擬大小獄情一依本等律文確議上奏不得舍棄律例單坐罪名至於死徙諸大獄動

關

聖德尤宜再三詳審使天下曉然於用法之意庶幾出入無失觀聽不淆一折獄貴乎得情也會子曰如得其情則哀矜而勿喜夫得情尙且哀矜豈有疑似揣摩可爲定論者乎近如楊大用等一案

一經

睿照咸頌

好生則知雖不承認四字未可遽置重典明矣請
自今

申飭獄情虛實諸司必再四推詳其罪果虛則亟
爲申雪以燭覆益其罪果實則確究根因以垂鐵
案勿持兩可之說務歸五聽之平情罪旣真自無
冤濫一司審之規宜定也十四司官滿漢並設原
期同心商酌共砥公平庶獄無遁情官無曠職近

見大小獄情回堂時多止有清字而無漢字在滿洲同堂諸臣虛公共濟事事與臣等叅詳然倉卒片言是非立判本末或未及淡晰底案又無從備查至於重大事情又多從清字翻出漢字當其訊鞫之頃漢司官未必畱心迨稿案已成罪名已定雖欲旁贊一語輒苦後時是何滿司官之獨勞而漢司官之獨逸也請自今以後一切獄訟必先從滿漢司官公同質訊各註明切口詞呈堂覆審發落既定或擬罪或釋放臣等卽將審過情節明註

於口詞之內付司
重大閒從清字翻
看語然後具題事
守一決囚之制官
覆奏明白然後加
駕帖付錦衣衛監
市又一欵赴市曹
尙宛轉慮其或宥
周書垂服念之

而重死刑也請

叅稽典制取決重囚必仍從該科僉發

駕帖將應決人犯名姓逐一註明其有情罪失當者許科臣應時執奏

駕帖旣出照例會集御史等官公同監決仍酌行覆奏之法以全萬一之生庶讞者益務詳明死者可無遺憾至強盜土賊賊證明確及當時見獲者照例卽決外如贓跡未明招扳續緝涉於疑似有不妨再審之條稍示圖週期無枉抑一流徒之法

宜酌也笞杖徒流絞斬載在律文而流罪一項則有二千里二千五百里三千里之分蓋皆就本犯原籍計道里之遠近爲僉發之重輕也查大清律開載有流無徒惟向來隱匿逃人一欵有流徒邊遠字樣業蒙

聖慈浩蕩改從寬政人慶更生矣近見特恩免死間有流徒

盛京地方者此固

皇上法外之仁亦罪人望外之幸然在

聖明曲垂三省閒一行之以示解網之
殊恩則可而臣等問刑衙門持此以定人之罪案
則非律之初意也且

盛京爲

祖宗發祥之地卜年卜世億萬載

王氣所首鍾一旦令罪人雜處其間

豐鎬神區有鬱結未舒之羣情非所以迓

天庥而培

湯沐也請自今以往除

特恩免死仰聽

聖斷外其餘臣民下死刑一等者仍比照律文引例遣戍分別烟瘴邊遠附近等項一以罪人原籍爲斷勿輕擬流徙

盛京庶律與罪符而太和長在

根本矣一詞訟之案宜清也法司衙門爲皇上秉持天憲

京畿十四省獄情咸取裁焉案牘至爲煩冗非精心詳酌未易勝任也近見

畿輔一帶凡有爭訟事涉滿漢關連者輒向刑部
質成臣謂有司不許監責固以遵奉

明旨而督撫者則

朝廷封疆之大吏且皆從

龍之舊人也豈有身當節鉞之寄法行吏民之上
而田野勃諄之細故一切不得與聞者乎請及今
酌議事關滿漢兩造除人命強盜等項重情照常
赴部質審外其一應鬪爭小事該州縣應與解釋
者卽行解釋不能解釋者據實申報督撫從公審

明發落耳目既近何敢偏私往返不勞無妨耕鑿蓋以舊人而治舊人至公也以大吏而代有司至慎也詳於重大而略於細小至平也此實爲

國家崇大體非獨爲臣部省繁訟而已一收贖之例宜行也周官三赦幼弱老眊之人咸得減死律令八十以上十歲以下及篤疾犯殺人應死者議擬奏

聞取自

上裁盜及傷人者亦收贖餘皆勿論九十以上七

歲以下雖有死罪不加刑又一欵凡謀反及大逆
祖父父子孫兄弟及同居之人年五十以下給付
功臣之家爲奴蓋義盡仁至法若是其備也請及
今申明有罪犯重大應坐家屬者卽與分別老幼
篤疾據實上請依律科斷於明罰飭法之內寓下
車泣罪之仁巨奸旣不漏於濶疎

天威亦不窮於旁及庶幾民重犯法而世臻吉康
要之其本則在

皇上矣興廉教讓使天下無不靖之風俗道德齊

禮使四海無不格之人心搏節愛養使衣食既足而民知禮義居敬行簡使更張有漸而人凜紀綱則又徵臣芹曝之愚願觀

黼袞風動之效者也循職條奏字稍溢格貼黃難盡伏乞

聖明省覽全疏并賜

鑒宥施行奉

聖旨這所奏按律治刑諸款切當詳明著速議具覆本內大小獄情回堂時多止有清字而無漢字

及稿案已成罪名已定雖欲旁贊一語輒苦後時
滿司官獨勞漢司官獨逸如此參差殊非滿漢一
體之意以後滿漢司官務要公同質審備列滿漢
字口詞呈堂覆審著飭行該衙門知道

請行蠲卹疏

臣讀邸報見樞臣王永吉一疏爲江淮亢旱異常等事奉

聖旨據奏江淮重地亢旱爲災深可軫念民間疾苦該督撫當不時上聞地方這等災荒何無奏報著作速確察議奏該部知道欽此仰見我

皇上曲軫民生深憐疾苦古帝王如傷之仁何以加焉一時督撫諸臣自無不仰體

聖心繪圖請命者願督撫之奏報必憑道府之申

呈而道府之申呈又必因有司之籲請地里旣參
差不一虛實又察勘難齊及至彙疏上

聞下部酌議部臣慎重錢穀又必仍行該督撫確
查被災重輕往返旣多徒糜時日迨分數到部而
一年歲事已周矣在有司慮考成之累不得不急
於催科在百姓畏追比之嚴不得不急於輸納一
刻未填溝壑何辭剜肉以醫瘡一戶未卽流亡難
免剝肌而敲骨鳩形菜色之赤子扶傷忍死明明
知有浩蕩之

聖恩而迄不能待此所以有顛連恆苦無告

德意不卽遍霑也臣以爲災變旣屬非常則救災之方亦難更拘常格卽以臣郡廬州論連歲旱魃爲虐赤地千里飛蝗蔽於中野湖澤涸而生塵自去年二月至今年六月雨雪全無禾苗盡槁牛乏可飲之水賤鬻以供庖廚人當垂絕之時吞聲而啖糠覈甚至貸呼無路闔戶自經創見駭聞傷心慘目夫一郡荒而旁郡不荒民猶可以就食一年荒而連年不荒民猶冀有宿春今則饑饉頻仍江

身正家正國正
淮同困嗟此無衣無食之衆孰非問耕問織之人
使其束手以待斃則少一民使其不肯束手以待
斃則多一賊所少者民則賦稅之源亦少所多者
賊則收拾之費亦多拯溺救焚只爭呼吸臣不揣
愚昧叩懇

聖慈勅下該部從長商酌做九年改折漕糧之法
特布

曠恩將廬鳳淮揚江安等處被災地方本年起運
錢糧及應徵漕米預定蠲免分數析爲三等災荒

最重者或准全蠲或蠲幾分稍次者准蠲幾分再
次者准蠲幾分立行江南督撫就近察實分派一
面曉諭州縣一面造冊報

聞其無災地方不得借端混冒如本年錢糧小民
已畏比全完卽於十一年應徵起運正項及漕米
內扣除抵算務令人沾實惠事杜稽延官胥毋許
侵漁里排毋許乾沒如是則應蠲者旣可直捷邀
恩而不應蠲者亦免遲疑觀望民心固得

國計亦未盡絀也臣非不知軍興需餉司農方苦

皇朝通志卷之二

於持籌然竊觀

皇上於

畿輦水災憫卹備至沛頒

宮帑普及兵民賑之為德也過於蠲而旱之望

恩也同於水活得一分百姓即所以維挽

天心畱得一方良民尚可以辦輸

國課臣實實從

朝廷起見不獨為桑梓疾呼也因詳述情形字多

逾格并乞

聖明鑒宥臣鼎孳可勝激切待

命之至奉

聖旨這所奏廬鳳等處旱災該部察議具奏

懋忱控辭疏

臣鼎孳自順治元年五月蒙

恩補授科員漸陟卿寺歷任戶刑二部侍郎自矢
兢兢奉職積日累月期少補

國計民生上答

隆恩於萬一本月十七日接吏部咨欽奉

聖諭陞臣都察院左都御史聞

命自

天驚悚無地竊念都御史一官卽古所稱御史大

夫也總持風紀振肅百僚爭朝堂之是非陳軍國之利害責任至鉅故簡異亦不輕我

皇上圖治求言遇都御史缺員每爲慎重其選蓋必歷練久然後議論可見施行德位崇然後班聯無不推服臣自揣才識迂疏性資愚慙但知拙守於一介未聞建豎之寸長物望輕微官階驟躡將貽異日負乘之誚以累

聖主知人之明伏乞

天恩收回成命別簡賢能令臣仍供侍郎舊職從

此循分自効無憂隕越感銜

慈造益勵捐糜矣臣鼎孳無任激切待

命之至奉

聖旨卿才優品卓持論端方故特簡司風紀宜祇
遵供職不必控辭該部知道

敬陳職掌疏

臣鼎孳蒙

恩擢領臺憲具疏控辭奉

聖旨卿才優品卓持論端方故特簡司風紀宜
遵供職不必控辭該部知道欽此臣恭誦

溫綸感涕交集已於本月二十二日遵

旨受事訖竊念人臣遭逢

聖主既優崇以爵祿復

獎飾其生平極千古之至榮非七尺所能報况臣

才本駑鈍品在下中持身雖戒唯阿尚口每多尤
悔懼負

恩知之特達敢忘夙夜之靖共願臣所爲報効我
皇上者惟期盡風紀之職耳臣忝爲御史之長必
諸御史各盡其職而臣之職始盡亦必臣自盡其
職而後可以責望諸御史請先言御史之職可乎
夫御史一官設置最久原不始於近代言事其專
職也乃諸臣固有積月累歲建白無聞而止以行
聽鳴職守者立

朝旣乏正色之風攬轡安冀澄清之效況今

開創伊始規模遠大何事不需講求上自

廟謨下而民隱以及人才消長吏治貞污紀綱法
度之交修仁義富強之兼濟言一事務令天下蒙
其庶論一人必使盈庭服其正是虎豹在山藜藿
不采所以遏禍亂而尊

朝廷也臣願與諸御史約自今以往各循覽

國家設立言官之意力矢公忠共期謬倘因循
積習緘默不言又撝拾細微塞責挾私顛倒是非

臣皆得以白簡糾之使諸臣於

君國實有裨益則風采自堪畏愛臺班何慮擢類
臣所爲諸臣砥者此也至臣職司表率備員大臣
貞慮肅度秉道絕欺

國是必爭羣僚嚴憚臣之職也若條舉一事指摘
一人與言路諸臣爭長建白非臣之職也臣持廉
乃可責諸御史之廉臣奉公乃可責諸御史之公
臣守正乃可責諸御史之正其或徇情面通賄賂
愛身家不愛

朝廷畏私交不畏

君父豈惟

國法清議所難追抑亦

天地鬼神所不容臣不敢也臣旣以此自砥亦願
諸御史共爲凜凜也今天下民困極矣數十年來
兵火迫之賦歛迫之貪官污吏水旱盜賊又交迫
之幸逢

開天之主視民如傷與古帝王猶病其咨同一
仁愛而太平猶未立奏臣誠中夜疚心謂臣工之

忍負

皇上故先自治而後治人請自臣與諸御史始伏
乞

聖明鑒勅施行奉

聖旨這本說的是著實圖振飭以肅風紀該部院
知道

圖治貴收實效疏

臣見

諸王大臣會議巡方一疏奉有近日考核止分別督撫功過其大小文武各官貪廉善惡并民間疾苦未會察及各省地方遙遠何以得知當速行巡察之

旨仰見我

皇上澄清吏治軫恤民瘁之德意此天下所盼望太平而諸臣宜奉行恐後者也願臣謂督撫皆封

疆大臣原以提衡文武綏保小民如將吏奉法百姓莫安卽是督撫之功倘貪惡不除疾苦不聞卽是督撫之過今

聖主日焦勞於上百姓日愁歎於下復以采風問俗仰煩

廷遣則督撫中固多負過之人矣及聞巡方一出勢必倉皇失措巧事彌縫恐一番振刷止取塗飾於目前而於吏治民生仍無裨補也臣謂

皇上宜立頒諭旨刻定限期責成諸督撫將文武

大小各官貪廉善惡及民間疾苦逐一列狀上
聞真善真廉何人可受上賞大貪大惡何人宜伏
重誅疾苦何事最先今以何法拯救不得寬大吏
而嚴小吏不得舍實事而驚虛聲不得忘久大之
興除而補苴近細如是則遙遠之情狀十得四五
矣因是分別督撫之職掌申明戰守之功罪詳畫
勦撫之機宜但以地方寧謐百姓息肩爲期舍是
卽爲溺職如是則遙遠之情狀十得八九矣不出
數月之閒而督撫奏報旣已犁然

皇上於滿漢廷臣中擇其通達

國體周知民隱者閒一差遣覆行其稽覈如督撫
虛文塞責卽以重法繩之行之一二處而天下聞
風莫不震聳此循名責實之道也蓋稍寬歲月所
以展布其手足嚴立程限所以實課其功能庶巡
行不徒文具耳要之察吏安民之事非知之難惟
行之難知而能行則萬里之外凜然奉法猶之几
席也其本在乎振紀綱明賞罰而已如近者

畿輔各州縣悖

旨私徵從前督撫諸臣漫無覺察倘

明旨不一詰責何以悚玩惕之心松江貪守盧士
俊卷墨未乾今且公行奏辯妄冀燃灰倘此風不
一禁戢何以杜紛囂之口是皆大紀大法所係臣
從吏治民生起見又不能默默已者統乞

聖明飭勵施行奉

聖旨已有旨了該部知道

鄭親王遵 旨會議疏

聖旨朕念近來吏治敝壞民生困苦夢寐不甯故
欲特遣滿漢大臣巡察文武貪廉軍民利病庶幾
從新整頓可望太平朕又念奉差官員隨帶員役
馬騾廩糧草料勢難缺少直省地方頻年水旱供
億艱難未免擾累姑暫行停止各該督撫已經考
核者宜倍加砥礪新蒙簡用者務實心料理副朕
察吏安民至意如仍前因循蒙蔽一經發覺國法
具在斷不輕饒

推明 恩詔疏

伏睹

欽頒恩詔大仁翔洽海內欣邁太平復飭地方官
實心奉行而以糾叅責部院臣職在稽核敢不舉
切要申明之如

恩詔內山林隱逸有懷才抱德通達治體者該督
撫覈實舉薦

皇上親加試用此古帝王旁求俊乂之盛治也顧
督撫亦曾經薦舉不乏名流或以

音立...
本朝註誤或以前朝罪廢或以到部違限遂置弗錄在部臣固慎重名器而

朝廷宜愛惜人才況今

皇上臨軒選用又與該部酌核不同自當蒐采無遺仰承

闢門之衡鑑應否

勅該督撫於從前薦舉未用諸臣中再爲精覈擇其才品尤著者與續薦諸臣一體開列用備聖明親試此不得不請明以便奉行者也如

恩詔內自順治十一年六月二十二日昧爽以前
官吏兵民人等犯十惡等真正死罪不赦外其隱
匿滿洲逃人及貪官衙憲受贓監守自盜領運官
役侵盜漕糧併順治九年十一月二十三日在衛
州府擊賊有罪諸人亦在不赦其餘罪無大小已
發覺未發覺已結正未結正咸赦除之此古帝王
解網泣罪之深仁也內外問刑衙門自當恪遵恐
後共幾刑措之風內惟隱匿逃人一項罪應流徙
遵

詔不赦外而此外有罪至流徙不係隱匿逃人者
既不在不赦之列應否并邀

浩蕩之恩倘以事關重大未便輕豁該部亦宜開
列所犯情由仰憑

聖慈酌定此不得不請明以便奉行者也如

恩詔內內外文武官員除大計處分城池失守外
有因公事註誤者降革奪俸等項悉與奏明寬宥
此古帝王憐才宥過之盛心也內外各衙門念人
才之難得思災眚之可原自當力矢公平刻期具

奏內如言官因建言得罪風節彰聞及公事牽累
審諤素著者自當備查居官建白亟爲申雪以示
鞫鐸之不遺其或因言事左遷未還故物者亦須
分別優轉不得與泛常緣事者同日而論俸資庶
竭讜抒忠爭相奮勵此不得不請明以便奉行者
也如

恩詔內積穀備荒誠

王政之首務而有司奉行不善或指稱科歛折入
私囊或借口勸輸派僉大戶宜垂厲禁以杜侵貪

仍載入考成嚴分殿最此不得不請明以便奉行者也如

恩詔內開墾荒蕪誠小民所利賴而有司奉行不善或捏報虛數槩令熟地包賠是以墾荒而暗行加派也或地成熟仍歸官豪侵據是有慮始而無與樂成也宜垂厲禁以鼓農功仍實課成勞用昭勸戒此不得不請明以便奉行者也如

恩詔內設兵原以衛民而今乃肆害無窮至責各弁以分肥責督撫以紀律既已

洞燭萬里矣顧兵勢分之則弱合之則強分之則零星剽劫止以害民合之則壁壘精堅足以禦賊謂宜於各處額設之兵歸併險要扼防不許分派無事地方徒恣擾掠該督撫畱心整頓務令緩急有資此不得不請明以便奉行者也凡此皆就聖恩所已及再一推明仰祈

立渙德音裁其可否俾免停滯之虞抑臣思從前恩詔之不實行由於課督之無定限今

皇上旣循名責實豈宜仍聽稽延在內衙門應限

三月內在外督撫應俱限至歲終各將行過
恩詔事宜逐一開列奏報如寢閣不行及虛文塞
責臣等部院遵

詔糾叅上請

聖裁處分庶人心警惕而天下咸被

堯舜之澤矣事關條奏字稍踰格併祈

聖明鑒宥施行奉

聖旨這本內事宜該部詳確議奏

特糾不職臺員疏

竊照御史一官在內則司糾彈在外則司巡察必
身正乃能正人未有貪污闖尤可以勝任愉快者
今巡方雖經止息而賢不肖漫無別白非惟於澄
清吏治之典不光亦恐賢者有薰蕕同器之歎臣
既奉實圖振飭以肅風紀之

旨安敢復避嫌怨不一直陳於

聖明之前乎除覆查未結耳目未確不敢遽及外
謹以見聞有據者先言之其一爲原任浙江巡按

御史石應泰居官狼籍曠有煩言一切造款嚇詐
專倚杭州知府祖龍同知王辰爲心腹今二人貪
墨敗露俱挂督撫彈章矣巡方所首革者承差也
而應泰則仍收蠹役張廷達王益生等以充爪牙
巡方所嚴禁者指訪索贓也而應泰則遍拿訪犯
何光甫蔣奇甫等以恣谿壑巡方所最重者舉劾
也而應泰因索史宏謨等未能滿慾竟列糾參至
於搜括贖銀催提絡繹奉

旨止息之後駐省兩月不行士民爭懷怨憤匿名

逐帖遍滿通衢尤彰彰在人耳目似此貪黷豈可
借一調用爲解免之地乎所當

勅下該督撫逐一嚴查據實上

聞以憑追究者也其一爲止息御史朱虛本官自
入臺班未聞侃侃建白者何事前任衡水時因五
年水災流免七年錢糧其悖

旨混徵至五千四百餘兩之多茫無著落見今奉
旨察究追擬似此昏昧旣已溺職於有司豈可復
濫名於風憲卽監司旬宣一路亦安望其剔弊釐

奸乎所當

勅下該部亟爲議處以無玷班行者也臣非不知
臺員寥落之時正宜鼓舞培養不當過爲摧折然
竊痛今日民窮財盡法玩吏貪非御史之官盡負
皇上也而人之不肖往往自負其官遂覺驄繡盈
庭無一堪供

任使者臣誠爲諸臣負媿翦除蝥蠹正以扶植嘉
禾是在

聖明之飭勵耳奉

聖旨這所叅石應泰朱虛事情著確查議奏該部知道

11-11-11 11-11-11 11-11-11

請止議裁刑官疏

竊照推官之設原以推問刑名故其名曰司理蓋以理闔郡之刑獄而持其平也民命至重責成不得不專法紀相維設官不得不備所以一郡之內有知府總領於上州縣丞流於下簿書錢穀以及城池備禦諸務自大至細職業最爲浩繁因而設同知以司清軍設通判以司糧捕至於刑名之事則獨屬之推官一切欽件大獄出入平反未有不經由此官而可以定

案者非特慎讞鞫之任使物無含冤正以明守令之職使事有專屬也况我

皇上明德慎罰屢頒

諭旨惟恐一夫枉濫上下

天和雖目前巡方暫撤而按察司原號外臺秉憲持平在此時尤爲特重使無推官以分任其責則臬司之耳目何由逐處周詳而案牘之奉行安能刻期完報且恤刑各官見蒙

欽遣所至之地尤必須刑官專精贊理乃克奉揚

解網之仁今科臣以其有損於

國計民生首議裁汰感憤陳言固自有見但臣竊謂自古有治人無治法止當就官以核人不宜因人以廢官使推官閒有不肖卽須裁去此官則是督撫不肖遂裁督撫道府有司不肖并裁道府有司天下幾無官守法紀一切蕩然吏治民生不知所底止矣卽如官評一事以推官爲不足信彼督撫司道見聞闊遠無從叅互稽詢必將寄其權於吏胥承舍衙蠹市猾之口而後可其所繫又豈細

故哉臣謂

朝廷之上亟須明布賞罰振舉紀綱
申諭督撫諸臣嚴飭各推官確覈
連坐之法盡破情面勿踵贓款卻
大奸巨惡並力芟除廳臺之狐假
凡科臣所陳諸弊一一畱心體察
其或不悛飛參重治從此人心震
見有官之利而不見設官之害則
允庶務不苦於紛更於以上佐

欽恤之

聖慈非淺鮮也臣叨列法司職掌相關輒爲陳其
管見惟

聖明採察施行奉

聖旨著一併議奏該部知道

1911

因災變條上七事疏

頃者秦撫以地震告綿亘千里動搖至數十次城
屋傾圯人民損傷災異甚重

皇上惻然憫念期與內外大小臣工共圖修省務
弭災變此自古聖帝明王克謹天戒之盛心也顧
災異之來上天所以仁愛人君示之譴告在乎修
德以勝之而已漢臣李尋曰關東地數震宜務崇
陽抑陰以救其咎固志建威閉絕私路拔進英雋
退不任職以強本朝漢元帝時地大震於隴西詔

吏虛倉廩開府藏賑救貧民令羣司茂思天地之
戒蠲除減省以便萬姓在昔君臣交儆往往深切
著明我

皇上乘乾首出邁越百王旣爲

帝眷所篤鍾尤宜昭格而無間况三秦重地河山
四塞夙稱險固連年兵燹頻仍間閭凋敝伏莽方
張於山谷師徒久困於轉輸遘茲震撼之災彌切
綢繆之慮輒以一得仰佐

宵衣惟

聖明留神省察一曰修敬天之本夫敬天之本君德爲先古大臣之告其君曰學於古訓乃有獲又曰君子所其無逸誠以人君一身繫宗廟社稷之重爲天地臣民之主不可不慎也

皇上英明仁聖事事以堯舜爲法固已克明峻德矣而臣尤願操持勿失者則惟好學勤政以端化理之原親賢養民以握教甯之要舉一事必深思四方治亂之關用一人必期貽子孫黎民之福發一詔令必規模宏遠確如典謨之可守而信若四

時之不移以及側身修行敬天之怒亦必倣古昔
避殿撤樂下詔責躬之意朝夕祇懼罔有弗虔於
以息事甯人敬奉

天變億萬年有道之長始基之矣一日明輔弼之
任密勿大臣有論道經邦變理陰陽之責啟沃謀
斷何事不貴匡持倘以救過畏罪之心施之獻可
替否之際遇事不獲盡其言有言不克見諸事咫
尺之地扞格難通恐非賢者所以自處亦非
聖明委任責成至意也請

勅諸臣公忠互砥視

國如家凡言官條奏六曹覆議一切用人行政大利大害所在務於擬票之頃明白剖決勿事遊移其必須商確行止者略倣昔時閣揭之制或隨事以規正或合力以開陳使天下共睹其建明

聖鑒亦無憂於睽隔積誠納牖嘉謀日伸

皇上復不時召見諮詢民隱講求治道令諸臣各畢其所長因以察知心術之公私與職業之稱否庶明良喜起不徒修晝日三接之文而政本得人

萬事可就理也一日酌銓敘之法致治之道急在用人盛世野無遺賢朝無倖位則以衡鑒各當而四海獲均也今銓司大小陞除必以品級考爲準其書不經僉議不奉

欽頌未知始於何年輒令一代人才視此書爲進退中間詳畧因革無從考稽卽有窒礙參差誰爲駁正銓臣雖自矢公平條例必求歸至當乞

勅該部將品級考一書會同內院九卿詹事科道諸臣詳加酌訂務成畫一之規進呈

御覽請

旨頒行庶足以杜紛紜而垂久遠也督撫身膺節鉞關係封疆必擇威望素著之人乃克肩鴻任鉅近見冢臣於會推之頃往往自歎乏才蓋老謀壯事原未易得之一朝拾級循資又未必遽堪勝任多方儲養悉力講求使中外人才常足備緩急之用似亦今日之急務矣一曰責考課之效人臣位至九列寵遇已隆必竭奉公體國之猷乃能收正己率屬之益今盈

廷濟濟固多正色立

朝之臣而臣所竊效他山者則願競奮功能盡懷
蹇諤勿以容默爲謹厚勿以闒冗爲寬平勿徒優
遊持祿而付職守於罔聞勿當集議

廟堂而置是非於緘口

皇上時垂宣召特賜考詢則諸臣之能事見矣至
六曹政事各有司存倘悠忽之與精勤漫無別白
誠恐因循成習叢脞必多亦宜

勅堂上官嚴爲督勵擇賢能不肖之尤者時一請

旨勸懲破格賞罰庶幾羣心鼓舞綱舉目張一日
恤小民之困四方水旱災荒連年見告流亡滿目
既已不忍睹聞今復北地之水巨浸連天南方之
旱赤地千里窮民無所得食不轉死溝壑則起而
爲盜孰非耕桑之赤子安容坐視其凋殘況饑寒
既迫之於前賦歛復驅之於後民空有骨何計誅
求死且甘心甯容敲撲司農仰屋而太息有司束
手而無何不意

開創之初

國計民生一時困敝至於此極書云民爲邦本本固邦甯小民之情狀如斯

天意之災禍未已堯湯咨敝必宜盡人事以力圖挽回乞

勅督撫諸臣各體時艱早商長策務如救焚拯溺必令全活有資而至於生節之大道常平之良法尤宜及時綜理以廣儲蓄在計部諸臣當亟加之意耳一曰核武備之實

國家歲賦登於版曹者二千萬而諸路養兵之費

則已多至一千三百五十萬餉既如此兵宜足用
乃地方一有警急動輒徵請大兵以百姓血盡髓
枯之錢糧剝肉補瘡養無用之戍卒而又以
朝廷居重馭輕之禁旅涉江踰嶺代戰守於遠方
爲計之左無踰於此今宜

勅各督撫實實從頭整頓日討軍實而申儆之虛
冒幾何亟爲清覈老弱幾何亟爲汰換器甲何件
朽鈍當并力繕修將弁何人駑庸當及時更置江
海急需之戰艦刻期料理使賊踪勿逞於飄風楚

沅缺額之積習極意掃除使壁壘一新於朝氣逃
潰必明章大法侵剋必立正刑誅久之各地方兵
力漸厚備禦日堅小醜旣不克長驅

王師亦無煩屢發是固安攘之要著不獨支撐目
前也一日闢諫諍之路自古人君遇災而懼必下
詔廣求直言極諫之士凡以言路者朝廷之耳目
公論者國家之元氣懸鞞設鐸所以防壅蔽而通
下情也去年初夏旱魃爲災

皇上亦會詔諭羣臣言事今地震之變更異往時

顧可任大小臣工泄泄祖之乎乞

勅九卿臺諫諸臣共念

天命之艱難恪體

聖衷之乾惕於

國家利病民生休戚逐一條列上

聞忠讜可採者立見施行卽狂愚無當者亦槩寬
譴責庶幾人思獻納而達聰明日益昭從諫之休
風矣以上各款皆就修省弭災之

明旨竊效芻蕘字稍踰格伏乞

聖明鑒宥施行奉

聖旨這奏內七款俱係奉有明旨曾經議定久見
施行者龔鼎孳沽名瀆陳其心必有意見著照款
具七本明白指實奏來該衙門知道

明白回奏第一款疏

臣因秦省地震條上七事奉

聖旨這奏內七款俱係奉有明旨曾經議定久見
施行者龔鼎孳沽名瀆陳其心必有意見著照款
具七本明白指實奏來該衙門知道欽此臣跪誦

繪音感悚交集仰見我

皇上天地之大山谷之虛臣敢不明白指陳上副
明問乎臣疏第一款曰修敬天之本誠以人君爲
上帝之元子格天弭變道莫有先於修德者在昔
唐虞之世君明臣良治化可云極盛而其一堂之
上動色告戒率多吁咈匡弼之言况當

開天出治之時可無憂盛危明之慮今災變甫昭
仁愛而修省旋

詔臣工

音學正字卷之二
聖明之克謹

天戒固已度越千古但修省貴求實事憂勤必握
永圖故臣願

皇上好學勤政親賢養民一切舉事用人發號施
令務期克當

天心而又震悚不甯昭事無閒

聖德已備而加勉學古有獲而彌勤宋臣真德秀
曰惟學可以養此心惟敬可以存此心惟親近君
子可以維持此心臣區區之愚惟望我

皇上治理日新休徵畢集凝承

天命於億萬斯年而已

明白回奏第二款疏

臣所謂明輔弼之任者誠以內院大臣朝夕

左右最爲親密漢世每遇災變三公必引咎不遑
誠以燮理陰陽其任獨重使能體

皇上兢業之心先事啟沃臨事匡持則天下之福
大臣之所當自勉也使其忽

上天譴告之意工於救過習於遊移則非

國家之利大臣之所當深戒也況我

皇上推誠委任禮遇優崇何事不可收納約之效
倘猶因仍積習表豎罔聞豈不負

聖明圖治之虛懷昧陳力就列之大義乎卽如任
事最久受

恩最深莫踰於大學士馮銓矣乃前見

天語煌煌旣責其尺寸靡效罪過頗多又謂其於
國事

聖躬仍無補益使諸臣尤而效之亦何能開誠布

公著匡贊太平之業哉但稟擬關係

密勿非如諸曹之有事可指有疏可查但以隨時
糾正故欲諸臣各效建明使在

廷共知其心術而尤願

皇上畱神體察以公私之辨定用舍之衡是則臣
耿耿愚忠不避怨嫌特所

聖鑒者也奉

聖旨馮銓累過累宥屢旨甚明馮銓若有隱罪龔
鼎孳先宜指叅何得責令同奏始引馮銓搪塞甚

是無謂奏內云密勿票擬不得察糾非如諸曹有事可指旣言諸曹有事可指卽當明言無諱以抒忠悃該部知道

明白回奏第三款疏

臣所謂酌銓敘之法者蓋致治以用人爲急用人以立法爲先今品級考一書詳畧參差未聞畫一有同一官也而陞遷之格大小懸殊同一陞也而內外之銜紛紜並列旣無循資序俸之辨又無賢愚能否之分卽如太僕寺丞一缺有自科道詞林

降補者有由國學兵馬陞入者有陞通政叅議者
又有轉光祿寺丞者此其參差者一也各部郎中
員外等官品級考所載可陞京卿可陞道府而部
覆科臣之疏則云五部司官陞轉俱有近例遵行
已久夫所云近例者戶刑工三部司官止陞知府
之例又與品級考不侔矣此其參差者二也要之
此書未經公同酌定特請

欽頒外廷旣不詳知當否無從駁正卽蒙臣向臣
言亦謂亟宜釐改不知何故尙爾因循故臣願

皇上勅下廷臣詳加酌議請

旨頒行不獨杜紛紜亦以塞私竇也四方初定督撫需人講求儲養固以重巖疆節鉞之才且足塞破甑營求之路是在

皇上一申儆之耳

明白回奏第四款疏

臣所謂責考課之效者以九列大臣分猷佐理委任已崇使盡人爭效功能則庶務何憂叢脞每見諸漢臣於會議會推之時是非可否往往付之不

言誠恐循默之風化爲頽靡蓋相習已久不止一人一事必得

聖明振起乃能煥然改觀故臣有

宣召考詢之請蓋欲

皇上不時稽核才品分別澄敘使諸臣凜奉

勵精圖治之意共矢擔當無徒以持祿保位爲得計耳至六部司屬雖煩簡不同而所司者皆

朝廷之大政果其實心任職或執爭某大事或伸理某冤獄或摘發某奸弊并成績彰明公論推服者

許堂上官特疏奏薦破格以異以示鼓舞而闡允
不肖之尤者不時叅處用言情竄是固綜覈名實
之道也

明白回奏第五款疏

臣所謂恤小民之困者實見頻年以來水旱相仍
兵戈未息民窮盜起在在可憂故請

勅督撫諸臣早商長策而以荒政之修舉定有司
之殿最如監司守令中果有招撫流移開墾荒地
修復常平義倉勸募出粟賑貸使饑民全活者該

督撫據實奏

聞比照卓異之例破格敘錄其或虛文塞責置民瘼於度外卽爲立叅重懲近

恩詔已及備荒而賞罰尙無成格應

勅該部亟爲酌定者也顧百姓所望者蠲賑而

國家所急者軍需必當通盤打算經畫長久如見在興屯地方應量子粒之入減除荒額其設兵永鎮之處亦須查就近荒田倣古人兵屯遺制更番耕戰以省餽餉之勞如核兵所以清餉而武弁太

允既能糜餉又復佔兵宜量地緩急斟酌裁併省
無用之費以養有用之兵如各省數百萬積逋宜
設法清追刻期報部卽爲撥補該省餉額但不得
將官吏侵欺之數重累小民所當。

勅下戶兵二部悉心講求共圖生節者也

明白回奏第六款疏

臣所謂核武備之實者以近日餉非不足而兵伍
究苦單虛由於稽核之未精簡練之無素如蘇松
海寇突至而隨總兵出禦者僅數十人載在塘報

可按也湖廣偏沅二撫之兵缺額至兩倍新撫報
疏可查也湖南之望風奔潰宣餉之侵尅朋分積
玩已淡未聞振聳所以壁壘盡成兒戲而有急輒
請大兵內旣勞於奔馳外復疲於供億故臣欲
勅各督撫從頭整頓務改舊觀使缺額必補老弱
必汰易朽鈍爲精銳易庸駑爲尅桓而
廟堂之上又操安攘大計之根本
皇上誠信賞必罰一省年來之錮習使萬里外凜
然惕心目前軍政肇行尤宜

嚴勅該部秉公釐剔勿徒視爲具文卽以此定在
事諸臣之優劣可也

明白回奏第七款疏

臣所謂闢諫諍之路者蓋以自古帝王如大舜之
舍己從人成湯之從諫弗咈皆集糾繩之益以廣
聽納之公况遇災求言載在往史不一而足秦地
山河險固西北奧區寇變以來瘡痍甫息而興安
伏莽又見震驚未雨綢繆所關不細至湖南之逆
孽尙爾逋誅海上之遊魂未聞解甲欲富強之立

奏與仁義而兼施不有讜言何資補救我

皇上虛懷受諫每每曲示優容而九卿臺諫諸臣
目睹時艱尙未有慷慨瀝陳贊明廷之大計者臣
故願

皇上特下求言之

詔務期切實條奏可見施行宥其狂愚採其誠悃
亦弭患救災之一助也至微臣特蒙
簡拔自矢知無不言方欲奉

聖心之大公以消諸臣之私意秉

皇極之大同以化諸臣之我見安敢復置意見於
其間哉欣逢

堯舜之君長沛治平之澤使

朝廷日彰盛美而臣子亦得免竊祿苟容之名是
則臣之心耳奉

聖旨朕日望太平思得更張振刷之道以謝

天譴竟不見一人破拘攣革情面者龔鼎孳簡置
總憲卽宜慨陳更張振刷之長策以副委任今仍
瞻前顧後藏頭露尾厯觀七奏皆同瞽史之言雖

埋有隱意實難摸索大非眞誠進言之體本當議處以做做習姑念歷任未久饒過這一遭倘有言官進言不實的每每不罪是朕急欲開讜言之心何嘗有阻塞言路之意該部知道

龔端毅公奏疏

男士稚孫

志爽續祖

曾孫

曾懿曾憲

授梓

曾恕

曾聰曾愬

卷三

順治

甲午十月起
辛丑五月止

江海怯防乞嚴加責成疏

今春海寇張名振突犯崇明鎮江等處未幾復揚帆而去賊踪飄忽蓄謀叵測秋冬之際尤易狂逞如去年已事可鑒也江海險要等處必須在在扼

防督撫鎮道等官必宜人人鼓勵造船製器練習水兵等事必當刻刻整頓晝夜不遑而又聯絡聲援互為犄角倘再來入犯必得一番大創使之膽落方可以破勾連之計消窺伺之心今浙閩江南總漕三督臣一時俱經交代新督縱叱馭就道勢難旦夕卽至而解任諸臣或以謝事有期一應防勦機宜逡巡以待後人萬一寇逼門庭為憂非細雖亦奉有料理候代之

旨然必須奮起精神在地方一日卽實做一日之

事庶幾將吏警惕不生玩心且馬國柱今春往來江上勦撫著勞而沈文奎復蕩平海逆方奏戰功二臣駕輕就熟尙堪鼓舞與劉清泰之久經卧病者不同伏乞

皇上嚴加飭勵務令上緊辦賊新督一刻未至舊督一刻未容息肩如或分心弛擔因循貽誤斷難以解任之故寬其處分倘辦賊著效功在封疆皇上亦必以桑榆之收不吝酬勸之典也抑臣更有請者東南重地寇氛未寧一切防勦事務必須

有呼立應乃可以責成功如近日工部覆江寧撫
臣周國佐修理戰艦一疏既稱向來南部修船錢
糧及贓罰一項俱歸戶部卽宜悉心打算會商長
策而又欲從本省搜括令該撫具題請

旨往返耽延徒費時日今後凡事關禦賊者該部
裁其可否確爲題覆必令切實奉行勿作遊移之
詞致生推諉亦振刷羣心之一策也伏惟

聖明採擇申諭施行奉

聖旨總防江海事宜著馬國柱等盡心料理不得

誤卸貽誤修理戰艦已有旨了該部知道

--	--	--	--	--	--	--	--	--	--

敬陳民困疏

臣恭聆

詔諭拳拳以民生不安爲念而引咎責躬

布赦罪宥過之令一時聞者無不感泣古帝王下
車解網澤及天下率由是道也顧有罪之官民尙
得均沾

浩蕩而無辜之赤子何忍坐視死亡卽如

畿輔之民圈佔以後田廬蕩然年來水澇頻仍道
殫相望近以逃人衆多立法不得不嚴而有司奉

行未善使轉徙者竟無所歸督臣李廕祖繪圖入
告

皇上已惻然動心今聞山東一帶流民復千百成
羣攜男挈女蟻聚河干望救無門逃生無路當此
嚴風密霰墮指裂膚之時此輩衣不掩脛食不充
腹流離溝壑甘心待死而不忍遽爲盜賊此

皇上之良民實可憫也萬一愚冥無知不肯束手
就斃一旦良民化而爲亂民卽發兵勦除亦非難
事而使數萬生靈頓作刀頭之鬼究其所自亦止

是無衣無食茫無投奔之百姓耳興師動衆煩費何堪而況走險之民不可勝誅又誰辦耕而課織乎其實終可憫也

皇上於刑獄重罪再三詳慎惟恐一夫或冤頃且軫念

皇城內幼男穉女母子搬移之苦不憚勞

萬乘之尊躬冒霜露以全民之生顧令此顛連無告之人爲良民而求生不得爲亂民而速死無名當亦

聖心之所躊躇痛惜者矣伏祈

勅下戶部滿漢諸臣悉心區畫刻日講求以急救
今日民生爲第一義或廣集

廷議各抒所見務令見在饑寒之民何以生活各
處流移之衆何所依歸其招撫流民與窩隱逃人
之法兩相妨礙者何以變通盡善必使有司無畏
罪之念然後百姓有可生之塗必使富民無牽累
之憂然後窮民有手援之望救焚拯溺爭在須臾
恐文移往返戶籍稽查終不足以起死人而肉白

骨也側聞

詔諭從前窩隱未結之罪咸荷

寬恩民間已曠然甦息而竊慮向後之奉行尙煩
皇衷之矜恤既可槩宥之於犯罪之後又何難稍
慎之於議罪之初傳曰有人此有土有土此有財
自古帝王未有不以康奠民生爲久安長治之本
計者是在

皇仁一推廣間耳至於地方有司招撫流移必須
明立賞罰分別大小中州縣爲三等各安插若干

過額者作何優敘不及格者作何劄懲勿僅僅以
紀錄罰俸定功罪而好義之紳衿百姓亦須廣開
功名之路鼓其樂趨之心此又在計臣詳晰條列
務使畫一遵守者也臣竄從天下安危起見不敢
不畢其愚伏祈

勅部議覆施行奉

聖旨龔鼎孳身為言官果有確見卽當明白指陳
這本請廣集廷議各抒所見爾之所見何不先言
著確實明白速奏該衙門知道

明白具奏疏

臣於本月十七日具有感誦

皇仁敬陳民困一疏奉

旨龔鼎孳身爲言官果有確見卽當明白指陳這
本請廣集廷議各抒所見爾之所見何不先言著
確實明白速奏該衙門知道欽此仰見

皇上虛懷詢訪不遺葑菲之至意臣敢不以所見
先言之竊思百姓之流離總由於道府有司撫綏
之無術蓋其平日精神盡用之於詞訟徵比及一

切不急之務原未嘗有愛養小民之真心而又無
良法以稽查逃人徒將流亡失所之民盡行驅逐
以故顛連轉徙日積日多臣謂流民之與逃人易
相溷雜者以其散處而便於作姦也今若令所到
之地有司卽擇空閑公所及寬敞寺院數處將流
民盡數屯聚其中擇該地方員役之謹練者分董
其事編列姓名一如保甲隊伍之制令其互相認
識互相稽查不許零星四散或東或西使民間旣
不便容畱而有司亦難施約束如其安置得當仍

做

京師五城賑粥之例地方官每日親至其處詳悉經理既動之以周恤之惠又怵之以連坐之條誰無人心甘爲容隱是則於賑濟流民之中并寓稽察逃人之法道府有司奉行有效卽爲破格陞遷此一策也近

畿流民旣無所歸總逃往山東河南一帶而山東河南皆有興屯道廳碁布於州縣之間合無卽令屯道屯廳隨在招集亦做保甲隊伍之制令其自

爲邨落自相保聚仍量給屯本以資農具如此則
拋家失業之衆皆可化爲耕田鑿井之民而招撫
流移與開墾荒田合爲一事正農政之大者果能
安插得法道廳亦破格陞遷此一策也顧賑給之
費盡取之於公家則物力有時而絀臣思必大破
常格鼓舞樂輸乃爲有濟合無明立賞格各地方
紳士商民有好義急公者或銀或米隨數輸之於
官銀至數千兩米至數千石者作何錄用其或以
千計及數百數十計者俱作何分別敘錄該部詳

爲條列畫一通行務使人人踴躍爭趨恐後而樂輸之外一切收養安插之事悉聽官爲綜理紳士毫不與聞如此則有收恤之實無收恤之累此又一策也以上臣之所見不過一得之愚未必施行盡善故欲廣集

廷議共商長策擇其至當者而從之無非仰體我皇上愛民之心有加無已不敢執一己之見而負如傷若保之

仁也謹據實回奏字稍逾額統祈

鑒宥奉

聖旨本內安插流民稽查逃人事宜著九卿詹事科道等官詳議具奏該部知道龔鼎孳既有所見何待責令明奏方行條列著飭行

敬陳治平八事疏

皇上憂勤圖治遍責臣工言事臣忝爲御史之長
待

皇上求之而後應則其言已晚然又安敢隱默不
言乎除一二管見與滿漢諸臣公疏條奏外謹以
未盡愚悃爲

皇上陳之一曰酌會議夫國有大事始下廷臣集
議此古者詢謀僉同之意也漢時博士議郎往往
抗大議於公卿論難之時不少隱避其時風節近

古如賈誼汲黯輩皆能寡淡過計正色立言故國勢日尊而主權日振今諸臣每遇會議宰相顧蓄縮不發一言迨議成上奏

皇上必以爲廷議之公而豈知集議之時人人推諉事事瞻顧哉臣謂宜畧倣前代之制凡有

廷議九卿詹事等衙門具一議單掌科掌道各具一議單其或意見不同者仍聽自爲一議務須直切詳明便於

省覽該承行衙門一竝開列上請

鑒裁如此則議論之公私邪正與政治之得失是非兼聽竝觀總莫逃於

睿照而諸臣諉卸之習頓除於以仰副

皇上擔大事發正言之論此其大端矣一日信

詔令伏讀順治八年二月十八日

上傳云莊頭投充人等不守法度罔顧尊卑目中既無官府何況小民欺凌魚肉不問可知八年七月初一日

上傳又云帝王以天下爲家豈有厚視投充薄待

編氓之理今後各地方官如遇投充之人犯罪與屬民一體從公究治

天語煌煌萬世所宜遵守乃近年以來責治投充又復有禁是天下有

王法不加之民矣伏讀八年三月十六日

上傳云巡方御史果能一遵禁約自然公生明廉生威地方利弊民生疾苦必能上聞大小官吏必能肅清乃未幾不行甄別槩從止息是天下有賢否不辨之官矣薦舉地方人才考核酌用此進賢

之

盛典也而到部之期少分先後遂不論才品槩錮以觀望之名矣窩逃審理未結咸與寬釋此宥罪之

大仁也乃頒

詔之使未出

國門而督捕兩請旋奉有飭行之

旨矣朝令夕更奉行鮮效所宜明示畫一以重

渙汗之德音者也一曰嚴江防去春海寇入犯直

抵瓜儀焚燒鹽船飽颺而去臣愚過計謂冬春之際賊必再來請

勅在事諸臣盡心料理今聞賊船又過京口騷掠天寧洲一帶忽來忽往如入無人之境窺伺旣熟狡謀益深目今漕艘開兌時一線咽喉豈宜中梗且當

開創之初布昭神武四征不庭而堂奧腹心之地小醜連翩出沒無忌亦非所以示萬方也臣思承平無事江防尙不可不嚴故舊設有文武操江及

上下巡江御史以備禦緩急況今海氛正逼攻守
尤難隙疎操臣李日芄精練嚴明事事實做但以
安徽巡撫事務分身兼攝未免鞭長不及之憂合
無仍照舊制另推皖撫而移操臣駐劄鎮江重其
事權控扼江海一應練習水兵製造戰船等事悉
聽專精辦理與提督鎮臣互爲犄角自此壁壘精
堅凡江海要害之處無隙可乘賊必望而卻走矣
一曰勸農政今兵民交困由於蓄積寡乏而食用
不充也興屯之制道廳碁設率多有名無實或反

因之爲害臣思責效於屯官不如聽民自爲屯有
鼓舞趨事之樂漢時募民耕塞下賜以爵級近例
招民百人赴遼陽屯種卽予以實授之官獨不可
稍倣其意廣行之於腹內之地乎今宜明立賞格
凡力開墾荒田者聽其自認耕種待成熟之後督
撫核實奏

聞照頃數之多寡酌爵秩之高下卽行酬敘用示
招徠則人皆踴躍從事而野無曠土矣漢太始秋
旱募死罪人贖錢五十萬減死一等唐元和中韓

重華爲營田使亦行贖罪墾田之法今

朝廷赦宥屢下而犯法滋多與其一槩蠲除徒開
僥倖之門何如稍從寬減實收屯種之益也伏讀
順治十一年六月二十二日

恩詔令各地方官興復常平預備義社等倉并修
水利墾荒田諸事實於救災有濟今爲時已久尙
未報

聞宜

勅各督撫刻期舉行務臻成效至關外土肥地廣

旗下官民有能募人屯種者亦照所墾多寡分別旌勸又何患無三年九年之儲也一曰儲人才自古致治之要莫大於求才而執簿呼名亦實非講求人才之道也故內而京堂外而督撫往往人不稱官今欲爲儲養京堂之法則莫如慎重考選舊制科道吏部員缺於在京在外資俸相應各官預發訪單令九卿科道諸臣詳註鄉評官評推服無聞者乃得與清華之列以故人知自愛畏清議而重名節磨礪旣久名卿碩輔多出其中今宜仍倣

此制參互稽詢不徒以文藝定取舍則考選之法
重而京堂無不足之才矣欲爲儲養督撫之法莫
如慎選邊地監司今兵荒險遠之區往往人不樂
赴謂宜擇其才氣卓越者倣昔時邊才之意破格
陞除或著有戰守勞能卽爲減俸優擢使其功名
常在入先如是則人思自奮無苦樂不均之嗟練
習旣淡畀以節鉞精采必有可觀而督撫無不足
之才矣人才不易得得之尤貴寶惜培養勿以一
眚掩其生平如郝浴之鋪張過當而罹嚴譴吉永

迫之抗爭試差而致降謫罪雖自取才亦堪憐天下類此者正恐不乏所貴乎講求之豫耳一日核吏治有司之能否關百姓之安危必其人地相宜乃能奏撫循之績今繁鉅之地錢穀刑名最難整頓者往往以衰庸充數坐席未暖旋挂彈章豈惟新舊更置貽誤地方抑使小節偏才盡成摧折臣思調繁調簡舊制原有可循該督撫爲地擇人因才位置此法自不宜廢近年部議格而不行蓋恐權移於外操或有徇私妨公之弊耳以臣之愚謂

銓選之初才品高下與年力盛衰原可十得四五
自昔身言書判卽所以衡量羣才合無於選司投
供之時察其年富力強才姿英茂者註以堪任繁
劇年力才具平等者註以止堪簡僻過堂之日滿
漢堂上官再爲逐一稽核果其品題各當卽分別
繁簡二簽筒從公掣授如此則科甲鄉貢資格可
以不分而長短偏全人地約畧相稱於遴才之中
不廢秉公之法似亦簡便易行之事也至湖南兩
廣四川各官宜聽經畧與督臣就近酌用不必仍

從部選以省懸缺待人之煩庶地方與人才不至
兩誤矣一曰甦積累古聖王之政罪人不孥後世
始有收孥之令今各地方入官人口僉解則擾及
親族里甲沿途則糜費舟車口糧中道每多病斃
及解至該部變價無幾徒累小民臣備員佐計時
目擊最爲詳悉今後直省各地方遇有入官人口
似宜著落該撫就近變價如不從公估變短少隱
漏者聽該部參處是則旣不廢

朝廷籍沒之法更可杜小民株累之苦似亦兩便

之計也至若

欽賊叛追爲害最大衙蠹望屋而食人小民吞聲而無告尤宜嚴行禁戢以共承

休養生息之仁一曰清逋賦

國家養兵之需莫急於錢糧今各項積欠盈千累萬孰非民膏豈容中飽臣已於公疏詳言之矣顧追逋之法先須分別官民倘侵欠在貪官衙蠹而使百姓有重徵之擾則兵未受其益而民先受其害非計之得也謂宜

特遣風力廷臣逐處清查何項實係民欠年遠宜蠲何項公用動支開銷宜析其果爲官胥侵漁抗匿不解者責成該督撫藩司立限嚴追仍大張榜示使百姓曉然於

朝廷之意如督撫等官徇隱耽延及縱容有司朦征害民者卽爲飛參重治庶

公帑不憂乾沒而閭閻亦不苦驚呼矣至量入爲出國之大經十一年來各部錢糧尙未聞奏銷清楚亟宜

勅下部臣通盤打算每年原額若干除荒若干奉
詔蠲免若干撥兌開銷若干實解部銀若干用過
若干拖欠未解若干其雜項原無定額錢糧亦爲
分別款件逐一開造不得隱漏則會計之大數了
然心目而養兵恤民之著可以斟酌於盈虛緩急
之間傳曰生財有大道子曰不患貧而患不安萬
邦玉帛之初決無遽憂財匱之理是在經
國諸臣加之意耳以上諸事平平無奇不足佐化
理萬分之一惟

皇
上
採
擇
施
行

補陳湖南駐防事宜疏

皇上允臣衙門之議停止湖南更換大兵

特命重臣二員統領滿兵駐防武昌息將士往來之勞甦沿途小民之苦諸臣奉

命而往必能養兵惜民上副

皇上慎固封守之意矣臣竊思湖南形勢武昌堂奧也長沙爲賊來之門戶而荆襄控扼上游猶多伏莽其去武昌或千餘里近亦六七百里若大兵旣駐武昌則荆襄之滿兵必當撤回誠恐要害之

地兵力單虛脫有緩急驟難策應亦非萬全之算
臣謂宜

勅領兵重臣抵楚之後與經畧輔臣再加商酌如
常寶荆襄等處務須相度險要布置得宜使兵力
可以肆應而不苦於膠柱庶幾屯駐之中寓戰守
之計此前疏所未盡者一也武昌省會之區與漢
陽一江相對凡商船鹽課皆輻輳於漢口固小民
資生之路亦兵士仰給之源自經兵火以來民物
蕭條已甚年來雖稍稍招集元氣終未卽回必得

領兵重臣嚴布紀律時加約束使各兵與地方相
安庶貿易者不致聞風裹足而生聚可以長久此
前疏所未盡者二也至臣衙門承政固山額真土
賴端方練達體

國奉公與臣共事數月每心服其持正今亦在
欽遣重臣之列旦夕叱馭行矣

皇上簡用才畧誠爲得人臣竊思

朝廷者四方之根本紀綱者又治亂之大關使土
賴與臣等同心辦事督率諸御史修舉職掌必不

敢仰負

皇上求言圖治察吏安民之心伏望

另簡滿臣領兵駐防或卽於見駐湖南固山內
用一員就近彈壓而

命土賴仍在臣衙門供職則疆場與風紀兩得之
矣如臣言可採惟

皇上鑒納施行

密陳海寇釀禍之根疏

海賊鄭成功負

皇上招徠之大恩旋撫旋叛今且攻破漳泉等郡
聲勢猖獗奮螳臂以抗

王師幸

天討大張旦夕自當授首但釀禍之人不問則行
間之賞罰不靈釀禍之根不除則內外之消息不
斷臣不避嫌怨敢爲

皇上密陳之浙閩總督劉清泰勦撫無能一籌莫

展當固山金礪攻圍海澄時勢在必尅清泰不能
相度機宜同心撲滅致賊復肆狂逞禍成燎原其
貽誤者一也及見事不可爲遂以病請雖蒙

恩俞允而新督未至自宜仍駐衢州控制險要乃
束裝返轡早踰杭州以西近閱其本章軍政料理
文移與平時無異則非不起之病可知借口息肩
獨以憂遺

君父其貽誤者二也此臣所謂釀禍之人

皇上宜亟賜處分以飭勵行間者也同安侯鄭芝

龍蒙

朝廷參養之異數自古無有初猶謂借其榜樣勸導來歸今十年於茲桀驁彌甚芝龍僕從諸人往來不絕家信頻通既不能訓子革心又不肯束身待罪出入

殿陛密邇

宸嚴子弄兵於海壖而父高枕於

都下行路之人知其不可

皇上縱念投誠之勞不忍卽置之於法然其一切

起居動靜何可不倍加防閑倘用兵之際虛實或
爲所窺封疆之憂近在肘腋此臣所謂釀禍之根
皇上宜早爲留意以肅清內外者也如果臣言不
謬惟

睿鑒探察施行奉

聖旨著密議具奏該部知道

海防責成鎮將疏

頃蘇州總兵員缺奉有著推練習水戰智勇俱優的來奏之

旨會推既上復奉有著遵前旨另推來奏之

旨仰見

皇上留心海防如此其亟也臣查舊制蘇州城內原未設有總兵卽向來額設兵將亦止駐劄吳淞諸海口爲控制要害之計我

朝定鼎以來因地方伏莽未靖急在城守故蘇松

二郡地勢逼近而一巡撫一提督一總兵分駐於郡城之內年來賊艘入犯提鎮之呼應不靈其效已見於前事矣今似宜稍倣吳淞舊制止設副總兵一員統領蘇州鎮標兵馬移駐崇明邊海地方聽提督臣張天祿往來調度而蘇州城守事宜責成撫臣辦理如此則事權畫一無一柄兩操之慮而移緩就急賊來立禦亦不致臨時倉卒索兵於百里數十里之外似與練習水戰之明旨正相符也抑海氛當備不止蘇州爲然凡江

浙瀕海地方一應駐防兵將俱不當分處郡邑之內謂宜

勅下該督撫通行查酌凡海口要害爲狡賊出沒之所悉令移駐扼防無事則訓練水戰使人與地相習而有警則呼吸立辦使賊不得狂逞從此諸鎮將知所急在海一意經營海事盡化逍遙之習講求組練之方豈惟裨益封疆亦所以磨礪將才而歸於實用也臣見江海用兵之時會推練習水戰者寥寥乏人故思卽於防禦之中寓練習之法

如芻蕘可採伏乞

勅部酌議施行

控辭院印疏

本月初六日准吏部咨稱都察院署承政事固山額真卓羅已擬出征本部爲掌管印鑰事具奏奉旨著漢承政龔鼎孳掌管欽此知會到院臣聞

命戰兢敢不祇遵從事但查部院印務皆係滿臣掌管若正官公出則以次代署此向來成例且衙門事體或有滿字文移須與滿臣驗識商確臣私寓在城外西偏離公署甚遠設有緊要之事昏夜隔城奔趨不及誠恐有稽公務爲此不敢不辭伏

乞

皇上仍委臣衙門堂上滿臣掌管庶遵循成例而
公事無錯誤之虞矣奉

聖旨這印信卿宜遵諭暫掌不必控辭該衙門知
道

嚴舉劾以清吏治疏

本月初八日接陝西按臣王繼文揭帖爲特參貪
污司道等事開列左布政使黃紀興屯道僉事白
士麟請

旨提問及接閱邸報見督臣金礪薦舉方面疏又
首列黃紀并及白士麟請加紀擢臣不勝駭異在
按臣發姦摘伏力絕瞻徇於以仰副

勅諭內所載毋縱容司道府廳而止參州縣亦可
稱凜凜奉職矣乃不意督臣見聞之相左也恭誦

順治八年閏二月內

上傳邇來有司貪污成習皆因總督巡撫不能倡
率日甚一日國家紀綱首重廉吏若任意妄爲不
思愛養百姓致令失所殊違朕心總督巡撫任大
責重全在舉劾得當使有司知所勸懲今所舉的
多屬冒濫所劾的不過以小官苟且塞責大貪大
惡反多徇縱何裨民生何補吏治

天語炳然諸臣宜如何悚惕今監司二臣甫經薦
剡旋挂彈章賢否旣無定衡勸懲將安所據伏乞

嚴飭該督將開報各官有無朦混逐一根究明白
請

旨處分仍祈

天語申飭各督撫今後薦舉官員務精加體察勿
令清濁混淆并

勅諸按臣凡所屬各官劣跡彰著果有眞見眞聞
者卽如繼文之據實入告不得雷同附和苟且塞
責庶足以冀激揚之效而無負

皇上之任使也向來各督撫一切章奏有關吏治

民生者例具揭帖投臣衙門非獨以重風紀實藉以參考同異定該按臣之是非自巡方止息以來一切廢弛今投揭者寥寥無幾僅從邸報揆查何能免於挂漏乞竝

飭督撫諸臣嗣後仍照例投揭使遲速當否臣等得以循職稽察於綜覈名實之治未必無小補矣

請資給滿兵疏

八旗官兵雖分有地土連年水澇餬口維艱每遇出征措辦軍裝至爲繁費而馳驅險遠器甲馬匹強半做壞不支往返之間物力已竭此必有一項額設錢糧備臨期資給乃不至於坐困臣查太僕寺每年額徵馬價銀六十餘萬原以供大兵買馬之用者此項錢糧備載該寺考成歲終輒行參罰故有司完解不敢踰期今未知節年拖欠若干見在存剩若干以臣愚計之將此每年六十餘萬

之金錢收貯該部一切不急之務俱不許那移借支卽萬不得已某部何項錢糧缺乏移緩就急亦必於原項解到之日依限補還務令此六十餘萬之額每歲充盈設有六兵出征便可於甲馬之需量行

恩賚若三四年不用兵卽當積銀至二百餘萬從此歲歲相繼恤貧賑乏何患無資以兵需而還爲兵用豈必告急於司農興嗟於仰屋哉臣目擊軍餉浩煩支應紛雜而馬價一項尙屬問寺實可儲

備緩急輒爲陳其管見惟

皇上勅下該部酌議長久著爲定例施行

明白回話疏

本月十八日吏部傳臣到部跪聽

上諭吏部朕每覽法司覆奏本章龔鼎孳往往倡
爲另議若事係滿洲則同滿議附會重律事涉漢
人則多出兩議曲引寬條果係公忠爲國豈肯如
此龔鼎孳蒙恩擢任總憲不思盡心報國乃偏執
市恩是何主意著明白回將話來爾部卽行傳諭
特諭欽此臣愚昧溺職

皇上不卽加處分猶令明白回話感激

天恩不勝戰悚竊念臣自刑部侍郎歷任憲職每
遇法司大案無論滿人漢人必將所犯情罪再四
推敲求其生而不得然後死之倘有一隙稍可矜
疑必遵照議不同的各出看語之例另爲一議上
請

皇上鑒裁從未敢有分別滿漢之心臣衙門同事
滿洲諸臣皆可問也臣智識短淺仰見

皇上如天好生慎重刑獄惟恐一事失入上負
欽恤之德意妄謂罪疑惟輕庶以稍佐

平允而不知意見錯謬遇事膠執實已蹈於罪戾
今蒙

天語教戒切責臣惶悚汗下自知罪無可逭有負
簡擢隆恩謹席藁待罪恭聽

皇上處分臣謹明白回話不勝悚息待
命之至

請退出莊頭地土疏

竊照臣監所屬各署地丁錢糧尚備

上供之用向係署民承種祖業辦納無異至順治四年戶部議設屯莊遂有署民王應舉范啟明等充投光祿寺莊頭圈去蕃育良牧二署民地并大興縣民杜宗禮潘萬春等地共二十二處辦納雞鵝各項錢糧赴光祿寺交納順治十五年五月內禮部題爲欽奉

上諭事內一款云無益之官莊宜裁議得屯莊之

名毫無實益雖收成年歲僅能餬口不能照定例
收穫如遇不收成年歲反費戶部糧米養贍并丁
役錢糧置之空地應將新設采育屯莊十處及順
義縣屯莊十處徵收果子豆屯莊二處共二十二
處屯莊相應裁去將地丁一併交付上林苑監分
別丁徭地土肥瘠計畝徵收錢糧解送光祿寺以
爲

上供錢糧之用等因業經會議允行奉有

俞旨當蒙光祿寺造冊交監遵行間隨有署民員

騰鳳告爭原業該前任監臣陳沃心詳請禮部光祿寺內稱王應舉范啟明等二十二人之爲莊頭其地土房屋半係圈佔撥給舊有民間業主今聞莊頭退出皆欲復得舊業以致爭競不止查禮部原疏內亦未題明或仍歸莊頭或歸民間舊主請示畫一以便遵照等因蒙禮部劄稱退回莊頭等地本部已經題定劄明在案應否作何徵解該監自行查明酌奪可也又蒙光祿寺案令照舊莊頭管業倘有舊主爭執槩行嚴禁不准可也續該前

任監臣據退出莊頭王應舉范啟明等稟稱向來原領地土舊非身有今旣退役焉敢領此地畝等情復申寺裁奪在案止因部寺未經題明將退出之地作何歸著至今署民與莊頭紛紛告爭迄無寧日在莊頭有願還者而署民旣未奉定例臣不敢聽其遽收在署民有告爭者而莊頭又執稱寺行臣不敢強其遽退同一民也莊頭爲退役之民無益公家竟徒手受有主之產署民爲失業之民久荒農作無地效惟正之供揆情似覺未平立法

必期可守現據蕃育良牧二署屢次查詳前來及
今不爲請明誠恐爭執妨農致誤

上供臣監咎將誰諉伏乞

皇上勅下該部詳加酌議將光祿寺交付臣監退
出屯莊二十二處應否仍歸民間業主一體赴監
辦納丁糧或別有裁奪畫一題覆以便遵照徵收
又查得良牧署公廨園地亦被莊頭佔爲莊場今
旣退出房屋應照舊歸作公署外尙有園地八十
六畝三分向來因係官地未經起科今似應招民

承種照例納糧庶

國課無虧而爭端亦可永息矣事關職掌向來監
臣例得自行題奏故敢詳悉上陳字稍踰格并乞
睿鑒施行

請給公署疏

竊照臣衙門公署舊在東江米巷自順治四年光祿寺取去爲蓄養鷄鵝之所歷年來一應公務俱於私寓料理前任監臣陳沃心曾於十二年二月內具疏題請該部因錢糧匱乏難以舉修未卽允給查四譯館行人司等衙門俱經撥給空房以作公署臣監雖秩稱微散但所司人丁地畝別無他屬一應納解錢糧并各署來往文移照刷卷案苦於收貯無地而署民間有爭訟輒就私寓聽理亦

覺體制非宜伏乞

皇上勅部或查修舊署或撥給入官空房庶職業
可稽亦稍明臣子夙夜在公之義矣

龔端毅公奏疏

男士稚孫

志爽續祖

會孫

會憲會憲

授梓

會憲會憲會聰

卷四

康熙

癸卯二月起
癸丑九月止

寬民力以裕賦稅之源疏

我

國家開創之初富有四海量入為出豈至患貧徒以師旅方殷不得不嚴考成以紓

國用於是奉行者新舊竝徵眾罰疊出有司日換生手猾胥之朦溷愈以不清百姓徒苦追呼度支之金錢依然不足蓋那見徵以掩舊徵卽因舊欠而滋新欠陳陳相積無了無休合算通盤仍歸虧缺旣已上下交困安可不急議變通伏讀康熙元年十二月二十三日奉

旨據奏戶禮兵工四部項下直隸各省節年催徵不得拖欠各項錢糧甚多關係國計民生事情重大若槩行蠲免恐國用不敷若槩令督催則稽延

歲月官民受累究無濟於實用今應作何立法催徵及應作何蠲免著議政王貝勒大臣九卿科道會同酌議妥確具奏欽此

皇上之德意固已篤摯周詳至仁至明從此

國計民生兩有攸賴矣乃會議行查已踰半載而督撫題覆尙自杳然諸臣身在地方豈不樂爲民請命或亦以事關重大不敢擔當誠恐不肖官吏反借上行查覈之名將遠年積欠一槩搜求重增追擾致令一番爲

國爲民之善政壅而不宣良可惜也夫蠲租減稅
朝廷之曠恩必特出自

朝廷而後天下之人心歡呼感動

皇上旣洞燭官民受累究無濟於實用矣曷若倣
世祖皇帝蠲十五年以前積逋之成例及我

皇上豁免練餉之特恩斷自康熙元年以前除官
吏侵欺入已按罪追贓不容寬假如實不能完徑
將本人正法籍沒所欠免追不許拖累無辜外其
餘催徵不得錢糧槩行蠲免悉從元年以後較論

考成有司既併心一路得以畢力見徵而小民亦不苦紛紜得以專完正課所省者紙上空名所收者樂輸之實利財賦因之而不竭民生因之而莫安語曰百姓足君孰與不足蓋言恤民正所以裕國也臣身受

隆恩憂深責重竊見

朝廷有此仁政而奉行者未能仰體故敢劾其愚忠惟

皇上採擇施行奉

聖旨該部議奏

惜人才以收器使之效疏

臣聞致治之道莫急於用人而求才之方恆兼乎使過卽以臣負咎之身本無寸長可采

皇上旣洗濯而拔用之矣天下之人才遠勝於臣者不知凡幾如向來滿漢諸臣或因事降革或斥置外僚其處分本末雖各有不同中間豈無小過可原長才足錄一經懲創動忍必深正宜資其磨鍊之能開以功名之路伏思順治十二年正月內上諭將建言得罪及因公望誤等官令各衙門開

列具奏錄用數人一時人心無不感奮今

皇上圖治維新之會尤羣工摩厲自効之時合無
勅下各該衙門通查歷來處分新舊諸臣開列當
日得罪緣由果可原宥者奏請

上裁如罪狀著聞公論共棄卽不得市恩濫列以
干糾治將見用舍咸出

上恩人情爭知鼓舞矣至於老成耆舊引病投閒
者如其精力尙強竝宜

勅部開列以宏任使下至山林隱逸當不乏懷才

抱德通達國體之人古來聖帝明王每不廢徵辟之典亦宜查照從前屢頒

詔款事例

勅各督撫從公訪求請

旨酌核

召用以光

盛治而贊大猷是又摻羅真才之一道也奉
聖旨知道了

主試請兼遣滿臣疏

竊惟開科取士原期網羅英俊以備

國家之用有事諸臣宜如何矢公矢慎以副委任
乃數科以來舛錯閒出致令大典不光人才可惜
亦甚負

朝廷求賢造士之心矣查我

朝會試丙戌丁亥己丑三科俱用滿洲大學士學
士等官與漢臣同典試事其時弊絕風清得人最
盛今值

皇上龍飛以後改元首科正萬國觀光之會尤宜
倍加隆重務得真才合無仍酌倣丙戌等科成例
將應遣滿漢主考等官開列上請

欽點數員於簾內外各司其事稽防彈壓嚴甚周
詳主司既有所儆惕而不敢爲非士子亦欣值
殊恩而爭知感奮推之以至直省鄉試俱可倣此
兼行庶籲俊之盛典不虛而科目取人亦可永久
而無弊矣

申明外官考滿之法疏

今日內外各官之考滿兼京察大計而行之典至重也京官考滿

允科臣條議降級者不必待其復級罰俸者不必扣除日月但歷任三年卽與考滿乃在外各官有在任最久而仍不考滿者非特內外懸殊亦且勸懲無據合無

勅下各督撫通查該直省司道府州縣等官但在任及期者無論功過俱以考滿分別去畱其實政

既優而過失復少者酌註一二等若降罰雖多而才守無玷者畱任以待開復至於降罰既多政事才品又無足錄卽當徑註劣等部院臣復加查核請

旨斥罷別行銓除其准考一等者務果有實政過人不得徇私濫註覆核得實仍比照卓異例優陞此法既行則黜陟明而人心勸凡庸劣無能之吏庶不致久戀地方也但向來止就一人單考其短長既難互見而零星咨冊投送部院亦非慎重大

典之意請自今一年四季分爲四考除首領佐貳
教官雜職等項微員例不具題仍按季咨送部院
外其知州知縣而上以至府廳司道如某季扣足
日月申文考滿該督撫卽通查合省共有幾員開
註優劣實蹟彙爲一本於季終具題一次請

旨下部院核覆事體旣稱簡易而賢否較然可與
天下共見如開註不當科道官卽當隨事糾參至
每季俸已及期踰限不考者吏部責成考功司臣
衙門責成河南道查出請

旨議處如此則規避與勒指之弊可除而吏治庶
幾改觀民生亦將有起色矣

變通安插投誠等眾疏

我

皇上德威遠播閩海負固之眾相繼歸誠從此蕩
平有期共享寧謐之福矣顧閩省之地方有限投
誠之兵民實繁若聚而不散盤固一方終非久長
之算語云受降如受敵不可不深長思也今督臣
李率泰將次夏代現奉有卿在彼年久熟諳地方
情形著親行安插務令得所之

旨仰見

廟堂深謀遠慮動出萬全以臣愚見似宜乘此料理安插之時酌爲一勞永逸之計其投誠官員素爲督臣恩信所感服中有傾心慕義情願歸旗者卽令於督臣起行之日隨帶來京照例優加恩養如願率所部兵卒効力疆場者須酌量地勢相近漸移於有滿兵駐防之處配搭居住務令相安投誠兵士自願歸農者多方散遣悉令復其故土樂業寧家勿使結聚一隅徒滋紛雜中間詳曲事宜聽督臣相機措畫必使操縱兩得羣情不疑如此

則向化者得獲生全之利而招徠之法亦庶幾永
久無患也蓋督臣久在地方駕馭拊循事事周到
故向來投誠等眾實受

朝廷推心置腹之恩倘繼事者處置未盡得宜致
令心懷觖望反虛綏來遠人之

德意矣臣從封疆起見不禁鯁鯁過計如言有可
揆伏乞

勅部密議施行奉

聖旨該部詳議具奏

西漢書之考正

卷一

恭陳愚見疏

臣捧讀

上諭將直省拖欠自順治元年以來十五年以前各樣銀米藥材紬絹布疋等項錢糧一槩蠲免以後貪官姦吏等若將奉旨蠲免款項復行借端苛擾派征情弊著加等從重治罪欽此

天恩浩蕩四海歡呼從此舊欠既除新徵易辦閭閻咸登安樂士馬實見飽騰此曠古之善政而太平之盛事也臣以爲

德意既屬非常則奉行須求實效從來蠲過錢糧
重復派徵總因款項繁多彼此牽溷愚民無知安
能家喻戶曉故昔人謂

朝廷赦之而吏胥不赦弊正坐此宜亟

勅戶部將蠲免過各樣銀米等項盡數查出絲毫
勿遺每直省彙開一總數以爲之綱卽將某年某
款各樣細數詳悉開列以爲之目咨行該督撫刊
刻榜示遍曉小民務令深山窮谷盡知此番

大恩出自

朝廷之特需凡有拖欠在順治十五年以前者已
准槩蠲竝無望漏一切款項洞然明白眾耳眾目
無不周知日後卽有貪污官吏不得借口何項未
蠲重徵追擾如此則私徵苛派之弊自無所容而
姦蠹爲之一清萬民實沾

膏澤矣如果臣言可採伏乞

勅部速議施行奉

聖旨該部知道

再陳愚見疏

順治十五年以前各樣拖欠錢糧槩奉

特恩蠲免其催徵官員除先經議處者不議外若見任帶徵各官因此項錢糧帶降帶罰及任俸停陞戴罪督催等項初既爲前官受過事可矜原今又爲舊欠悉蠲

恩與寬免則各官所有參罰該督撫自當按其年月逐一題明但若拘開復之在例一人一事單本具題誠恐藩司經承等役希圖打點逢人指索逐

事摻求既無了結之期終屬官民之累且文移章
奏日見繁多未免上勞

睿覽合無

勅下各督撫限文到一月內通查所屬催徵舊欠
各官應與開復者一省共有幾員一員共有幾件
彙爲一本詳列具題不得零星遺漏務盡破刁難
之習以力杜胥吏之姦庶事體簡易不煩而有司
得免於重困也倘臣言可採伏乞

勅部速議施行奉

聖旨該部議奏

聖旨該部議奏

臣

請復秋決疏

皇上不以臣不肖用臣爲刑部尙書是臣爲

皇上執法之官不敢姑息以骫法者臣之職也而獨念刑獄者生人之

命死者不可復生斷者不可復續倘用刑稍不詳慎以累我

皇上平明之治夏臣之罪也近奉

上諭自今以後若有情罪可疑者應議秋後處決情果真者有何秋決之處應卽正法欽此仰見

皇上懲姦安良殺以止殺之至意臣思同一情真而就中亦有輕重之別其情重者如律文所載立決等項窮凶極惡不可一日容於天地之間則當亟正典刑以洩神人之忿若按法難貸而論情較輕者如律文所載監候秋後等項則不憚反復周詳畱待秋審求其生而不得然後死之務斟酌情法之平使無倉卒鍛鍊之憾且恐法司之耳目有限而必質之多官之

廷議以昭至公俟之刑科之覆奏以昭至慎古帝

王重惜民命於情真之中猶必委曲分別若此猶情可矜疑卽當於定案之時蚤爲減豁又不必畱待秋審矣蓋人君刑賞皆應天道春生秋殺天之道也三時皆生而隕霜殺草獨見於秋後故從古刑罰克當則天心協應而和氣致祥我

皇上法天圖治顧可不以尙德緩刑爲要乎伏讀順治十年六月初三日

世祖章皇帝諭旨以後問刑衙門問擬罪人務要詳審真情引用本律一切鈎索羅織悉宜痛革書

云罪疑惟輕所當深念順治十五年十月初三日
上諭以後內外審擬監候者俱著分別秋後處決
及監候緩決兩等具奏欽此是知律文不可不分
晰而秋後亦不必盡決也伏乞

勅下法司會同詳議除大清律例開載原係立決
者照舊遵行及新例光棍詐財竝誣叛已決者酌
量增入外其律文原載監候秋後等罪卽自認情
真仍照定律問擬不必徑擬立決旣符奉若天道
之義亦彰

如天好生之仁矣臣循職陳言字稍踰格竝乞
睿慈鑒宥奉

聖旨據奏稱秋決宜復凡罪無可疑者卽決罪有
可疑者候秋後前旨甚明未嘗云死罪一槩不許
候秋後且龔鼎孳前亦在都察院有三法司會審
之責今又職任專斷應卽決應秋後處決伊旣可
以審擬乃自爲寬慈以上爲不寬慈徇情於下具
奏殊爲不合著嚴飭行該部知道

請恤婦女疏

查大清律開載凡婦人犯罪除犯姦及死罪收禁外其餘雜犯責付本夫收管如無夫者責付有服親屬鄰里保管隨衙聽候不許一槩監禁若婦人懷孕犯罪應拷決者依上保管皆待產後一百日拷決是婦人不應輕禁載在律文猶古聖王罪人不孥之遺意也臣受事後兩至獄中稽察見婦女攜帶幼孩不下百餘人此輩非緣坐之子女卽從夫之妻妾按其所犯止應入官從流旣非自作之

罪且無應死之條乃提解一到不得不收繫囹圄
因而婦女懷孕有生育於禁中者幼孩出痘有傳
染於闔獄者原情準法實可矜憐我

皇上因監犯物故尙恐其饑寒致死令臣等嚴察
恩光下燭眾口歡呼況此婦孺之無知必蒙

宸衷之軫恤伏乞

天慈勅部酌議今後婦女犯該入官從流者應否
照律保管以待發遣勿致一槩監禁或於五城查
有空閒房屋撥人看守但令稽防出入以免禁卒

凌踐竝

勅下內外問刑衙門凡詞訟牽連婦女非係本身
犯有重罪者不得濫提濫禁以干天和則法外之
仁一物無不得所矣奉

聖旨該部議奏

星變陳言疏

臣捧讀

上諭因異星復見令臣等洗心滌慮更改前非應
興應革事宜各抒所見明白陳奏欽此

皇上克勤天戒真與古帝王同符矣臣竊思天心
仁愛莫大於好生而天人感召莫捷於刑獄故從
來言弭變者必以省刑爲先唐虞之世民不犯於
有司漢文帝唐太宗亦幾致刑措其最上者矣漢
成帝建始元年二月有星孛於東井詔崇寬大長

和睦大赦天下使得自新唐文宗開成二年三月以彗星見詔有司及天下州府見禁囚徒死者從流流以下盡釋放三年十一月以彗星見詔京城百司及諸道州府見禁囚徒未經勅斷者犯死罪竝降從流流以下遞減一等其十惡及謀殺人劫盜賊竝官典犯贓不在此限故明洪武九年秋七月有星孛於北斗詔釋被刑之家親屬還鄉諸司獄爲一空成化七年十一月彗星見於東北大赦天下此皆載在史冊班班可考我

世祖章皇帝每遇災變必

特頒詔諭減釋罪囚凡在臣民無不感泣況尋者
除舊布新之象正宜滌除臣民舊染之污而一布
以

朝廷維新之化謹將厯代舉行故事開列上陳仰
備

採擇應否酌量情法倣

世祖皇帝解網之特恩此在

皇上自有睿裁而非微臣所敢必也臣職掌所在

不敢不言

恩出自

上又不敢顯言因密抒一得之愚伏祈

慈鑒施行奉

聖旨知道了該部知道

請酌民例以宥小過疏

近見革職之官續有參罰應革職降級罰俸住俸
停陞等項俱送臣部照民例議罪此

皇上厲世磨鈍之意欲人思盡職而無貽後悔也
但竊念各官分內職業不能自盡而後至於革職
乃旣革之後復將任內參罰層累而付之司敗揆
諸罰不重科之義似覺未安合無

勅部再加酌議今後文武官革職之後又犯別法
至革職以上者自當送臣部定擬若犯該革職而

無職可革者亦送臣部照定例擬罪折贖至於降級罰俸住俸停陞等項罪旣輕於革職似當槩與寬免以昭宥過之

仁庶法體人情兩得之矣奉

聖旨已有旨了

請寬失出以期平允疏

查大清律開載若斷罪失於入者各減三等失於出者各減五等則是失出之罪原輕於失入也今承問各官引律未協擬罪稍輕一經駁查卽行參處

朝廷慎重刑獄本期法必當罪無枉無徇而承問者惕於

功令必將一切畏縮寧從重擬以作自全之計但求免於駁參於一己之功名無礙而他人之性命

不暇顧矣。管人云：自安之道在人之死，非虛語也。我

皇上天慈，洞燭近於引律稍輕諸案。部議降罰者，多從寬減。固已人慶更生，乞

勅部再加酌議。今後承問各官，如果徇情枉法，顛倒是非，故入故出，確有情弊可指者，聽臣等法司衙門題參議處。若止是擬罪稍輕，引律未協，及平反欠當，遺漏疎忽等項，槩免參論。庶問刑之官，得以精詳審酌，無瞻顧之憂，而獄情可幾明允矣。奉

聖旨這所奏事情著詳議具奏刑部知道

請嚴被論以飭吏治疏

從來大小官員一經參劾開有劣跡者重則革職輕則解任此定例也近見督撫參論官員奉旨止令審奏竝無革職解任字樣

皇上或恐中有枉抑故必先令審明而後定其去留誠責實之至意臣思虛實未明不遽革職可也若竝不解任無論朝長跪而對簿暮升堂而服官於大體未協且以被論之官百事瓦解既自顧之不暇安能復留心民瘼料理地方此其不便者一

況被害干證俱在管轄之中上官或因其情面而
曲示周全士民或有所畏忌而不敢質認是非失
實懲勸無由此其不便者二合無今後被論官員
事應勘擬者卽乞

乾斷先行解任候質實則罪固難辭虛亦無妨另
補庶地方不致貽誤而吏治民生兩有裨益矣奉
聖旨已有旨了

請酌緣坐以恤株累疏

向來叛逆親屬妻妾子女等應緣坐入官者若女姊妹許嫁已定歸其夫此定律也近奉

上諭許聘未嫁之女及許聘未嫁之姊妹一併入

官

朝廷懲創姦頑立法自有深意臣竊思許聘之女與姊妹其身已許人卽屬有夫之身乃夫家本無罪犯而一旦人材置之兩空情已可憫且未嫁待年必皆幼弱無知豈能曉悉父兄之行事至姊妹

之於其兄弟更有分居各爨及同父異母之別若
盡令沒官則愚稚牽連陷於法網尤堪惻然合無
勅下法司酌議仍照律例免其入官庶不失罪人
不孥之遺意而於情法亦得其中矣奉

聖旨該部確議具奏

請寬奏銷疏

臣伏讀康熙四年三月初五日

恩詔凡順治十八年以前拖欠錢糧及官吏侵欺偷盜庫銀者一槩寬免

天恩普徧薄海歡呼矣乃順治十八年內各省奏銷十七年紳矜欠糧等案該撫不論多寡一槩指參該部未經核查一槩降革以致三吳財賦最重故明三百年從不能完之地而年來俱報全完雖惕息於

功令不敢不勉力輸將然該撫早夜拮据及地方
剝肉醫瘡之狀可以想見臣思自古聖王之世藏
富於民故能使家給人足雖遇凶年不至重困若
徒令之奔命於催徵救死於鞭撲東那西湊皮盡
骨枯一遇災荒未有不轉徙溝壑者殊非

皇上痾瘵斯民之本懷也今順治十八年以前侵
盜之錢糧旣已邀

恩於法外而此十七年逋賦之紳士寧無軫惻於
宸衷伏乞

天慈念奏銷事出創行過在初犯懲創既久又遇
詔恩

勅下該督撫通查處分諸人如果於順治十八年
以內將原報欠數全完者比照有司在任完糧之
例量與開復使天下曉然知

朝廷之意原以儆惕冥愚未嘗絕其自新之路庶
幾催科之中不失撫字而人心感悅民困亦以獲
甦矣奉

聖旨知道了

請重言路以責實效疏

臣伏讀

上諭惓惓以人民失所爲念令諸臣陳奏應行應革事宜仰見

皇上勤民至意卽古帝王如傷若保不是過矣除臣一得之愚另具密疏條上竝臣衙門事宜見與滿漢諸臣商酌陳奏外竊思民生安危在內繫乎六曹之政事在外繫乎督撫之賢否使皆能實心任事孜孜惟講求民隱宜

上德意亦何患民之不安而言路諸臣又以稽察
六曹糾參督撫爲其專職凡官吏貪酷法制未便
皆得直達於

朝廷故昔人有言立乎殿陛之間與天子爭是非
者諫官也從古太平之世率皆優容臺諫謇諤成
風乃可以周咨民瘼成一代之盛治至今書之史
冊以爲美談年來裁減科員雖稍稍復設而尙未
還其舊額臣愚以爲當此懸鞞設鐸之日正宜廣
開耳目盡復滿漢科員原有之額數慎擇才品素

著之人使之任職於以稽核內外條列民情所裨
益必多多也至近年科道諸臣如果公忠爲
國偶因一言一事處分者竝宜

勅下部院詳察本末開列上請倣

世祖皇帝履行事例量與

召用庶敢言之氣益奮而民生利病無不上
聞矣奉

聖旨知道了

安插投誠疏

我

皇上於閩海投誠各員不吝爵賞廣示招徠年來
傾心恐後巖疆漸已寧謐矣獨是自海上來歸者
仍用之於近海之地如周全斌楊富等比比皆是
在

朝廷推心置腹使之疑貳盡消自有操縱不測之
妙用而臣竊鯁鯁過慮謂遺孽一日未殄則防微
杜漸之計不可一刻不周縱不能驟解其兵權亦

宜量用之於內地彼既漸遠於巢穴自益堅其向
化之心而我之緩急虛實庶不至有意外之窺伺
矣至於投誠兵衆聚集一隅釀禍擾民尙無寧日
如向日蔡祿經過地方索用多夫已有明據推之
閩省爲害可知似宜別議安插竝

勅下該藩會同督撫嚴行禁戢事事務從民生起
見勿致重役以盡民之力耑利以腴民之生庶殘
黎喘息少延而收拾人心亦卽奠安封疆之一策
也

自陳不職疏

准吏部咨欽奉

上諭在京三品以上官自陳竊照臣於順治元年五月內授兵科給事中蒙

恩厯陞卿寺侍郎至都察院左都御史復以奉職多愆累降至國子監助教康熙元年七月內奉

上諭遇侍郎缺補用康熙二年六月內補授都察院左都御史康熙三年十一月內調刑部尙書康熙五年三月內請假回籍葬親奉

旨龔鼎孳除往來行路日期准假三箇月安葬事
完之日速來照舊辦事本年九月內轉補今職除
康熙四年正月以前事故遵例不開外并爲楊昌
齡具呈違限及遲送錯擬郝淡等各官職名二案
援

赦免議外計在刑部任於康熙五年爲劉漢臣一
案未取督捕堂司口供罰土黑勒威勒本年六月
爲楊國鏞叩

闡一案不行詳議罰土黑勒威勒伏念臣才識謏

劣本無寸長蒙

皇上宏開使過之仁復畀風紀之寄敷陳罔效表率無能暨膺邦禁之司莫盡平反之責受

恩未報曠職滋慚今夏叨列中樞益懼不能勝任伏乞

睿斷立賜處分以爲臣子不職之戒臣無任惶悚待

命之至爲此謹具奏

聞奉

聖旨卿才品優長簡任中樞著益殫心供職不必
求罷該部院知道

請賜罷黜疏

本月十三日准吏部咨欽奉

上諭尙書及三品以上堂官俱著自陳竊照臣由
進士於順治元年五月內授兵科給事中蒙

世祖章皇帝隆恩厯陞卿寺戶刑二部侍郎順治
十一年五月內奉

上諭陞都察院左都御史順治十二年十月內因
法司各案臣多兩議降級調用復屢謫至國子監
助教康熙元年七月內奉

上諭起用康熙二年六月內仍補都察院左都御史康熙三年十一月內調刑部尙書康熙五年九月內調兵部尙書康熙六年十一月內恭遇

恩詔加一級康熙八年五月內轉補今職除康熙六年十一月二十六日

赦前事過不開外計在兵部任於康熙七年五月內因馮居廣失盜一案吏兵二部處分互異罰土黑勒威勒又本月內因肯赤黑等干預地方事務未行查議罰土黑勒威勒本年十二月內因錯議

額駙尙之隆請封一案罰銀七十兩又本月內因胡喇虎殘廢擬補甲喇大罰土黑勒威勒康熙八年二月內檢舉張大壽錯誤一案奉

旨寬免又本年六月內奉

上諭鰲拜家人洪善尼滿供出囑托行賄案內有臣姓名蒙

恩從寬免罪伏念臣性闇才庸無足比數受世祖皇帝之特恩簡司風紀復荷我

皇上之器使洊厯崇班寸效無聞過愆叢積固已

仰虛

知遇曠誤官常至於愚戇之孤踪忽被妄佞引蒙

皇上俯垂洞鑒曲賜保全旣寬貸其罪仍與身

浩蕩洪恩過於天地父母臣驚悸餘生惟在頂戴未敢瀆疏剖陳兩月以來雖勉策駑鈍辦事而神魂刻刻悚懼恆如斧鑕在躬清夜縱邀

聖度之包容豈可覲顏而就列義當束身求退庶
無貽玷班行但以甫沐非常之

恩未効涓埃之報又不敢遽行引請徬徨跼躅寢
食靡寧今當澄敘官方之時正

聖主維新大化激厲羣工之會臣受

恩至重負罪至深典禮何官寧容濫厠黜幽之典
斷宜首自臣始伏乞

皇上立賜罷斥以爲人臣溺職辜

恩之戒從此踰伏田里歌咏太平有生之年皆銜

結

鴻慈再造之日也臣無任悚息待

命之至奉

聖旨卿才品優長簡任秩宗著益殫心供職不必
求罷該部院知道

明白回奏疏

本月初一日兵科給事中王曰溫一本參臣負罪貪位不思引咎奉

旨這所參情節著黃機龔鼎孳明白回奏該部知道欽此臣才識庸劣罪過多端

皇上不卽加處分而猶令回奏曷勝感悚敢不明白上陳竊思臣蒙

世祖皇帝簡拔爲都察院左都御史因法司各案多執兩議降級調用復屢降至國子監助教然臣

同憶順治十七年部院甄別擬臣降調外用荷
世祖皇帝特恩不忍棄臣於外奉

旨龔鼎孳著降三級在內調用自此臣得留居京
秩不至沈淪外僚以致今日邀我

皇上之隆恩亦卽

世祖皇帝之遺恩也康熙元年七月內與原任左
都御史趙開心同奉有降調處分已久著以侍郎
缺補用之

上諭開心亦係部院甄別休致蒙

世祖皇帝特恩留任者也康熙二年以臣仍補左都御史以開心爲工部尙書管倉場侍郎事從來大臣降革以原官起用者俱有成例非獨臣一人也歷荷

皇上聖恩親政以後調補今職康熙八年六月內上諭囑托行賄案內有臣姓名蒙

皇上俯垂洞燭從寬免罪本年八月內臣因甄別具疏自陳痛切披瀝自謂神魂刻刻悚懼恆如斧鑕在躬清夜思維縱邀

聖度之包容豈可覩顏而就列受

恩至重負罪至深典禮何官寧容濫厠黜幽之典
斷宜首自臣始乞立賜罷斥以爲人臣溺職辜

恩之戒奉

旨卿才品優長簡任秩宗著益殫心供職不必求
罷該部院知道欽此臣感激涕零且愧且懼念臣
以負罪之身受

皇上莫大之恩捐糜頂踵何能稱塞萬一自留用
以來竭蹶兩年實無寸補而感

恩懼罪之念刻刻交集於心感

恩則不忍遽言去懼罪則不敢遽言去值

聖主焦勞憂旱之時尤臣子奔走不遑之會以是
乞身之疏執筆徬徨稿數成而復毀也但臣才庸
年衰兼之疾病纏綿神氣頹靡感

恩而未報

恩懼罪而無由贖罪揆之人臣陳力就列不能者
止之義必宜力求黜免乃於臣分稍安今科臣以
去就大義相規是臣所不忍言不敢言者而科臣

代言之其持論甚正其以廉恥責望臣者甚厚惟
有束身待罪靜聽處分伏乞

皇上立賜罷斥以愆官常而無妨賢路自此歸耕
隴畝歌咏太平有生之年皆銜結

天恩之日矣緣係明白回奏字稍踰格統祈
睿慈鑒宥奉

聖旨這回奏情節知道了該部知道

乞允回籍疏

臣才庸識闇久玷班行負罪至深蒙

恩矜宥去歲人言指及復邀

聖鑒保全

天地父母之生成無以踰此彼時卽當束身求退
稍存進退之閑何敢覲顏竊祿恬不知恥但以

君恩高厚頂踵難酬數月以來雖自知年力日衰
尺寸無補而不敢不黽勉供職者實臣子戀

主之微忱尙思圖報稱於萬一也乃不意歲內風

雪之後兩次入

朝會議感冒嚴寒痰嗽大作因而氣喘心跳困憊
難支延醫診視謂元氣爲積勞所虧非靜養歲月
未易調治竊自傷衰病殘生終難遂報

恩贖罪之願矣今當

皇上治定功成禮明樂備之會臣職司典禮正宜
夙夜在公若復抱病遷延貽誤職業是未能報
恩而更致負

恩未能贖罪而更以增罪尤臣誼之所萬難自安

者也伏乞

皇上鴻慈准臣解任回籍調理倘不卽填溝壑從此有生之日皆

皇仁再賜之年矣奉

聖旨卿才品優長簡任秩宗正資料理著照舊供職不必以病求罷該部知道

謝照舊供職疏

臣至愚極陋衰病侵尋去冬今春因氣血虧損冒寒致疾曾於五月內控請回籍調理奉有

溫綸未蒙

賜允其時臣感激

恩遇力疾入署未能靜待氣血之充復也自是朝夕趨事不敢片刻偷安至五月二十九日正在部辦事忽然頭面發熱痛不可忍及歸寓偃臥遂連嘔數次每嘔一次則痰暈移時延醫診視咸謂氣

血兩虛之症亟加調治稍稍甦息自念螻蟻殘生
尙未知能有瞻望

闕廷之日否也六月二十日蒙

皇上遣翰林院掌院學士傅達禮

御前侍衛吳海率同太醫院官茹文焯到臣私寓
傳宣

恩旨云

皇上面諭達禮等來問汝病狀若何令太醫院診
脈用藥加意調治等語欽此臣跪聽之下感激涕

零一面扶掖叩頭竝令舉家婦子望

闕叩謝

天恩外竊念臣行能無取渥被

恩知旣已福過而災生自分棄捐於

聖世乃荷殊常之

恩禮特頒

禁近之重臣

天語春溫光生病榻間巷驚傳爲創見同

朝共慶其遭逢誓畢此生難酬

大造兩旬以來太醫時時過視臣每服藥一口輒
一感誦

聖恩覺從前病勢漸次稍痊私幸枯株腐草霑溉
春膏似有再生之望矣但據太醫云尙須屏絕一
切專精調攝寬至百日外乃可平復如初稍涉勞
煩恐致復作臣思自患病至今臥牀已四十日方
恨不能蹶然而起瞻仰

天顏若時日更復人延職業難辭荒廢名挂班行
虛糜廩祿一番戀

主之微忱徒積曠官之罪戾

皇上鴻慈天覆卽或垂憐衰病不遽加以譴責而
微臣清夜捫心實有頃刻不能自寬者伏乞

皇仁准臣解任令得專心調理俟氣血稍能復舊
隨卽詣

闕候補總之臣此身爲我

皇上再生之身決不敢自圖暇逸忝然遽求退休
負

聖主體臣之仁而昧犬馬知恩之義也伏枕籲

天無任感

恩待

命之至奉

聖旨卿才品優長方切倚任覽奏病未全愈准假調理俟痊日卽出供職不必求請解任該部知道

自陳不職請予罷斥疏

本年三月當京官考察之期臣例應自陳以聽

乾斷處分竊臣由進士於順治元年五月內授兵
科給事中蒙

世祖章皇帝隆恩厯陞卿寺戶刑二部侍郎順治
十一年五月內奉

上諭陞都察院左都御史順治十二年十月內因
法司各案臣多兩議降級調用復屢謫至國子監
助教康熙元年七月內奉

上諭遇侍郎缺補用康熙二年六月內仍補都察院左都御史康熙三年十一月內調刑部尙書康熙五年九月內調兵部尙書康熙六年十一月內恭遇

恩詔加一級康熙八年五月內轉補今職查任內康熙七年五月內因馮居廣失盜一案吏兵二部處分互異罰土黑勒威勒又本月內因肯赤黑等干預地方事務未行查議罰土黑勒威勒本年十二月內因錯議額駙尙之隆請封一案罰銀七十

兩又本月內因胡喇虎殘廢擬補甲喇大罰土黑
勒威勒康熙八年二月內檢舉張大壽錯誤一案
奉

旨寬免又本年六月內奉

上諭鰲拜家人洪善尼滿供出囑托行賄案內有
臣姓名蒙

恩從寬免罪本年八月內甄別自陳奉

旨卿才品優長簡任秩宗著益殫心供職不必求
罷該部院知道十年五月內被科臣王日溫參論

令臣明白回奏奉

旨這回奏情節知道了該部知道十年九月內因會議巡察地方應停差遣吏部議各降一級罰俸一年奉

旨黃機等著俱從寬免十一年正月內因病疏請回籍奉

旨卿才品優長簡任秩宗正資料理著仍照舊供職不必以病求罷該部知道二月內為歷法天文已復等事奉

旨龔鼎孳等俱從寬免罰俸餘依議六月內因病
在寓調理蒙

恩遣官看視醫治七月內疏請解任奉

旨卿才品優長正切倚任覽奏病未全愈准假調
理痊日卽出供職不必求請解任該部知道十月
內因順天鄉試開拆

紅本一案都察院傳問口供病中隨眾竝稱有失
詳確吏部議應降二級調用奉

旨龔鼎孳著銷去加一級仍降一級留任伏念臣

六年之內寸長靡效溺職多端負罪至重既邀
曠蕩之鴻慈抱病莫痊復荷

生全之異數

天地父母無足踰此高深近者禮闈

大典復拔臣於病困之餘再畀以衡文之任而臣
智識昏瞶猶恐未盡得真才以仰稱

任使是在

廷諸臣中受

恩最深者無如臣負

恩最甚者亦無如臣若不亟加處分何以勵官方而儆瘵曠卽臣抱病經年氣血全耗驅策不前照老疾之

明條從黜幽之

寬典此又我

皇上帷蓋之仁而微臣所引領覬望不敢必得者也臣無任悚息待

命之至奉

聖旨卿才品優長特簡秩宗重任正資料理著照

舊供職不必求罷該部院知道

乞回籍疏

臣至愚極陋久玷班行年力衰頹氣血枯耗去年正月內因病痰喘疏請回籍調理奉有

溫旨未蒙

俞允至五月二十九日在署辦事眩暈忽作幾至困憊難支復蒙

特恩遣官遣醫就榻診視爾時感謝

皇仁附懇解任令得專心調理俟血氣稍復詣闕候補復奉有准假調理痊日卽出供職不必求

請解任之

旨今年三月內京察自陳亦經詳陳病狀奉有照舊供職不必求罷之

旨

皇上之恩過於天地父母臣感激涕零日惟遵

旨調養冀倖痊可有期庶幾勉効涓埃稍申報稱於萬一無如服藥年餘病勢仍未脫體卽衙門要緊事務閒一力疾趨辦而勞煩稍過輒患舉發凡值

朝祭啟奏會議諸事及目今

經筵大典尤臣職分所亟當恭侍者俱未能勉隨
諸臣後一覲

天顏雖

聖慈不加督過而微臣中心怍怍惟溺職負

恩是懼實不能一刻安枕也況當我

皇上制禮作樂黼黻太平之時臣待罪秩宗仍偃
卧私寓廢職業而縻廩祿是一年來戀

主之微忱悉屬曠官之罪戾矣夫以

天恩隆重本不忍恣然求去而病體久延勢實不
可以更留再四躊躇惟有不避瑣聒冒罪哀鳴於
君父之前乞身歸里專事醫藥倘幸而一息苟延
不至溘先朝露從此犬馬餘年皆

皇上天慈之所曲賜與田夫野老歌咏昇平生
世世頂戴

鴻慈於無旣矣奉

聖旨卿才品優長効力年久簡任秩宗正資料理
覽奏患病情詞懇切准解任回籍調理病痊起用

仍著馳驛去該部知道

欽定大清會典事例

卷五

口授瀝陳疏

竊臣一介庸愚叨蒙

知遇承乏典禮功少過多頃因久病乞身於今九月初二日奉有

俞旨卿才品優長効力年久簡任秩宗正資料理覽奏患病情詞懇切准解任回籍調理病痊起用仍著馳驛去欽此臣聞

命感激涕泗交零望闕叩頭恭謝帷蓋之

恩有加無已

洪慈益沛慚負愈增不意至本月十一日痰病復作勢難挽救

光天化日臣獨長辭

高厚之恩未酬萬一伏惟

聖德日新

皇圖益茂用人行政媲美唐虞闢四門廣益之風
衍萬禩無疆之歷臣之愚誠畢此數語區區犬馬
矢報他生謹伏枕口授長男候選正六品京職廕

生臣士稹賚赴通政司上奏臣無任哀鳴悚息之
至奉

聖旨覽卿奏病勢危篤朕心深爲軫念這本內事
情知道了該部知道

龔端毅公奏疏

曾恕

曾憲

男士稚孫

志爽續祖

曾孫

曾懿曾憲

授梓

曾愬

曾聰

卷五 手草存遺

敬陳愚悃疏

皇上展謁

山陵孝思篤切臣等何敢復有瀆陳顧區區之愚
尙有不能已者蓋頻年之水旱未消小醜之竊發

未靖大兵屢勤於征討糧餉方急於轉輸
國計民生以及各地方奏報事事仰煩

宸慮且

天子之孝在以天下尊其親今

皇太后徽號崇增

恩施普被合萬國之歡心以隆

孝治

祖宗在天之靈應無不欣慰者臣等愚見仍望
皇上以

太祖

太宗安定天下之心爲心暫輟啓行俟年豐時平
修恭謁

山陵之禮似未爲晚事關重大臣等職掌所在不
敢不言伏乞

聖鑒施行奉

聖旨卿等奏的是但恭謁

山陵久切朕懷有如以日爲年展期至今難容再
緩還著遵前旨行該部知道

再陳愚衷疏

皇上展謁

山陵孝思篤切因諸王羣臣之請屢次改期旣深對越

祖宗之思復厯軫恤兵民之慮

大仁至孝千古爲昭今七月屆期

六龍將駕爲臣子者自當奉揚恐後何敢復有瀆陳顧區區愚衷尙有不能已者

皇上所注念者民生也今水潦連綿於三夏民生

何如

皇上所體恤者士馬也今撻伐方殷於四方士馬何如

皇上所決勝廟堂者疆圉之奏報也今江海之出沒不常籲餉呼兵無事不仰煩

神畧奏報之緩急所係何如時艱旣未盡底寧宸慮必仍殷宵旰此固臣等向所鯁鯁過計而今不得不申請

聖裁者也且

天子之孝繼志述事原與士庶不同目今

皇太后徽號崇增

恩施普被合萬國之歡心以事

親固已遠邁虞周

祖宗在天之靈應無不欣慰者似不必一展謁閒
而後見孝思之肫摯也炎暑未殘

聖躬宜重臣等愚見仍望

皇上以

太祖

太宗安定天下之心爲心暫輟啟行旦夕干戈底
寧民物阜康修展謁

山陵之禮似未爲晚事關重大不敢不言伏惟
聖明采察施行奉

上諭諭禮部朕方在沖齡卽值

先皇晏駕終天抱恨時刻靡諼夢想

音容涕泗橫集自元年定鼎以來綏緝多方焦心
勞思不遑寧晷顧瞻

陵寢邈在天涯雖歲時祭祀齋沐遣官而朕躬未

行恭謁追慕之殷以日爲歲每臨餐廢箸中夜以興所以擇吉東行必不獲已茲伏思

太祖

太宗創造丕基付托朕躬纘承匪易目今方隅未靖師旅繁興兼之旱澇頻仍小民失所一應養兵恤民措置規畫朕與諸司夙夜圖維猶虞不給東行往返未免延曠日時有稽政務欲專心化理則難展至情若亟遂孝思又慮乖民望再四躊躇我

太祖

太宗原以天下生民爲念如天下未安無以上慰
祖宗在天之靈朕心亦何能安爲此今歲停止東
行俟他年有暇再行展謁爾部卽行傳知

奏明年例緣由疏

該臣等查得每年陞轉一內一外內陞京堂外轉
監司此成例也向來新舊額設御史八十員自奉
旨止息之後止存二十員辦事尙苦不敷內除行
查候結未經回道二員資俸相應咨送內轉一員
實止御史十七員俱各供職無誤今吏部循例咨
取外轉職名案查去年御史朱鼎延內陞之時因
適奉

上傳察核過御史二員其時遂免外轉今臣衙門

通志卷之五十五
五十二
止息御史除陸續挨補外於本年六月內一時外
補參議八員較去年察核人數已踰數倍尙有止
息未補御史八員合無俟其補用完日以後一內
一外照例咨送兼轉理合題明伏乞

聖鑒施行奉

聖旨知道了吏部知道

請嚴開送考選之法以杜倖濫疏

皇上諭諸王大臣并九卿詹事科道諸臣請復
遣巡方仰見

睿慮惓惓以吏治民生爲急臣等竊思此番考授
必極一時之選乃可責澄清之效倘以才守平庸
者倖濫充數待其溺職而後糾之則已晚矣故欲
慎始莫如嚴開送考選之法查巡方定例順天江
寧蘇松浙江江西湖南湖北福建河南山東山西
陝西廣東廣西四川宣大甘肅茶馬兩淮兩浙長

蘆河東四巡鹽巡漕巡倉共二十四差今會議題定於在京部院等衙門內不分新舊理事官郎中以下吏部都察院會同考選清廉才德素優者授爲御史差遣除臣衙門見在新舊御史二十員俱先經考選辦事日久臣等精加選擇酌量題用并理事以下等官擇送考選外其在京部寺等衙門例應選授新舊各員應

勅各該衙門堂上官嚴行察覈務要操守廉潔才識端練品行行政績實有可見者該衙門滿漢堂官

方爲坐名舉送其無堂官衙門聽掌印官舉送俱明註某人舉某人寧嚴勿濫限文到三日內卽行移送不得耽延奔競開送旣畢臣等部院仍會同九卿詹事科道等官齊集

金水橋照會推例公同詢訪博參與論如開送不當卽行駁回倘有徇私顛倒者仍聽科道官糾參果其才品政績公論無間吏部與臣衙門請旨定期於

午門前考試奏議一道以覘其文藝庶不至出差

時有私帶主文及假手書吏之害仍請

命科道官四員巡視防範用杜傳遞代倩之弊臣等部院卽於本日公閱酌量新舊各取所長折卷發落開列取定各員恭請

皇上裁定以便刻期

差遣如此則倖竇可塞真才畢收在奉

差諸臣知選舉之慎重當無不感奮濯磨而

朝廷可實收巡方之益矣至出差事宜容臣等參酌憲綱另行條奏奉

聖旨這開送考選事宜還著會同吏部確議具奏

詳議申飭事宜疏

該臣等於本月二十七日具有題明註差一疏奉旨這申飭事宜還著詳確另議具奏欽此臣等前疏原稱一應巡方事宜另行條奏今奉

旨詳確議奏謹列切要五款伏候

皇上裁定行臣等申飭施行一嚴舉劾澄清吏治全賴激揚向來濫舉市恩方面盡列薦章有司多至數十以致賢否莫辨鼓舞不靈今後必須廉訪才守治行卓有實蹟可紀者方行薦舉方面多不

過四五員有司多不過七八員如仍前濫薦臣等
查參處治至糾劾尤貴公嚴上自督撫鎮將下至
方面有司務得大貪大惡親行密訪力破情面據
實參奏不得專劾小吏而寬於大吏不得止憑開
報而忽於採訪其按臣如舉動乖張徇私通賄亦
聽督撫互糾伏候

上裁一禁賄賂律已清嚴方可率屬按臣與督撫
舊沿交際陋例司道以下遂亦相率餽遺甚至薦
獎屬官違禁受謝供張華侈科累官民濫拿訪犯

多坐贓贖借名支取隱漏冊報此皆關係官箴首
宜嚴革今後但有不自砥礪仍蹈前弊者臣等特
疏糾參請照風憲官受贓律加等重治伏候

上裁一戢衙蠹欲除民害必自衙蠹始按臣隨帶
員役主文已經嚴禁其書辦承差查照前院臣於
順治八年三月內題定事例外不許濫收一人亦
不許輕差一人至各府州縣提取號件致滋煩擾
至司道府廳州縣衙蠹有積年播惡自知不免竄
身督撫按衙門希圖躲避者按臣不時查訪盡法

究處并將司道以下各衙門胥役徹底摻剔其有影射朋黨并久戀衙門會經過犯之人盡行汰除務令蠹窟一清小民安枕如真正衙蠹剝官虐民橫征暴斂情罪重大者該按審實徑行請

旨正法不得坐派多贓致生扳累其按察司推官衙門各役舞文作姦窩訪賣訪等弊尤當首爲拿治以塞蠹源伏候

上裁一慎刑獄風憲官問理刑名是其專職向來法司大案奉

旨下該撫按再審具奏者每仍批承問衙門抄招
轉覆不行親審其中倘有冤抑何從申雪今後按
臣審錄罪囚當念民命至重加意參詳勿拘成案
勿著成心務得情法之平以昭

欽恤之意其各衙門詞訟煩多尤爲民害務通行
禁飭不得濫准民詞不得將輕犯淹禁至取討病
呈私斃人命尤爲慘毒務遵照近奉

明旨勒石嚴禁違者立行摘發請

旨重懲如該按輕忽徇縱臣等一體糾治伏候

上裁一修實政各差應行事宜載在憲綱并曾經
前院臣條奏如出差年限往返水程俱照順治八
年三四月內兩次題定事例一體遵行至

皇上親政以來戒諭按臣

上傳并節頒

恩詔及本年正月

勅諭十一事凡關吏治民生者該按須會同督撫
實心奉行應修舉者作速修舉應釐革者嚴行釐
革務令利興害除百姓受治平之福仍逐款奏繳

以收成效伏候

上裁以上五款臣等特舉其大綱至於法紀修明全在力行賞罰向來屢遣屢撤臺綱廢弛皆因稱職者固蒙

褒擢之恩而不肖者未盡處分之法人心玩愒無所創懲此番特遣實民生治亂所關必求

皇上懸大賞大罰於上赫然與天下更始其清廉不徇情面稱職者自照會議陞用如其不洗滌肺腸實心任事甘爲貪污敗簡以身蹈法者必請從

重處分勿僅僅議革職降罰庶人知自勵整頓一新矣至前題註差各員竝請

旨勅令受事施行奉

聖旨依議嚴行申飭顧仁等著照各差作速前往受事

明白回奏疏

六月初十日刑科抄出刑科都給事中高辛翁題
爲請重巡方之差養廉恥勵志節以觀實效事奉
旨這奏內事情吏部都察院明白回奏該衙門知
道欽此臣等案查差遣巡方原經議政諸王大臣
會議內開差遣之時於在京各部院等衙門內不
分新舊理事官郎中以下吏部都察院會同考選
清廉才能品優者授爲御史差遣回京之日聽都
察院考核奉

旨依議在案臣等隨具請嚴開送考選之法一疏
奉

旨這開送考選事宜還著會同吏部確議具奏該
臣等部院會議具覆奉

旨按差初復見在御史著部院一併考選餘依議
臣等於四月二十六日會同滿漢九卿詹事科道
齊集

金水橋將開送應考各官逐名嚴核不避嫌怨凡
與例不合者卽行駁回臣等部院復請

旨於五月初二日同赴

金水橋將應考各官糊名考試科道官四員巡視
防範卽日矢公矢慎公同閱卷照差取定新舊御
史二十員題奉

俞旨吏部移送臣衙門差遣臣等查照順治八年
三月內題定事例請

旨公同掣籤以杜趨避奉

旨依議臣等於五月二十五日傳集諸御史將各
官姓名分寫籤二十枝用紙封固貯一筒內又將

各差地方分寫籤二十枝亦用紙封固貯一筒內
掌院臣手掣姓名籤一枝當堂唱名令木官自掣
地方籤一枝隨掣隨註掣畢具題并條議申飭事
宜奉有依議嚴行申飭顧仁等著照各差作速前
往受事之

旨此臣等考選掣籤之始末也總之巡方初復事
關重大科臣懲前毖後已能信臣等之無私獨其
謂部院諸臣未請

皇上親試查我

朝十二年來屢經考選從無

皇上親試之例臣等遵照王議并節奉

明旨事事力求詳慎試疏俱在

御前固不敢越職掌而擅專亦何敢悖

明旨而推諉也緣奉明白回奏之

旨謹遵

旨回奏伏乞

睿鑒施行臣等不勝悚息之至

1111

請暫停內秋決疏

本年八月初一日准刑部咨稱該部題爲暫停秋決之期等事奉

旨是今歲著暫停秋決欽此仰見我

皇上慎獄明刑軫恤民命之

盛心凡待決重囚莫不欣沾

浩蕩矣查刑部原題云恐恤刑官未至各督撫循例行刑合無暫停今歲秋決似專指在外者而言臣等竊謂內外奉行畫一更足廣昭

皇立憲之考正 卷三
德意伏思秋決各犯其定罪情由較之立決重囚
原有差等故每歲

朝審多所減豁及至臨刑仍有免決留回者此泣
罪緩死之

仁正於無可生全中惜其須臾之命也往例秋決
之時如遇是年有大喜大赦及偶有災異率多停
止今

皇上欽恤之澤既已遍播海內而在內各犯尤近
在

輦轂照臨之下似宜一體邀

恩嗣後每遇恤刑之年內外俱暫停秋決著爲定例庶

皇仁普被而遠近獲均矣奉

聖旨是以後每遇恤刑之年內外俱暫停秋決著爲定例三法司知道

Handwritten text in a vertical column on the right side of the page, possibly a title or header.

明白回奏疏

本月十七日准刑部咨稱刑部等衙門題爲捉獲部案照提大盜事奉

旨這案爾等衙門旣確議相同何又分列看語著龔鼎孳等明白回奏欽此欽遵移咨到院該臣等查得法司核議各案議同的合出看語議不同的各出看語奉

旨遵行已久今朱四一案臣鼎孳因原招稱朱四被未獲賊相五漏等屢逼同去在外頭站著所得

之贓止麥子一袋復被相五漏等拿去引強盜已
行不得財之律杖一百流三千里另議具奏奉
旨朱四情罪兩議輕重太懸著再詳審確議具奏
臣鼎孳凜遵

明綸不敢固執成見與滿漢諸臣再四詳核朱四
得贓雖微而同行上盜是實改照部議擬斬監候
在本犯情罪固已畫一而兩次核議不無異同不
敢不將前後情節詳列奏明但議同合出看語久
有定例臣鼎孳愚昧之罪實無所辭恭候

皇上處分至臣如梅臣課羅科原與刑部一議因
奉詳確具奏之

旨與漢臣再加商確遂一併詳列具奏謹明白回
奏臣等不勝悚息之至

恭留 聖駕疏

臣等於七月二十九日同滿漢諸臣跪聽

傳諭

皇上以江海逆賊旦夕授首願於十月巡行江浙
閩等處周覽形勝爲搗巢洗穴淨拔根株之計仰
見

睿慮憂勤篤念東南財賦重地不惜

六飛遠駕跋履山川爲一勞永逸之圖凡在臣子
孰不感奮顧臣等竊有鯁鯁過計不得不陳之

君父之前者從來

京師爲天下之根本

皇躬又繫萬世之治安

朝廷之上大政大紀一日萬幾何事不秉成

乾斷況直省幅幘遼闊章奏浩繁我

承
皇上宵衣旰食批答如流猶恐奉行不力無以仰

德意今一旦

翠華南幸請

命於數千里之外曠日踰月保無坐失事機且以
神京天府

宗廟社稷百靈式憑居重馭輕鞶苞桑而消窺伺
尤不可不爲熟計其宜慎者一也連年軍興徵發
水滂災傷困憊之民方賴甦息忽聞

萬乘之警蹕與從官之供頓集於一時雖望雲就
日父老歡呼而道路所經寧無勞費

皇上念念恤民豈忍出此其宜慎者二也東南地
勢深阻山則峭削而崎嶇水則紆迴而陜隘陸行

或不得竝軌水行或不能方舟輿西北之平原曠野一望蒼莽六軍萬騎馳騁無礙者不可同日而語今勤

清宮之法駕登高臨深卽拱衛之計出於萬全而進止之塗殊煩審度昔漢臣張猛諫其君曰乘船危就橋安聖主不乘危此不可不深長思也其宜慎者三也海賊以釜底遊魂深入內地大兵一到計日就殲卽鯨鯢之殘窟須乘勝以掃除而天威堂堂豈宜輕褻恐遠近傳聞不知

宸慮之淵深反謂小醜鴟張輒勞

龍旂親指就使撲滅所損已多其宜慎者四也臣等請

皇上遴擇知兵大臣素著威望者遣往江浙閩一帶詳察要害并一切掃蕩機宜星馳奏

聞上請

睿算沿海情形既瞭然在目中而

皇上英武不世出之畧制勝

廟堂奠萬里於几席人心士氣更百倍奮揚矣向

來滇黔逆賊盤踞險遠逆我顏行其視海陬殘寇
強弱衆寡何啻倍屣今

王師一至莫不角崩喙遁迅掃無遺孰非

神謨指示將士稟承之明效豈必躬親撻伐獨以
憂勞貽

至尊哉臣等受恩深厚事關重大不敢不言惟
皇上裁察

請破嫌疑以收獻替之益疏

皇上明目達聰虛懷受諫雖古帝王之懸轡止輦無以復過臺諫諸臣亦無不殫智竭慮冀以仰佐高深頃夏下

詔求言孜孜樂聞過失誠可謂千載一時矣臣聞之管人曰立乎殿陛之間與天子爭是非者諫官也天下之事不能皆非而無是天下之人不能皆不肖而無賢天下之法不能皆賞而無刑天下之官不能皆用而無舍夫見其事之果非與其人之

果不肖言官既不避嫌怨而糾論之矣若其事果是而或誤以爲非人果賢而或誤以爲不肖言官亦得據正議以執爭之不當賞而冒賞焉不當用而濫用焉言官既不避嫌怨以駁正之矣若其不當刑而或羅無辜之誣枉不當舍而或受讒口之擠排言官亦得持直道以申雪之凡此者天下之公議與

朝廷之賞罰相輔而行爭之而得則恩威黜陟一秉於大中至正無事不合乎人心天理之公卽爭

之而不得存一段明白正大之議論以告天下後世亦令君子有所恃而小人有所畏此古今所以重清議而善善惡惡之不可偏廢也漢臣辛慶忌免冠叩頭以白朱雲之直谷永輩抗章極論以明陳湯甘延壽之寃當世人主用其言能使忠臣昂首壯夫作氣宋之范仲淹以直言去國而歐陽修貽書高司諫責其不能申救至詆之爲不才諫官謂其猶能以面目見士大夫出入朝中是不知人間有羞恥事可見諫官之職無所不當言而天下

之事理亦非毛舉鶩擊之所能盡也今科道諸臣
率皆引市恩之嫌自糾劾官邪條陳利病而外凡
迹類市恩者一事不得開其口明知人之賢而不
敢言其賢明知事之是而不敢證其是明知人之
不當舍而不敢言其可留明知法之不當刑而不
敢指其非罪以爲任怨而不任德言官之職已盡
矣是天下之事昔所謂無不當言者而諸臣竟有
所不得言也豈

朝廷設立言官之初意哉且夫當雷霆之下而欲

以一語回天怒是之謂敢言犯權要之忌而特爲
孤踪持公道是之謂召怨方且置一身禍福於度
外亦何恩之可市乎故今日

皇上欲盡諸臣之言莫如大破市恩之禁但問所
言之當否而不必限以某事當言某事不當言使
在廷有偏枯不全之論但問立言之公私而不必
謂糾彈非私論救卽爲私使羣情有鬱抑不宣之
時如是則清議明國是定而舉錯賞罰咸翕然於
兼聽竝觀之中矣

請新庶政疏

伏讀

上諭云前此屢有引咎省躬詔諭自今追思皆屬
具文虛邀名譽於政事未有實益臣不禁拊心感
涕曰
君父之代臣子任過一至是哉夫

皇上憂勤惕厲敬

天愛民雖古帝王之兢業無以加矣乃

皇上事事出於實意而諸臣事事應以虛文

皇上念念欲求治安而諸臣念念只求塞責

皇上虛公無我無事不因時制宜而諸臣膠執因循無事不拘牽文法前此下詔求言章滿公車廷臣各抒所見其中豈無補偏救敝可少助時政之變通而部覆不曰已經奉

旨 在案則曰臣部見行事例卒未聞實見施行者幾何事虛心更正者幾何事但知了議覆之常套完科抄之限期苟且雷同全無裨益不思皇上之焦勞如此

上天之告戒如此小民之困瘁如此

國用之艱煩如此以至人才消長疆圉安危綱紀弛張賞罰當否幸際開創之景運身事

天縱之英主正當視

國如家逐事講求以佐立萬年久大之規模以長貽

聖子神孫之法守而循名責實卒無成效諸臣溺職之罪復何所逃卽如向來

恩詔凡內外文武職官因公誥誤者令各該衙門

奏明寬宥經年累月無一奏聞科臣朱紹鳳特疏
申明責其玩愒嗣是止在外一二小吏得邀寬典
而在內各衙門終無以一人應

詔者遷延推委相習成風

輦轂之下先東

詔書於高閣亦何以風示海隅耶夫上作而下不
應於以求太平之立奏其道無由臣請此番應
詔陳言凡部院各衙門及科道諸臣條奏事關大
利大害宜因宜革

皇上於披覽之頃卽賜裁決有益者立見施行無益者立爲報罷閣臣職司看詳亦必虛公參酌可行可止孰是孰非明白票擬上請

乾斷勿仍循習故套止以該部議奏四字盡絲綸之事業而令奉行者塗飾文具亦僅以再行申飭不必另議等語虛應故事徒增啟奏批答之煩也其或事理必當詳酌典制必須稽考須下廷臣會議及該部議覆者諸臣務殫心竭慮求歸至當法有未善勿憚更改以

皇上之克謹

天戒爲諸臣提聾醒聵之倡以

皇上之引咎責躬動諸臣洗心滌腸之懼君臣一德上下交修如此而猶不能挽回天變拯恤民窮躋盛治於三王之隆臣不信也

龔端毅公奏疏

男士稹孫

志爽續祖

曾孫

曾憲 曾憲 曾憲 曾憲

授梓

卷六 手草存遺

清理刑獄疏

昔東海一婦之寃而遂致三年不雨刑獄之與旱災其感召尤為切近

皇上如天好生明刑慎罰天下之人皆長育於泣

罪解網之中宜無一夫之或寃矣而無如奉行者
未能盡體

皇上之大仁遂不無召厲干和之事今約畧計之
曰不依本律之害曰濫刑之害曰懸坐之害曰淹
滯之害曰濫禁之害曰雷同之害曰屢駁之害曰
株連之害夫律設大法所以禁暴戢姦必輕重畫
然使人凜不敢犯乃可以整齊民志消其未萌張
釋之曰法者天子所與天下公共也今更重之是
法不信於民也近日問刑各官妄以己意窺測

天心往往於本律之外有加等從重之擬自謂刻
深可以盡執法之職矣不思罪本輕而執之使不
得重罪本重而執之使不得輕是之謂執法若本
係輕罪強坐重法此直故入耳何云執乎故曰不
依本律之害古之治獄者有五聽之法不專以敲
撲鍛鍊爲能也今中外問刑各官不論正犯過付
及證佐干連無辜被害之人所供稍不合原參一
槩夾打未成招而畢命者累累矣夫正犯與過付
之人猶可曰自作自受也卽有冤誣尙得借口曰

禍有所由取也若證佐受刑已屬難堪而被害之家無分紳士編氓俱令血肉淋漓宛轉號呼於桁楊之下是

朝廷之本意爲民除害而奉行者反以害民矣可不爲痛心乎故曰濫刑之害旣已無不用刑死者累累矣而仍不得實情則舉所自問之口供與子虛之贓款而一筆硬坐之曰事情重大不敢擅開也夫明知冤枉而徒以事情重大不敢擅開設令誣人以謀反叛逆亦將不辨虛實槩置極典乎語

云箠楚之下何求不得乃以箠楚求之而不得是亦不可稍爲動耶況雖不招承之一語豈可成鐵案而垂爰書宜近奉

欽駁者比比也故曰懸坐之害夫罪旣必歸於縣坐贓亦不必招承則當早問早結猶可以寬事外之人省久繫之苦乃每遇一事動輒經年累月觀望遲回狂狴之間闕然成市看守之供給胥吏之誑索其累夏不可勝言豈眞有所慎重於此而不輕成獄乎無非苟且延捱虛糜歲月耳故曰淹滯

之害臣猶記順治十年十一年間都人傳聞一時
刑獄號稱清簡繫禁者輒不至百人罪不至死者
悉令保候待結不輕收禁其時在事諸臣猶時時
親至獄中問眾犯之疾苦嚴獄卒之需擾察司審
之遲速以故案無久留之牘獄無妄繫之人近年
以來獄犯每多至數百不論罪輕罪重一槩收禁
且有無罪干連及名姓偶同混解混收者寒暑饑
飽之不時愁苦鬱蒸之相積有百死而無一生是
國法尙可矜全而囹圄先令瘼斃也故曰濫禁之

害刑名者專家之學必有過人之才而又
質不憚精勤不避禍患者乃能勝任近年
借口於兩議之處分草率依違止圖自保
人之性命身家矣卽間有兩議而又不敢
膽指陳事理之肯綮仍歸於草率依違之
足以副

宸衷之惻怛而持天下之平乎故曰雷同
之問刑者初參贓款盈萬盈千而審訊則
有此之是非不兩立其爲題駁宜也乃贓

主名推敲亦無餘蘊而該部徒以原參不符再三駁問究竟夾打拖累者仍是證佐千連無辜被害之人而已矣夫大貪大惡衆口難掩受其毒者豈肯更爲容隱必欲符合原參保無羅織抑勒之弊乎故曰屢駁之害籍沒流徙

國家之重典也

皇上間一行之以懲人心之積玩原非得已而奉行者過爲苛索有本無田土而籍及墳地者有本非應流之人數而混解到部者有奉

旨免流之子女回籍嫁娶而地方官勒詐多金始令成婚者親族波累無了無休究竟籍入尙方之金錢無幾也故曰株連之害伏乞

皇上勅下該部嗣後問刑議罪務期明允勿枉勿濫以簡以平更

特遣精明仁恕之大臣乘此修省之時亟行清理務使人慶更生將此八害急爲滌除而更特發

宸慈稍倣古昔刑不上大夫之義以明簾遠堂高之體以養羣臣廉恥之風庶刑措可以漸臻而天

人無不協應矣

再陳慎獄之要并指濫刑之弊疏

奉

上諭云云欽此臣等竊思刑獄者生人之大命而泣罪解網尤塵塵

宸慈敢不以目前之要且大者再陳之

朝廷設立三法司衙門雖同爲刑名之官而職掌各有分別刑部職在問擬都察院職在駁正大理寺職在平反會典所載事宜昭然可考向來重罪人犯奉

旨下三法司核擬者刑部抄錄原招移會院寺批發各道理事官御史及該寺評事等官看議詳悉呈送滿漢堂上官再加酌核或與刑部同議或另擬看語具奏蓋欲令三法司各舉其職互相參稽務求至當正所以昭耳目之公而杜枉縱之弊無貴乎彼此雷同也邇來凜奉

上諭法司公同面議杜稽延而歸畫一仰見

皇上明刑飭法之盛心但恐諸臣奉行者一切重大獄情悉取決於倉卒之頃全招旣已浩繁多案

又苦叢集未必一一細經心目周覽無遺而理事
御史評事等官獄牘全不與聞且并無効職之地
矣故近日法司本章兩議者甚少至有屢煩
皇上之駁問者豈諸臣果見其情真罪當不煩推
敲耶抑顧忌不言而姑扶同以塞責耶合無
勅下刑部查酌舊制凡遇奉

旨下法司核議者該部酌定看語并全招備細抄
錄移送院寺再加看議遵照議同的合出看語議
不同的各出看語之

明旨依限移回題覆不得遷延以滋弊端至於重大難決事情必須覆審者仍遵

上諭面議定奪如此則事體既獲精詳兼可辨別諸臣之能否而不至以苟且循默爲藏拙之地也近如刑部審擬江南科場一案事情重大宜何如詳慎乃該司不聞細心訊質以得真情輒將淮安府推官盧鑄鼎立刻斃之嚴刑之下使其真有情弊則當留活口供認務成鐵案以昭示爰書使其情弊未真先登鬼錄則冤慘尤甚我

皇上如天好生於已成之獄尙爲曲垂矜恤似此
罪案未明死者不可復生當亦

宸衷之所憫惻也伏乞

天語申嚴以後重大獄情問刑官務多方詳訊獄
成上請以待院寺之持平不得任意自恣止憑刑
拷草率了事庶積弊頓革而明允可期矣

讀書錄卷之二

清查考成疏

伏讀

上諭內云各部參罰官員初咨吏部盡開名數後陸續開復則零星咨送文選考功兩司書吏通同作奸某官打點既到卽註其某日已經開復打點未到者則仍註初參降罰不註開復上下其手交相朦蔽種種弊端摘發難盡欽此仰見

皇上離照當空無微不燭凡在官胥莫不悚然於神明之鑒矣顧吏胥之弊在內在外凡涉考成衙

門無不有之必當徹底清察使無遁奸乃可以明
考課而疏壅滯蓋有司一經參罰誰無功名之念
催徵完解必不肯延緩以自誤乃既完之後藩司
書吏打點不到未必遽爲申請開復卽申請矣巡
撫衙門又或以事係一州一縣未必卽爲具題待
其積日累月彙疏上

聞而有司之困守已深吏胥之指索業已不可窮
詰矣及疏旣下部該部吏書之弊又復如前或借
端駁查往返耽延不肯卽爲題覆或已經題覆置

之高閣不卽移會吏部在有司自謂錢糧已完俸薦已足而淹滯如故不得其解自守者徒抱積薪之嗟不肖者遂動營求之念此銓法之所以日壞而弊竇之所由日滋也臣謂當

皇上綜覈吏治清釐積弊之日正諸有司千載一時宜

勅下吏部通查俸冊凡見在註有參罰官須盡數開列某官因某部錢糧未完降罰停陞者卽移咨該部確查於何年月曾經該撫題請開復部於何

日具覆奉

旨會否移會吏部務責成該司官督率吏書逐一
詳細登答其有未經移會者卽爲補註明白咨回
銓部不得仍前朦溷以完作欠希圖打點自干重
法考功文選兩司再加查對應開除者卽於冊內
開除如此則考成之法明而羣吏不受已完之參
罰矣其在外巡撫藩司遇所屬有司已經完解應
爲開復者隨時詳請卽爲具題不得仍聽吏書沈
閣如或漫不經心一任延緩該巡按於磨對之日

據實參奏處分至各府推官有因

欽件贓罰等項未完冊註參罰者亦照此法通行
清察庶積弊可以頓破而銓法漸見流通也

疏通陞轉疏

近見吏部題爲請

旨事奉

旨關係各官員陞轉事情著議政王貝勒大臣九卿科道會同酌量勿令壅滯確議具奏欽此

皇上欲於漢軍漢人互用之中而講求不致壅滯之法意至善也臣以爲欲疏壅滯無如亟復漢軍漢人舊有之缺而後可以通融陞轉如六部舊有漢軍侍郎今皆缺而不補矣光祿太僕舊有漢正

卿各一員太僕鴻臚舊有漢少卿各二員太僕有漢少卿一員今多裁而不補矣尙寶漢卿丞三員太僕漢寺丞一員今亦裁而不補矣位置少則陞轉自難似宜通查漢軍漢人舊有之缺一切復之爲便又今日京堂壅滯者莫甚於五品而漢軍漢人品級亦自不同如通政司參議漢軍四品漢人五品日後何以較俸陞轉應將漢缺酌改爲從四品似當酌議畫一以免臨期請

旨之煩也至臣衙門事體原與六部相同今吏兵

考滿法司會議及叩

聞審理等項又數倍於往時乃各部俱有漢侍郎
二員臣衙門止有漢副都一員應否增設一員亦
當酌議畫一以免部院參差之迹也伏乞

勅下諸王貝勒大臣九卿科道一併確議施行

請設粥廠疏

臣見數年以來

皇上憫念京師貧民令戶部頒發銀米設廠煮粥
一時饑民存活甚多今年水澇之後穀貴民饑甚
於往歲若不設法救濟嗷嗷之衆束手坐斃當亦
聖心所惻然也查去年戶部題定以十一月初一
日爲始至明年三月十五日止每日每城發米二
石銀一兩爲煤炭之需聽臣衙門於五城地方選
委員役設廠煮粥今春御史高爾位王秉朝因二

麥未熟饑民日多疏請增賑一月復蒙

恩俞允合無今歲仍照舊例以十一月初一日爲始至明年四月十五日止令戶部措發銀米設廠煮粥臣衙門督率各巡城御史嚴禁員役不得侵剋怠緩虛應故事在

朝廷所費無多而數十萬之良民得以少延殘喘聖恩沾被真無涯矣

請恤秋決疏

臣等伏讀

上傳有明年

皇太后本命元辰普天同慶又念

端敬皇后彌留時諄諄以矜恤秋決遺言見在監候各犯合法司槩從減擬之

諭一時臣民額手歡呼謂堯舜之如天好生禹湯之泣罪解網不是過矣臣等因竊思在內在外皆屬

皇上之赤子則皆在

天慈覆冒之中況當普天同慶之時更宜合四海之歡心以祝萬年之

慈壽今各直省有罪人犯雖自罹法網而同此人命卽同此求生之情能無望我

皇上一視之仁以開自新之路伏乞

特賜宸裁應否於在外各犯併從寬減重申

天語令中外一體遵行庶萬方均被生成而矜恤無間遐邇矣臣等從推廣

皇仁起見不敢不畢其愚伏祈

采擇施行

巡方止息疏

巡方止息之議臣等已隨諸臣後畧陳其未便之槩而尙未暢其說也今蒙

皇上詢臣等以應停應留何者實爲有益且以事關重大令再行詳議臣等安敢無說而處於此請以十不可撤之故爲

皇上詳陳之督撫按互糾屢奉

嚴綸向來按臣奉行著有成效者如秦世禎之糾王國寶張中元之糾吳惟華程衡之糾耿焯皆能

發姦摘伏不避怨嫌而督撫敢糾按臣者卒未一見至如衛貞元之糾盧慎言則又將督撫互相蒙徇之積弊和盤托出使無按臣發覺不幾掩護到底而大貪終於漏網乎今若一槩議撤此後糾察督撫當屬何人糾察督撫所徇庇之人又當屬何人其不可撤者一也按參撫審撫參按審所以杜挾仇嚇詐之私雪捏款誣陷之寃正於彼此參互之中昭示公道若按差議撤而督臣又以專司兵馬不預刑名則是後撫參撫審一成不易司道府

廳皆其頤指氣使之人縱有偏私誰敢翻案況法
司凡大獄定罪之後每

勅巡按御史再行重審具奏蓋以其一身爲法官
按治人罪是其專職更與撫臣不同設無按臣今
後罪案定自撫臣之手者誰爲駁正其不可撤者
二也督撫所轄將領等官以及長隨聽用之輩其
不肖者旣護之如驕子而賢者亦未免以情緣習
熟多所寬假至如藩王以下各弁差狐假縱橫營
私剝民如近日按臣田一龍等所糾參種種不法

之狀督撫久在地方何竟無一言及之豈非互相顧惜互相容隱坐視民間之荼毒而各庇其私人乎若按臣一撤此輩益無所顧忌小民亦無所控訴矣其不可撤者三也舉劾屬員實吏治清濁民生休戚之大關所係最重向來按臣所舉撫臣得而劾之前按臣所舉後按臣得而劾之耳目衆多瑕瑜自不能掩若止是巡撫一年一舉劾則有司一薦之後卽屬知己縱有改節貪婪撫臣護短徇庇決不肯毅然指參而司道府廳之壓於撫臣者

又誰敢復開尙能明明與之立異乎吏治益壞民生益困必由於此其不可撤者四也撫臣封疆大吏其所控駐彈壓必兵馬要重之區與各屬有司相去闊遠卽有舉劾止據道府開報面目尙未周知安能盡辨其貪廉善惡今欲令舍本等之執掌一如按臣之單騎減從遍歷州縣采聽風謠詢問疾苦勢必不能卽使能之其車馬參隨迎送糜費勞擾必更數倍其不可撤者五也天下最害民者衙蠹也每聞按臣巡歷將至則相顧蝟息惟恐人

發其姦私而小民之吞聲受害者一經上官親身
體訪猶得以自言其情不甘心爲虎狼所殘匿若
按臣一撤則被害之民心且於千里數百里之外
裹糧赴訴於巡撫之庭恐冤痛未伸而跋涉之艱
阻抑之弊已不勝言矣衙蠹愈橫則百姓愈窮百
姓愈窮則盜賊愈熾其不可撤者六也今日所最
重者封疆功罪也督撫任戰守之責卽置身功罪
之中惟按臣身在事外且係朝廷耳目之官得以
明目張膽指陳是非若此差一撤今後地方或有

失事情形督撫利害一體必將扶同掩飾冀追吏議誰復肯以真見真聞爲

皇上別白言之者乎長欺蒙之風而隳綢繆之計其不可撤者七也今日所最切者軍興急需也各處錢糧侵冒撮借那混等弊督撫不及覺察而爲按差所查出者每年或至十數萬如馬騰陞衛貞元諸疏班班可考也向來巡方止息將鹽課歸併運司每年缺額甚多而旣差御史之後額課頓復充足蓋運司權輕旣不能彈壓督撫鎮下之私販

卽欲歸併巡撫而其將弁方因之以爲利又安能盡絕此弊乎其不可撤者八也夫輪差御史之後貪官誠未見止息民生誠未見蘇甦盜賊誠未見消弭地方誠未見安堵然而巡方之差前此亦旣屢撤矣貪官卽宜止息民生卽宜蘇甦盜賊卽宜消弭地方卽宜安堵而亦未見督撫之有成效也今以按差之無益而議裁倘督撫之敗類不絕於白簡亦將併督撫而裁之耶古今有治人無治法亦顧其利害多少何如耳其不可撤者九也順治

十一年五月內會議遣滿漢大臣巡察矣

皇上洞然遠覽停止不遣奉有奉差官員隨帶員役馬騾廩糧草料勢難缺少直省地方頻年水旱供億艱難未免擾累之

旨今若議於停差之後二三年另委能幹官員巡視果無如前之擾累乎且御史平日既有建白糾彈以練習於前復有回道考核以旌別於後尙未必人人稱職不知他日選差要用何官如其一撤不必復可以有利而無害則撤之可也如謂二三

年後復遣則撤者何爲朝更夕改使法守無所信從殊非

皇上永爲定制之意矣其不可撤者十也臣等以爲仍宜嚴飭巡方實課職業申風憲貪贓之典重曠官溺職之罰

皇上懸大賞大罰於上臣等務破情面不時糾舉於下修明法紀力行勸懲其或容隱曲徇考核不當首治臣等之罪庶吏治可望澄清而不徒貽因噎廢食之患矣

大計三年一舉疏

大計三年一舉所以甄別賢否綜核吏治典至嚴重今科臣朱 條陳各款均從慎愷大典起見其責令郡縣長吏來

朝原屬典制正倣古輯瑞述職之遺意但查本年五月內吏部題稱直省災荒之後盜賊未靖若令正官入

覲勢必委官代署不但地方料理無人抑且署官害民反爲地方之累相應仍照十年例止令藩臬

各一員各府佐一員代

覲俟後地方清寧遵照舊例舉行等因奉

旨在案今應仍俟地方平定再議舉行以復舊制
其無事之地藩臬府佐如規避代

覲臣等部院指名參處至各官賢否務要詢訪詳
確不得偏徇揭送致枉直混淆其見在正官務要
加意澄剔不得瞻顧情面止將去任及佐貳等官
塞責倘是非失實一併追論開送之人卓異一舉
寧嚴勿濫如係真正廉能實蹟可據者部院覆覈

請

旨錫宴賜衣仍參酌資俸方面擢陞京堂推知准
與考選以示優異貪酷異常者下法司依律追治
務使大姦伏罪人心震悚其無賴棍徒俠仇詐騙
臨時暗投私揭捏造款單槩行禁止違者聽五城
御史嚴拿究罪若夫端本澄源尤在禁絕餽遺力
杜囑託如貪猾不職之徒倚恃輿援營求打點希
圖漏網敢以片紙隻字擅入都門及託知交代爲
傳送者部院科道力行發覺請

旨拿問仍祈

天語嚴諭在外督撫按衙門預行禁飭在內巡城御史督率坊捕各官不時查緝如獲有前項卽行題參治罪預令苞苴盡革夙弊一清以仰副

皇上澄清吏治之意可也

紀綱詔令疏

抑

朝廷最重者紀綱而紀綱莫大於

詔令自

皇上親政以來

恩諭炳如日星奉行尙鮮實效如順治十年閏六月十七日因酌用寺人等衙門奉

上傳云所司者不過闡闡使令之役未嘗干預外事且止以滿洲近臣兼用乃未幾而取用各科副

理事等員後又取及司府等官在

皇上聰明英斷操縱得宜諸臣自無不凜凜奉法者但恐傳之四方必謂寺人之權漸重而事漸多與閹闖使令之

原論未盡合也如順治十年正月初四日下

詔求言內云進言切當者必加旌獎言之過戇者亦不譴責而其後相繼降謫如禮部郎中郭一鵬等甚且流徙盛京如詞臣李呈祥侍郎魏瑄等矣自古帝王未有不以納諫爲美拒諫爲非者導之

使言尙恐不言若以一語偶誤而議死議流恐非
盛世所宜有也伏願

皇上乾綱獨攬設誠力行由知人而安民以內修
爲外攘太平之盛日可睹矣臣等備員言責不敢
不竭其愚忠惟

睿鑒采察施行

--	--	--	--	--	--	--	--	--	--

敬陳管見疏

皇上憂勤圖治夙夜不遑訓飭臣工各修職業而孜孜以致治保邦爲急臣等竊思平天下之要領莫大於養兵愛民二者得其道而天下可幾平治矣顧兵食之不充率由於錢糧之侵欠以臣等所知如江南一省侵欠至二百餘萬各省節年漕糧拖欠三百餘萬防欠等銀厯欠二十餘萬罔寺馬價欠五十餘萬運司經管鹽課一年中欠六十餘萬各年贓罰欠五十餘萬江都一縣之侵徵至十

七萬真定一府侵徵蠲免錢糧又不下十餘萬皆載在章疏確有可據臣等所未及知者尙不知凡幾若立限清追以佐軍需以備養民而不致飽貪姦之腹此則目前養兵之急著也至若愛民莫先於除民害伏讀順治八年二月二十七日

上傳內云田野小民全賴田土養生今乃奪其耕耨之區斷其衣食之路民生何以得遂朕心大爲不忍乃聞投充之人自帶挈本身地外又任意私添或指鄰近之產以據爲己業或帶他人之田以

隱避差徭被佔之民既難控訴而

國賦亦爲虧減上下交困莫此爲甚亟宜

勅下戶部將投充之人照原投部檔通行查核除
應給之地外但有多佔地畝卽退還原主庶民間
稍甦苦累而賦稅亦增矣一伏讀順治八年三月
二十六日

上傳內云滿洲苦戰被獲人口豈可任意逃走一
經查出收留者又不得不坐以隱匿之罪朕心大
爲不忍近年以來因旗下逃人衆多立法不得不

嚴但必先有逃人而後有窩主卽如定盜案者必先正強盜之罪而始及於窩家然尙以得財不得財分別科斷未卽一槩論斬今逃人三次始處絞而窩主一次卽處斬又將鄰佑等人株連流徙似非法之平也臣等竊謂逃人如有窩主者逃人處死卽將窩主家產人口斷給逃人之主兩鄰甲長責懲該管官員罰治無窩主者仍鞭一百給主逃人自投歸主及窩主出首者俱照前例免議庶逃人少而無辜株連之民亦少矣一伏讀順治十一

年十二月十三日

上傳內云時方用人才不易得不忍以一言偶誤
遂致沈抑仰見

皇上容言納諫愛惜人才雖古帝王不是過矣除
科道處分諸臣已開列始末緣由吏部具奏外如
降調禮部郎中郭一鵬及流徙詞臣李呈祥侍郎
魏瑄等其罪雖分輕重要之皆由於進言似應
勅下吏部一體開列以候

鑒裁庶不虛宥過惜才之

盛典也臣等職居言路不敢不竭其愚忠惟

睿鑒採察施行

請接見大臣疏

臣等伏讀本月十九日

諭吏部都察院及科道官員各據見聞極言無隱
一切啟迪朕躬匡弼國政者所言果是卽與採用
如有未當必不加罪欽此昔

太宗文皇帝之諭凡所奏事是者卽允未當者不
加爾罪亦不合質對如見朕躬所行錯謬卽當面
諫因諫加責者何人斥逐者何人待有拒諫任爾
緘默今

皇上求言之心適相符矣臣等竊思

國家大務無如用人行政而君臣泰交尤爲用人
行政之源唐虞之世一堂喜起漢唐宋創業諸君
闢畧簡易君臣道合如家人之權皆以立致太平
我

太祖創業

太宗承統其興隆致治皆因日與內外大臣講求
政事之治亂國家之得失兵民之疾苦容言納諫
開忠讜之路塞姦佞之門所以上下情洽仰合

天意在上不致有災變之憂在下不致罹饑饉之困此泰交之明效大驗也我

皇上親政以來繼志述事勵精無逸嗣後表章時有寺人接進臣子不得進見臣衙門恐漸爲成例則君臣之間或致疎遠是於順治十年七月初四日有水旱災傷一疏冒昧言及奉

旨這所奏敬

天勤民昭德納諫說的是但朕因連日欠安未嘗接見大臣必不沿爲成例一時大小臣工人人歡

呼以爲得日近

天顏乃邇來

臨御尙疎召對未行雖諸臣一得之愚皆可上

聞然紙上之披陳終不若覲面之商確況滿臣瘖
樸未嫻章奏往往辭不達意有懷難喻伏願

皇上謹遵

太祖

太宗之規昭德圖治容納言臣不時召見內外大
臣講求敬

天愛民之道庶臣工之賢否兵民之艱苦可以悉知而臣下佐

主之德裨國之政亦可面達矣因是舉直錯枉人才可得

國事修舉賢者鼓勵不肖者自退德化及人災變漸弭太平不可立致乎如臣所言不謬懇乞
鑒照裁奪

龔端毅公奏疏

曾恕

曾憲

男士稚孫

志爽續祖

曾孫

曾懿曾憲

授梓

曾聰曾恕

卷七 手草存遺

預備人才疏

近見禮部等衙門題覆酌議變通之法等事奉有
這鄉試會試如照舊舉行何以不令壅滯如暫停
果否選授乏員著九卿科道會同詳議具奏之

旨仰見

皇上於疏通銓法之中復寓愛惜人才之意甚盛
心也臣備員會議自當隨九卿之後直陳所見仰
俟

上裁但事之源流恐非立談所能遽悉故先爲
皇上詳陳之蓋科目之設非獨用賢以資治理實
所以柔天下之心志束天下之人才使聰明智算
盡歸併於進取之一路而終其身無躍冶之思歷
代相沿立法原有深意我

世祖皇帝於江南平定之後卽增設丙戌鄉試丁亥會試兩科於滇黔平定之後卽增設己亥會試一科招徠鼓舞正得御世之機權非必缺一官始取一人有一人當亟畀一官也今吏禮二部會議候選進士舉人貢生等項約算五六年之間可以銓補完結至旗下官監廕生及吏員等雖未議及但除應選佐貳外約略其數亦自無多語曰十年之計樹木百年之計樹人從來人才祇憂不足豈患有餘及今儲之猶恐其晚况考滿之法屢奉

嚴旨著實舉行內外俸滿各官不論有無事故通行澄敘分別去留則銓法不患其不疏通而人才亦自不苦於壅滯矣臣以爲進士舉人貢生等項選取考授之法一切仍舊似於求賢圖治之典更覺大光伏乞

勅下九卿科道一併詳議施行

酌議考授科道疏

六部司官俸深優考者改授科道已經奉

旨遵行在案但遇一缺出止取一官臨時題缺請
旨開列引見事多煩擾臣等伏查

世祖皇帝每遇考選不論缺之多寡親行點閱常
選定科道一二十員候缺補用諸臣才品既悉入
收羅而於事體尤屬簡便今合無一倣此例於引
見之時酌其可用者選定候補則事不勞而法亦
可久矣

請急紓民困疏

竊思民爲邦本本固邦寧自古帝王輕徭薄賦總以軫恤民生爲急務今天下雖稱底定而江浙閩廣瀕海地方百姓遷移之苦屢經督撫奏報又今年八九月間各省霪雨爲災民間水患異常該督撫方在陸續奏報臣等因思此遷移及被災之民棲身無地餬口無資流離死亡朝不保夕本年應徵錢糧尙不可問之無食無居之日而况從前積欠一例追呼卽日叅有司終亦無濟乞

勅部通查遷移及被災地方節年舊欠錢糧立准
豁免有司亦暫免叅罰使得一意撫綏本年額賦
應蠲應緩刻期核覆勿徒往返駁查使民間不沾
實惠至各直省節年拖欠催徵不得錢糧特奉

上諭下諸王大臣會議行各督撫查覆併乞

勅部立查已到者先行會議未到者勒限嚴催其
耽延最甚者仍分別叅處庶於

國計民生不無裨益也

請嚴反坐疏

臣等竊見叩

闡疏狀接踵不絕中間情涉冤抑者固不乏而挾私讐訐借端逞肆者甚多以

禁陛森嚴之地咫尺

天顏尙敢於藐玩若此下而至於各衙門遠而至於各地方奸刁橫行目無三尺又可知矣近蒙皇上洞矚將誣告謀叛者多置重罪付之典刑人心無不悚服臣等竊思事後擬以重辟而所誣之

人身家已破性命已危矣曷若就其叩

闔訐告之時如情屬重大將原告發刑部看守一
面行該地方官立查所告虛實星速上

聞實則提審所告一千人犯按律正罪虛則徑以
反坐論治庶民間不擾而情法兩得也至誣告死
罪以下向來審虛多有以責四十板結案者立法
旣輕人亦何所畏憚臣等今議如告人窩逃不實
卽反坐以窩逃之罪告人流徙軍徒等罪不實卽
反坐以流徙軍徒等罪告人

赦前事卽實以其罪罪之若在外未經督撫在內
未經通政鼓狀衙門徑行叩

闈者卽人狀押發到部該部止照違例議罪所告
不與審理

勅下內外問刑衙門一體遵行旣足懲刁風而安
良善亦所以明法紀而尊

朝廷也

請立戶部審事官疏

戶部綜理天下錢穀職掌至爲煩重而又有八旗告理田土等事向來雖設有審事司官分理然滿漢堂官止此數人以理財而兼聽訟已苦於分應之難今四部錢糧總歸戶部其欸項之冗襍文冊之煩多較之往時更增數倍諸臣卽有精明練達之才而事之緩急重輕未免相溷合無查照兵部督捕事例另立戶部審事衙門設滿漢侍郎各一員滿漢理事官各一員將八旗審事司官屬其管

理專辨旗下詞訟事務庶案牘易清而財賦益有
專責矣

請重人命以培根本疏

臣到任以後見八旗男婦日報自盡者輒四五人
臣部惟循例差撥什庫驗看有無傷痕登記檔案
而已約計一月以來不止百餘人甚有一人之家
三命同時自縊者夫上天之生人不易卽八旗之
養人亦甚難乃今相率就斃雖愚冥輕生固其自
取而揆諸人情夫豈樂死而惡生哉觀死者如是
之多則其不甘遽死而逃者亦無怪乎接踵不絕
也伏讀順治十三年六月十二日

世祖皇帝勅諭各固山牛彖爾等當思家人逃遁必非無因果能平日周其衣食節其勞苦無在情困辱無非刑拷打彼且感恩効力豈有思逃之理爾能容彼之身彼自能體爾之心若專恃嚴法禁止全不體恤逃者仍衆何益之有朕爲萬國之主卽此犯法諸人誰非天生蒸民刑罰日繁戶口日減爾心亦何能自安今後務仰體朕意覺悟省改使奴僕充盈安享富貴豈不休哉欽此

天語諄諄固已告誡深切矣伏祈

皇上俯念人命之重上關天心

勅諭八旗都統以下不時勸戒本旗將各家僕婢
等人遵照

世祖皇帝諭旨恒加恩養體恤使皆知有生人之
樂不復爭趨死地更乞

皇上軫念八旗兵丁實

國家培養之根本乃効力彌勤資生無策彼且不
能自養安能養人今天下漸已太平師旅漸見休
息則減往來征調之行糧以增益窮丁撤空間可

省之坐防以加厚披甲一切久安長治之大計及時講求將見腹心既固元氣既充而八旗上下之間有不如指臂之相使者臣不信也

嚴濫禁以甦民命疏

竊思內外監禁之設原因所犯情罪重大恐有遁
逸始收繫以待結蓋其人自罹法網故問刑衙門
亦不得而寬縱也若罪不至死及無辜干連之人
槩行收禁饑寒疾疫迫於前獄卒牢頭虐於後囚
之瘐死者不少卽幸而得生已皮骨俱盡矣至於
情罪未明問刑官輒勒取病狀立置人於死尤爲
罔法之大者雖曾經嚴禁而此風恐仍未止臣等
請

勅內外問刑衙門凡審理人犯罪不至死及干連
證佐等人槩與保候聽結不得濫行收禁其夾棍
非本身犯有重罪證據已確而狡口不承者一槩
不得輕用各直省督撫仍不時稽查清理如有司
或有冤濫卽行叅處庶人命多所保全而泣罪解
網之風復見於今日矣

酌議入官人口疏

近例罪犯妻妾子女應沒入功臣之家爲奴者俱分發口外竊思罪人親屬事係緣坐其本身原無死法若槩置口外恐稟賦脆弱水土不宜多不能生且入旗窮丁覓一人口甚難今以有用之人而置之必死之地殊爲可惜臣等酌議今後各處解到入官人口

勅下該部賞給入旗披甲窮丁不必分發口外在旗下旣實得人口之用而

皇恩均被於兵民矣

敬陳愚慮仰祈 採擇疏

臣閱邸報見禮部覆廣督盧崇峻遵

諭陳言疏奉

旨無度牒爲僧道及男女聚會燒香者著該地方
官嚴行察拏若仍前怠玩不拏或科道糾叅或旁
人出首將地方官一併從重治罪餘依議欽此仰
見我

皇上訓世善俗杜漸防微之至意而臣竊有請者
向來水旱頻仍盜賊未息民爲饑寒所迫挺而走

險故犯法者衆耳釋道二教相沿日久其徒誠爲
過繁然可以收天下無告之民使之馴息於柔善
而化其不逞一旦勒令還俗僅存什一於千百此
等孤窮之人驟失故業棲止無地衣食無資老弱
必轉於溝壑少壯必散於四方計無復之何事不
有將來小刑刀鋸大刑甲兵或由於此傷

好生以貽餘患其不便者一也宇內寺觀不可勝
數其大者多在深山窮谷之間日則緇黃出入夜
則鐘鼓相聞綱紀統申其約束房頭各衛其藩籬

縱有深林密箐無所容匪類可疑之人若存留既少寺觀必致空虛盜賊眈眈能保其不爲藏奸之藪乎且商旅往來或倉卒不及鎮店而寺觀又復荒廢緩急失恃停泊何依其不便者又一也今朝廷政治事事在於安民乃無故驅數萬生靈使之鳥驚獸駭無地自容恐非

皇上萬物得所之心矣夫事之極重難返者可以潛消而不宜顯奪以臣愚見除男女聚會燒香等事違禁糜財自當嚴行察飭照律治罪外其各處

無度牒僧道令地方官查取該寺觀住持保結務
要確開來歷造冊呈報方許容住焚修如日後查
出來歷不明及奸盜詐僞借名竄匿卽將保結之
人并行連坐其自願還俗者不論有無度牒聽從
其便自今以後民間子弟務要恪遵定例不許無
故出家若不經由官司告給度牒而擅自披剃者
本人并寺觀住持照例治罪地方官不行查出一
併議處如此則僧道不汰自清不驅自滅旣可漸
返耕食鑿飲之常又不至有奉行張皇之擾此萬

全之策而積漸之效也臣素守孔孟之格言本非
爲此輩姑息但從

國家大政民生隱憂起見不禁鰓鰓過計又因律
令所載原有約飭僧道之法故密陳一得之愚伏
乞

勅部詳議事關係奏字稍逾格併祈
睿鑒施行

1. 2. 3. 4. 5. 6. 7. 8. 9. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100.

責成親民之官以弭盜安民疏

查得各直省設立綠旗官兵分布汎地原令其防禦盜賊以安民生邇來盜案繁多民無寧日蓋因管兵者不深悉民間之疾苦而親民之官又無一兵可用以故猝有緩急呼應不靈餉日費民日窮而盜賊公行全無忌憚也臣等查直省各巡撫原係封疆重臣節鉞一方非他文吏可比向來俱各設有標兵無事可以彈壓亂萌有事可以指麾剿捕自直省添設提督而巡撫遂罷管軍務俱歸各

總督節制今總督業經裁併地方遼濶豈能兼顧
似宜仍復巡撫標兵之舊制令之督率各道與舊
設鎮將等官照汛扼防該撫既與地方甚親而又
有兵可用臂指相使責任益專於以戢盜安民最
爲直捷簡便如此則提督一官亦可酌量緩急通
行裁併不特省一官少一官之費而兵民可以兩
安盜風不至日熾矣

請撤查海章京疏

查得山東江浙閩廣等省俱差有查海章京仰見
朝廷申嚴海禁慎固封守之意臣等竊思各省俱
設有督撫提鎮等官彼皆文武重臣各有地方之
責且違禁出海

法令最爲森嚴諸臣身任封疆豈俱一無足信當
此兵荒遷撤之後海濱居民失業者多差去各官
一切往來駐劄處所供應煩費不無累於地方似
宜槩行停止卽令回京仍飭各該督撫提鎮申嚴

海禁犯者照定例治罪亦可以省事安民也

請 旨疏

臣等於本年閏四月內會議天津鹽船由海邊行走緣由奉

旨依議這裝運鹽斤如有人船多於定數及鹽斤之外違禁夾帶貨物等弊將地方各官與所議各官一併從重治罪欽此查此案據該督撫及巡鹽御史會疏題稱據司道會查并無小河可通內地鹽船勢必由大沽河出入裝運鹽斤照順治十三年兵部題准每船令鹽院給以印票其船往來行

走令營將縣汛等官查驗放行等語臣等議覆應
令海防大沽營將稽查船到東省令海豐縣挂號
東省河口防汛官兵巡檢司查驗放行如無印票
并船內人數多出及鹽斤之外夾帶違禁貨物等
弊該管文武官不能查獲者俱照順治十八年所
定出境之例處分臣等原恐行鹽之時有多出人
數夾帶貨物等弊故有責成該管文武官不能查
獲照定例處分之議今奉有將所議各官一併從
重治罪之

旨臣等乃據疏議覆之官距該地方遼遠不能分身稽查此等弊端安能保其必無恐一時意見愚昧未能深思遠慮所議未當恭候

皇上處分事關海禁應行應止仍請

勅下九卿科道會同詳議具奏

省更調之煩以息兵安民疏

臣等見近日將軍沈永興發往廣東又撤將軍王國光自廣回京一往一來所需船隻動至數千人夫動至數萬不但經過地方百姓擾累而萬里跋涉兵卒亦苦疲勞今後八旗官兵分防各地方者其輪班更番之期似宜酌議減省如果與地方相安不必頻行撤換至一切內外兵馬除重大事情酌量遣發外其餘亦不必輕議更調下至綠旗官兵分防州縣及各汛地者既與居民習熟更不宜

無故調換徒增新舊一番接替而民間之廬舍器
用庶不銷磨於迎新送舊中也

酌議遠年叛案以安地方疏

康熙四年三月初五日以前各地方官承緝盜案俱援

赦免其停陞止令照案緝拿獲日治罪惟反叛各案雖在

赦前者仍不准案緝以至每一限滿卽取結一次奏報一番徒增文移題覆之煩究竟全無緝獲蓋遠年反叛之案或有數而無人或有名而無籍甚至原非正犯不過逆屬干連一經責緝便難消結

歲月既久難免死亡紙上空名憑何勾攝官民交
累無了無休似非法之善也臣等酌議除

赦後叛逆照常責緝及

赦前稱兵聚眾真正爲首者斷以五年爲準如不
獲題明另議外其餘凡在

赦前反叛各案俱比照強盜例槩免停陞止令照
案緝拿獲日治罪省煩文以甦擾累似亦便民之
一端也

酌更留任緝盜之法以安民生疏

查見行事例凡緝賊官員俱照錢糧未完例處分俟全獲之日方准開復如未題參之先陞轉者仍撤回原任照例處分緝賊仰見

皇上戢暴安良至意且不欲以前官之過貽累後人也惟是盜賊之逃竄死亡終難弋獲而地方之迎送絡繹未免紛煩新官纔到舊官又回一番撤留一番交代職守當爲之事貽誤必多安能復打起精神爲民間講遂生樂業之計甚且嚴比番役

誣報善良以竊爲強以甲代乙但顧一身脫卸安
問百姓傷殘至於後官履任方新旋復等候改補
銷磨歲月奔走道途揆之人情尤屬未便夫緝盜
本以安民而民之不安滋甚留任本以恤後官而
後官之苦累畧同此於吏治民生實有關係故向
來星變求言各督撫連章具奏皆請更定此例無
非從地方起見今臣等酌議凡失事各案承緝接
緝之官但照定例處分其陞任之後復起有盜案
者亦只照離任官例處分若承緝限滿賊未全獲

者原非本人在內之事量准照案緝拿免其停陞
將見行留任撤回之法一槩停止庶新舊之官不
致交累而民生亦獲安矣

THE UNIVERSITY OF CHICAGO

省查點之虛文以恤兵安民疏

先經戶部題定直省各處兵馬每年差官查點兩次蓋以稽核虛冒汰除老弱使有實餉實兵在立法之意未始不善而無如奉行者視爲故事每次查點僅以汰過老弱清出缺額多者數十名少者十餘名及倒斃馬數匹開報塞責部議亦不過令其速行募補以充營伍究竟於清核兵餉之事毫無補益今各處督提並設俱有統兵之責每年各查點兩次則是一年四次矣差官一到有打點

之陋例有迎送之煩文有人馬供應之浮費且將
各路汛兵一時撤回守候查點地方防禦單虛盜
賊乘機竊發鄉村雞犬爲之不寧及至領餉之時
又將此等煩費逐一扣除餉安得不匱兵安得不
窮兵旣窮矣民安得不騷擾無利有害莫此爲甚
臣等酌議今後督提每年兩次差官查點槩行停
止只須責令該營將弁不時自爲稽核如有虛冒
隱佔等弊訪實立行題叅盡法追究其於恤兵安
民不無小補矣

遵 諭陳言酌復道標以弭盜患疏

今緝盜之法亦既嚴切而盜風日熾民不安生在
有司營弁非不知各有緝捕之責然文武既已分
途兵民情不聯屬甚且營兵爲盜莫可誰何蓋由
地方遼濶無人彈壓之故耳舊制直省要害之地
必分設有道員每道必各設有標兵文武相維犬
牙相制有司營弁皆屬提衡無事則坐鎮一方有
警則督率剿捕以是兵不敢爲盜且能弭盜以衛
民今天下道員旣裁遽難槩復合無

勅下各該督撫確查該省荒殘險要奸宄易生之處量設道臣一二員各領舊額標兵聯絡防衛以助督撫提鎮之不及似亦禦患安民之急務也

遵 諭陳言請立旗下買人之法以杜假冒
以嚴逼勒疏

竊惟投充久已禁止而冤頑不逞之徒或犯法避
罪或借勢害人往往思托旗下爲護身之符亦有
愚懦無知被人誘哄借銀滾利或將本身或並妻
子家口準折或買主徑自寫契送官用印自占入
己者名爲買人實陰行其投充悖

旨殃民莫此爲甚皆由印票無定憑故爲民患未
已耳臣愚以爲情願賣身之人必先親立願狀於

本籍縣官取有印結并地鄰甘結委無犯法避罪
引誘逼勒等情年貌姓名歲月身價若干並賣與
某旗某牛彖佐領名下內則申詳本城御史外則
申詳巡撫入冊行該衙門上稅如無巡撫及本縣
印結地鄰甘結者以假冒窩隱論如此則兇頑既
無倚庇而愚懦亦免於強食矣

遵 諭陳言疏

竊惟沈香降真香用以祀神享

祖不得不採買於地方近因海禁甚嚴其初民間猶有存者數年以來搜買已盡誠恐有司上畏功令不免嚴比行戶擾累小民今

皇上德威遠播海外諸國方接踵向風而至臣等以爲宜將降真諸香暫停買解以待貢舶之來其所進斤數自可充

內府之需亦甦息民困之一端也

錢法疏

錢法之設上以流通

國寶下以順從民便不過以無用之銅化作有用之銀卽爲利

國利民原不爭乎爐座之增減錢息之多寡也查各省停鑄已久近議開鑄而雲南貴州湖南廣西各撫臣疏請照舊暫停部議未允雖從

國計起見但恐各地方運銅募工難易不一開局造器勞費實多更恐局廣錢壅價值愈賤勉強給

發兵餉驛遞等項有名無實甚或有派發行戶苦累小民者亦未可定請

勅部再行酌議將各撫所請停鑄者暫行停止其有便於民者一也又在內給錢等項除各官公費及爐匠工料可給者仍給外惟披甲窮兵每年定例有給銀二十四兩者十二兩者此

祖宗以來養恤甲兵德意今於其中改給以錢是窮兵外有一兩之名而止得八錢之實也窮兵妻子何以贍養似宜停其給錢照舊給銀以恤窮丁

而重根本其有便於兵者又一也仰祈

睿鑒施行

遵 諭陳言欲安小民之生莫先禁報逃之
害謹抒一得以備採擇疏

竊惟逃人令甲森嚴獲逃有不次之陞失察有褫
革之例以是有司兢兢奉法歲獲逃人不可數計
而無益有害莫過於報信一說京城光棍結夥阡
人散布黨羽於衝要劇邑窺有殷實愚懦之家則
暗遞線索於在內光棍架說某處有逃人報某旗
主旗主急欲得人登時報部及行提到日家已先
傾鄉愚畏刑任憑索詐索詐既遂輒行改口良民

非肌殘桎梏則命斃囹圄逃人究屬烏有而業已
橐飽豺虎血化冤燐矣近

畿齊豫此害尤甚以致家家自危人人惴恐求民
生之安胡可得耶臣愚以爲地方果有逃人則當
先報府縣審不以實則報撫院撫院審實而後解
部果係逃人府縣容隱則以失察之罪罪之如此
庶奸民無所售其術而良民得稍安寢食以保室
家婦子矣如果臣言不謬伏乞

勅部議覆施行

遵 諭陳言培養士氣以定安民之本疏

竊惟

朝廷設立學校以文行課諸士誠以士爲四民之首今日之逢掖卽他日爲我輔治安民之良佐故時殿最以覈其實學優餼廩以養其廉隅期之甚殷故待之不薄意至善也近年以來裁革廩糧停止歲貢入學之數旣減歲考之舉不行以致有司衙門不待申詳提學除名竟爾恣行鞭撲諸生困賤無聊志趣日就卑陋昔之矯志雲霄者今且羨

商賈之一飽而不得實可哀憐

皇上英明天縱重道崇儒今歲特舉

臨雍大典諸生成瞻雲望日聞講頌於園橋眞曠
代之一時也業遭逢三王之盛世卽應沐

洪恩誠復順治五年則例大學進四十名中學二
十五名小學十二名再復歲考以勵行誼復廩給
以助膏火復歲貢以酬其白首窮經之志禁有司
鞭撲以隆其媵修不辱之身如此則長育培漑日
茂月深士習漸淳士風自振

皇上開萬世無疆之休則必先百年樹人之計所謂安民之本莫切於此矣

THE UNIVERSITY OF CHICAGO

11

遵 諭陳言禁侈靡以節民財辨等威以定

民志疏

竊惟聖王之世風俗淳樸禮奢寧儉大本攸存蓋
藏富於民金湯由之鞏固首善旣飭四海從而向
風非偶然也臣備員春卿職司典禮近見京城士
民狃於治安之久情志易偷不問家產有無競崇
侈靡鞍劍之飾動用金銀珠玉衣裘之費或至十
金百金徧開酒肆白晝演戲遊惰徵逐成羣金錢
盡教浪擲奢華不衷自成僭越以此良賤無分官

民莫辨非所以尊

朝廷而明軌物也伏乞

皇上嚴行各城御史凡演戲鬧會盡行禁止而男女服飾盡照部頒品式如有不遵從重治罪於厚民生而端

聖化未必無小補也如果臣言不謬伏乞
勅部議覆施行

龔端毅公奏疏

男士稚孫

志爽續祖

曾孫

曾憲曾懿曾憲

授梓

曾聰曾愨

卷八 手草存遺

遵議敦孝弟以重人倫疏

該臣等議得倫紀肇修首先孝弟故論語以孝弟為為仁之本邇來人心囂凌孝弟道衰良由風厲不先訓迪無術孔子曰吾志在春秋行在孝經今

欲興起教化應請

勅下直省學臣督率各州縣有司教官於朔望日
齊集生儒耆民擇選文行兼優生員敷講孝經一
章務使詳明易曉查

世祖皇帝特命詞臣纂修孝經衍義一書未見頒
行今應將此書頒行直隸及各省布政司鑄板通
行俾曉然知我

朝敦尙孝弟之至意其八旗佐領下亦應刊刻滿
漢孝經通行照直省例本佐領內選擇文行兼優

者每朔望日令佐領下人等齊集數講至於孝子
順孫例應旌表載在會典邇歲以來題請者甚寡
應

勅下八旗直隸各省所屬果有孝子順孫查明報
部核實題請旌表不得因窮鄉僻壤孤貧無力致
壅

上聞亦不得濫舉苟且充數又查漢文帝元年詔
曰歲首不時使人存問長老又無布帛酒肉之賜
何將以佐天下子孫孝養其親當時年八十九十

以上者賜米酒肉帛絮有差明洪武時屢詔有司存問高年賜耆老爵及酒米縣帛等項今舊典旣廢人不知勸仍宜酌倣其例令滿漢該管官查其所屬士民年八十以上給米八月五斗肉五斤九十以上加帛人一匹絮二斤以昭

盛世尊老尙齒之典再查會典開載三品以上堂官父母病故者照例給與祭葬

世祖皇帝時行之已久後於十八年忽奉停給之旨竊思人臣辛苦服官上則報効

朝廷下則光顯父母若止優異其身而不恤其父母與

皇上孝治天下之意謂何應

勅下臣部查酌往例凡三品以上堂官父母病故者照伊子應得之祭予祭一壇不必給與葬銀滿漢一體通行亦推廣孝治之一端俟

命下臣部通行八旗各直省可也

遵議篤宗族以昭雍睦疏

該臣等議得尊祖始知敬宗敬宗乃能睦族周禮以嘉禮親萬民以飲食禮親兄弟宗族使之親親尊祖敬宗睦族法至善也自大宗不可復後之儒者思復小宗以存王道於什一故程頤曰管攝天下人心睦宗族厚風俗使人不忘本須是立宗子法今雖不能驟復古制然繼禰小宗之法尙可做行除原有宗子地方應益加修明力敦族誼外其八旗及窮鄉下戶一姓之中必有族長冠婚則告

喪祭則赴歲時燕享禮讓相先仍於每月朔望躬率子弟講求雍睦之道有平日躍治不聽教訓者聽族長糾舉治以家法與不弟者同罰其能馴行孝謹動遵禮法者族長率合族人舉於該管官量行獎異至於近日人心澆漓風俗頽敝姪訐其叔弟告其兄骨肉相殘倫理漸滅尤爲世道之憂相應嚴行禁戢如仍有此等不遵申誠以卑幼訐告尊長者卽質審得實亦必律以干名犯義之罪如果能睦族尙義若宋范仲淹之立家廟置義田以

贍宗黨之貧乏及壽張張公藝等族累世同居者
旗下該管官報部民間州縣官報督撫題請旌表
其間以爲敦本睦族之勸至邇來不論同鄉隔省
凡屬同姓便行通譜使本支紊亂親疎莫辨尤宜
槩行嚴禁以挽頽風俟

命下臣部之日通行八旗各直省遵行可也

Handwritten text in a vertical column on the right side of the page, possibly a title or header.

遵議和鄉黨以息爭訟疏

該臣等議得獄訟繁興皆由於長吏督率乖方一鄉一聚無所視以爲表正故民不知教而輕犯法按周官五家設比長二十五家設里宰等制漢鄉有三老亭有亭長掌勸導鄉里明初設老人以鄉約六條宣木鐸曉諭并得從此出身仕進今應酌倣漢明舊制責成八旗都統副都統令該管官亦使鄉里立爲甲長專主勸息爭訟化導頑梗不更責以期會之事應刊刻

上諭十六條於朔望日宣誨兵民該管官若能教訓所屬和睦都統副都統核實報部酌量獎勸賞資其直隸各省除見在保甲長外另擇素行端方居家孝弟年五十以上者每三保設立鄉正一人專主勸息爭訟化導頑梗亦不更責以勾攝期會之事仍刊刻

上諭十六條每月朔望宣誨小民州縣官察其一鄉中如有爭訟稀少卽爲上考申送督撫核實題請給以九品頂帶榮身免其雜款征徭一鄉之中

爭訟繁多州縣卽治以罪革去另舉如一鄉之中
有孝子順孫義夫節婦及力行善事有功德於一
方表表著聞者許申報地方官核實奏請旌敘鄉
正另加優賞仍請

勅下督撫申嚴州縣官慎選鄉正勿得以匪人濫
充一面勤加督率歲終甄別賢否如此則民知歸
善去惡敦睦鄉里禮讓興而訟獄自當衰息矣

Handwritten text in a vertical column on the right side of the page, possibly a title or header, written in a non-Latin script.

遵議重農桑以足衣食疏

該臣等議得農桑爲王政之本三代盛時無不以勸農爲首務

皇上嚴禁火耗軫恤災傷蠲租發賑休養生息愛民之德意無不惻怛周詳矣然天下戶口逋逃田畝荒蕪不治者尙多皆因有司奉行不力賦役煩苛雜項飛差層見疊出以致小民失業耕種維艱今宜

勅下各直省督撫嚴飭各府州縣務仰體

皇上輕徭薄賦之意問民疾苦力與蠲除凡非時之徵繁興之役及獄訟牽連勾攝拘禁等事失農時而妨農務者一切停罷與民休息其上司衙門差官差役槩不得催提絡繹騷擾地方俾小民得竝力南畝庶下有樂生之心而上得盡其勸課之實也查明洪武初令天下有田者皆栽桑麻木棉等項有司親臨督視當時各州縣於四鄉之中設立勸農亭長吏親行勸勵以故農事聿興今應勅各督撫責成所屬有司仍復勸農亭舊制每遇

農時躬循阡陌勸課農桑單騎減從毋滋擾累其
田野墾闢桑麻繁盛者註以上考如野多荒蕪民
多遊手使邑里蕭條者照才力不及處分該督撫
司道亦以此爲殿最務使確實舉行不得虛應故
事其八旗令該都統轉行各佐領農桑之時佐領
差撥什庫勤加勸導至於天子親耕籍田厯代相
承所以慎重民事

世祖皇帝曾經修舉今應於仲春之月臣部擇吉
恭請舉行

朝廷既知稼穡之艱難小民爭效終歲之勤動矣

遵議尙節儉以惜財用疏

該臣等議得國家財用儉則日生侈則日絀昔漢文帝惜露臺百金之費唐太宗罷洛陽一殿之營海外化之衣無錦繡公私富洽今屋宇服飾宴會婚喪等項久已頌有定制康熙九年五月內臣部題覆臺臣徐旭齡爲天下之財力已竭等事又經通行在案應再嚴行申飭內外一體遵行違者許臣部查參以違制定罪更願

皇上躬行節儉爲天下先凡可以省財息民者時

雷

睿念天下臣民未有不觀感而化者矣

遵議隆學校以端士習疏

該臣等議得學校之不隆由於勸懲之無方而士習之不端由於師儒之失職故欲端士習當重師儒欲明勸懲當先鑒別近來天下教官自愛者固不乏人而衰庸之輩未免因循苟且溺於流俗諸生旣無嚴憚之心安能教學相長今應行直省學臣將各學教官與諸生一例考核年力衰邁文行情窳者開冊報部勒令休致倘訓迪得法勸課有效卽登薦剡以備國學之選庶賢否勤惰不淆而

諸生有所興起此重師儒之法也至諸生優劣近
多開報失真以致薰蕕無別必嚴飭學臣詳加查
訪教官據實申報其優者務遴品行不得但取資
緣劣者務鋤巨憝不得僅錄細過如開報不實致
令劣衿漏網貽害地方別有發覺卽治教官以朦
徇之罪仍查照舊例三年之中生童科考歲考各
行一次嚴其課程則士無遊惰時其考校則人有
戒心至於歲時訓督宜有規條在京國學宜倣明
洪武時積分之法聽該監試照原定條例奏請舉

行果有學術通明人才超越者不妨特拔其尤量與優用在外鄉學宜倣胡瑗教湖州之法用經義治事二項以儲真才并習讀

欽頒卧碑以勵品行此端士習之法也再查各學廩生原有廩膳銀兩所以優待貧士使之讀書後以兵餉不足盡裁充餉今海內承平正興起文治之時應

勅下戶部確議仍復廩膳銀兩以充貧寒士子燈火之資庶衣食足而禮義可興也又查八旗每佐

領下止准子弟二名入官學分習滿漢書習弓馬時仍習弓馬皆因限定額數以致佐領下閒散子弟不學文義妄行甚多今滿洲蒙古漢軍不必限定額數凡可讀書俊秀子弟准入官學讀書如有不堪讀書子弟聽教習撥回佐領如此則學習文義并弓馬俱不致廢弛矣至滿洲蒙古漢軍今俱以漢文考試習滿文者不得應試恐有學問者從此廢棄查

太宗皇帝時滿洲蒙古漢軍准其考試曾經取中

生員舉人

世祖皇帝時順治八年以後將滿洲蒙古漢軍藩鎮各王等王下子弟曾經取中生員舉人進士順治十四年奉

上諭考試生員并取中舉人進士槩行停止候太平之日仍復舉行欽遵在案今應照此例將滿洲蒙古准其作滿洲蒙古文考試其漢軍藩鎮各王等王下子弟亦照順治八年例應試所取額數查例另行具奏其願作漢文考試者仍照見行例可

UNIVERSITY OF TORONTO LIBRARY

也

[REDACTED]

道讀六經語孟之書講濂洛關閩之學不得駕虛
翼僞表異亂眞以爲惑世誣民之漸督學不時稽
察生徒有違禁約卽指參黜革至白蓮無爲等邪
教聚會結黨千百爲羣煽惑愚民招搖城市

功令非不嚴禁而有司視爲具文漫不詰察仍宜
通行八旗并直隸各省督撫責成地方官曉諭稽
查赦其前愆務令改行從善庶左道不致惑人而
愚民知所趨避又查明洪武年間定制民間二十
以上者不許爲僧凡僧道不許奔走於外交構有

司以書冊稱爲題疏強求人財及私創庵堂等語
今應并行申禁至於地方中果有修明正學文行
兼優之士該督撫體訪得實酌與薦舉以備六館
師儒之選如此則道術明而學術正人心咸丕變
矣俟

命下臣部之日通行直省督撫遵行可也

遵議講律法以儆愚頑疏

該臣等議得爲治以德教爲先輔治則法律爲重與其齊之於犯法之後孰若儆之於未犯之先本朝律令業經刊定成書頒行直省但官吏雖在奉行而士民猶未講讀若邊海越界及窩逃等罪國憲首嚴愚民無知不曉三尺以致自罹法網情實可矜查周官州長黨正各率其民讀法糾戒明制里社百家以年長者讀律令今應責成府州縣官修復鄉約所擇地方年高有德者每月朔望將

律例講讀曉諭務使愚頑咸知遵守州縣官屆期
親臨身爲勸化實力舉行毋以虛文塞責至於八
旗亦應頒行律例責成各該佐領講讀曉諭則人
知儆戒而刑措可幾矣

遵議明禮讓以厚風俗疏

該臣等議得朝廷莫如爵以明分之有尊卑鄉黨莫如齒以明序之有長幼近來官民混雜全無讓途讓畔之風風俗何由而厚今應

勅下各衙門職官務服本等品服並用應有執事及馬帶踢胸使官民有別卑者讓尊則賤者不敢凌貴至於途次相遇儀注已經順治九年頒有定制相應申飭內外一體遵行違者許臣部查參治罪至有職官員百姓自當起敬乃有無賴之徒每

遇輿馬往來咆哮嬉罵體統全隳積習囂凌何由
復講禮讓嗣後內城責成巡街步兵外城責成總
甲遇有此等卽挈送該城御史治罪如係幼童責
治家長務使

輦轂之下觀聽肅清其官員致仕養病者原與見
任官同近來每被劣衿侮辱奸民訐告衙役乘機
肆行凌慢殊失

朝廷優待臣子之意相應一體嚴禁以息澆風至
鄉黨序齒原以教讓查明洪武初詳定鄉飲酒禮

條式行直省府州縣每歲孟春孟冬有司與學官率士大夫之年老者行於學校其民間里社以百家爲一會每季行之於里中是時風俗猶爲近古自鄉飲酒禮有司視爲具文而民間里社之法尤久廢不行以致觀感無由民不知勸今應於孟春孟冬之月責成該地方官將鄉飲酒禮恪實舉行務選年高有德鄉里推服之人以爲賓介不得苟且充數或借端索餽反致賢者畏避

盛典不光仍於春秋祭祀之時地方官勸導各鄉

修復里會令鄉正董其事飲酒講禮務從儉樸申
明

朝廷之風教敦序長幼之後先將見和氣洽於比
閭而風俗漸臻醇厚矣俟

命下臣部通行各直省遵行可也

遵議務本業以定民志疏

該臣等議得士農工商謂之四民皆有本業乃四民之外復有遊手遊食之人若不設法禁治則本業無由而興查周制凡民有害於州里者謂之罷民加以桎梏又使民之無職事者出夫家之征故卽明舊制令里長戶下空閒人丁與甲首戶下人丁一體當差目今遊民甚多其弊有三一曰衙門冗役衙役定有經制近來各衙門或一役出名其名下有貼寫替役幫差白役等人一遇官差朋比

肆惡又有一種求批執照充上司聽用官承差名色不在衙門伺候公然謁拜有司躲避差徭魚肉鄉黨所在多有宜嚴行直隸各省悉加澄汰一日軍營投用近今各處駐防鎮守各弁濫收奴婢多畜優伶或放債準折或恃勢強霸姦民避役者又轉相依附富者冒充營伍貧者假作餘丁使

朝廷辦納錢糧之赤子皆成離家失業之人民志不定莫此爲甚宜嚴行各駐防鎮守及地方大吏有司等官永行禁止一日倡優招誘遊惰之人專

事浮薄吹彈歌唱自銜爲能因而有力之家爭養梨園彼此炫耀日異月新或優伶自行投靠或本家出銀雇買如一班有十餘人其遊手幫閒多至幾倍又於通衢鬧市開張戲館招集多人歛錢生事煽惑愚民致失生理因而爭鬪繁興訟獄不息且民間習於嬉戲奢費無已以致閭閻日貧民生困悴宜在內責成八旗五城御史在外責成督撫提鎮嚴行禁止如有違犯將爲首教演者治罪如此則小民不得不各務本業而趨向自一矣俟

命下臣部通行八旗各直省遵行可也

遵議訓子弟以禁非爲疏

該臣等議得父兄之教不先則子弟之率不謹近有少年無知遊蕩非爲皆緣教訓無方以致囂凌成習查明制洪武年間詔有司每鄉每里俱立社學擇立師範明設教條以教民間子弟正統間令各處提學官及司府州縣官嚴督社學不許廢弛弘治年間建立社學民間十五以下者送入讀書講習冠婚喪祭之禮近見八旗下該管官雖將法令傳諭兵民因無族長未能教訓子弟恣肆妄行

漸成匪類嗣後該管官將佐領下選各族賢能者立爲族長教訓各族子弟明理讀書如兵民不服所設族長教訓報明該都統責治其家長姓名卽送都統註冊至於各處州縣雖存有社學名色俱已鞠爲茂草及今宜

勅下所在官員力行修復責成儒學教官尙理其事將家貧不能讀書子弟擇師教訓講習經書使其通曉禮義仍令教官不時考校遇學道考試選其俊秀者申送與考則人思上進不致閒遊放蕩

而非爲不作矣俟

命下臣部通行八旗各直省遵行可也

UNIVERSITY OF CALIFORNIA LIBRARY

遵議息誣告以全良善疏

該臣等議得誣告之條律嚴反坐典制昭然凡有以不赦之罪誣人者遇赦不原立法不爲不重然姦民往往藉以陷害良善禁之不止其弊有二一曰主唆之人兩造相爭其初不難和解有等姦惡好事之徒陰爲謀主小則誑騙酒食大則圖詐錢財將己身平昔仇隙之人填入詞狀之內及兩造紛爭傾家破產已則超然事外以爲得計一日代書之人各衙門頒有狀式而小民不識文義有等

代書人慣住衙門左右崗一包寫呈狀希圖誣准
受謝以小爲大以無爲有愚民任其簸弄及至原
詞審虛罪坐告人代書者不復根究尤爲良善之
害今應責成內外問刑衙門遇有詞訟審虛者務
窮究有無教唆之人體訪得實嚴坐以罪勿使漏
網併

勅下各省督撫轉行按察司及道府州縣將素行
無玷者考取代書聽用遇有呈狀註明某人代書
如告詞涉誣卽坐代書與誣告同罪則虛詞自息

矣至近年業將叩

闈禁止而

聖駕出郊猶然衝突儀仗叫喊不已詞內牽告多人一經發審悉屬

欽犯在外問刑之官卽審明無干因未題結不敢輕釋每至無辜拖累嗣後在

御前喊告鳴冤者應令該部分別事情重輕應准不應准具題不得一槩行該督撫問理至於主僕名分攸關近有一等兇悍奴僕輒捏款告主尤於

名義有乖應行嚴禁違者卽所告得實亦照律治以應得之罪其民間越訴及私刻款單揭帖屢有明禁今日久廢弛相應再行申飭則所以全良善者多矣俟

命下臣部之日通行八旗各直省遵行可也

遵議誠窩逃以免株連疏

該臣等議得逃人事例雖無典制可稽業經督捕衙門屢次題定民間窩逃者有流徙之條官員失察者有革職降級之例其法不爲不嚴矣而窩逃之弊猶未盡除者非小民故爲犯法該管官安心失察也查旗下逃牌向來止遞督捕衙門存案未經移會直省巡撫則逃人之姓名年貌籍貫外官無從預知或逃人潛自回籍或日久往來鄰近娶妻生子及經旁人舉首到部始行文該撫勒取失

察職名與窩家兩鄰而株連已多人矣今應於逃
人某姓某名係何籍貫住居於某年月日入旗年
若干歲面貌身材逐一註定督捕卽照依檔內所
開係某處人行文該撫知會轉行府州縣官榜示
通衢不必限以時日務期緝獲爲主則旗下一有
逃人其姓名年貌籍貫在外官民人等無不悉知
誰敢容留至誠窩之法莫若力行保甲在外府州
縣不分城市鄉村點定保長甲長書門牌稽查出
入有外來人到本處地方卽將來歷註明小票報

該管印官以便稽察則窩藏者益知相誠而株連
自少矣俟

命下臣部通行八旗各直省遵行可也

1914 1915 1916 1917 1918 1919 1920 1921 1922 1923 1924 1925 1926 1927 1928 1929 1930 1931 1932 1933 1934 1935 1936 1937 1938 1939 1940 1941 1942 1943 1944 1945 1946 1947 1948 1949 1950 1951 1952 1953 1954 1955 1956 1957 1958 1959 1960 1961 1962 1963 1964 1965 1966 1967 1968 1969 1970 1971 1972 1973 1974 1975 1976 1977 1978 1979 1980 1981 1982 1983 1984 1985 1986 1987 1988 1989 1990 1991 1992 1993 1994 1995 1996 1997 1998 1999 2000 2001 2002 2003 2004 2005 2006 2007 2008 2009 2010 2011 2012 2013 2014 2015 2016 2017 2018 2019 2020 2021 2022 2023 2024 2025 2026 2027 2028 2029 2030 2031 2032 2033 2034 2035 2036 2037 2038 2039 2040 2041 2042 2043 2044 2045 2046 2047 2048 2049 2050 2051 2052 2053 2054 2055 2056 2057 2058 2059 2060 2061 2062 2063 2064 2065 2066 2067 2068 2069 2070 2071 2072 2073 2074 2075 2076 2077 2078 2079 2080 2081 2082 2083 2084 2085 2086 2087 2088 2089 2090 2091 2092 2093 2094 2095 2096 2097 2098 2099 2100

遵議完錢糧以省催科疏

該臣等議得兩稅之法自唐迄今定制按時徵比民力易完催科之中仍寓撫字之意近來有司畏避考成惟知催比間遇殘虐之人嚴刑夾打如鞫盜賊皆緣兵餉難緩以致良法不行今天下承平兵餉充足應

勅戶部定議實行兩稅之法夏稅定於五月開徵秋稅定於九月開徵蓋五月蠶事方畢折色易於取辦九月農事甫完本色見在收成故人自樂輸

錢糧易足至於催征之時宜清造赤厯按圖按甲必用日收簿簿內開某社某甲共應納條銀若干某花戶名下應納條銀若干納過銀數照串票卽註名下州縣用印鈐蓋該府按季稽考不得聽衙役改少爲多移甲就乙換完爲欠以無爲有中有頑戶摘出提比如此則錢糧無朦混那移之弊而小民易於輸納矣間有稍稍有力自能完納所欠無多一經責比之時經承阜隸各有使費按版計銀所費之銀反過於所欠之數小民鬻妻賣子止

供虎役之吸血吮脂敲撲日煩錢糧日減此刑責之最宜體恤者也今後有司務宜定期按里設法徵收止將頑戶責比毋得濫加夾打或有小民好義急公先期完足量加獎勸則錢糧易完而催科自省矣俟

命下臣部通行戶部直隸各省遵行可也

THE UNIVERSITY OF CHICAGO

遵議聯保甲以弭盜賊疏

該臣等議得弭盜之方莫良於聯保甲然從來奉行不善止於虛應故事不過十家一牌書寫姓名官府過往懸之門首官過卽止今宜實行聯保甲法如十家一牌開載居民姓名家口人數生理務須填實其有遷移來去死亡增添按月開明不許遺漏有司官親自按冊稽查不得借端差役下鄉苛索細民致滋騷擾而於保甲之中尤當嚴禁賭博稽查流民以及遊食之僧道異方之乞丐俱當

卽時驅逐不得容隱以防盜賊潛迹貽害地方如
近京地方旗下莊屯與民雜處責令屯撥什庫會
同地方有司編爲保甲各省防守兵丁及移駐投
誠等衆皆係與民雜居責令該管將領會同有司
編爲保甲使處處有連絡之勢彼此有稽查之責
不分滿漢不別兵民一體通行庶乎可久若旗下
莊屯及駐防兵丁不雜民居者令其自爲保甲如
此則盜賊無容足之地地方有安堵之形倘有盜
賊發覺查係某處某保甲人卽治某保長以容隱

之罪旗下撥什庫及地方文武該管官以疏忽處
分其本地方自能捕獲及先行出首者免罪俟
命下臣部通行八旗直隸各省可也

AMERICAN UNIVERSITY

遵議解讐忿以重身命疏

該臣等議得閭閻細民好勇鬪狠豈皆不共之仇多爲一朝之忿平時酗酒恣肆三五成羣及至小事相爭羣來助惡多有此等鬪毆至死而不悔者除焚表歆血結拜兄弟嚴行禁止外查得周制設有調人一官專掌諧和萬民之難今宜畧倣其意在內責成步兵噶喇大五城兵馬司督率步兵總甲在外責成捕官鄉約如有棍徒酗酒成羣鬪毆在某地方不行勸解阻擋者除本身應得之罪外

總甲鄉約量加懲處仍請

勅下州縣有司遇民間詞訟必委曲勸諭務息紛
爭不得濫有准理致小民展轉仇隙另生事端俟
命下臣部通行八旗直省遵行可也

龔端毅公奏疏

男士稚孫

志爽續祖

曾孫

會憲會憲會憲

授梓

會憲會憲會憲

附卷

衰病殘軀不能供職謹補牘陳情乞恩允放

啟

職於本月十四日隨同官向玉軒諸臣後具有官職既行裁省等事一啟自列罪狀乞

賜放斥本月十九日奉

令旨朝廷寤寐賢才經綸上理量裁欠缺非爲汰
人况今朝列尙虛何得遽行甄別至於前朝敝習
每以門戶爲職掌以恩仇爲功罪朱徽兩經議處
龔鼎孳問擬城旦事屬既往著各以原官供職矢
讜抒忠盡心圖報該部知道敬此伏念職待罪先
朝備員言路行能本無足取而尙口適自危其身
議論百無一長而狂愚若天奪其魄玷諫垣者十
月積罪戾以多端焚草惕心久宜罷黜會以參論

故輔陳演庇貪誤國一疏冒昧無當

先帝下之於理幸荷曠恩待以不死俾得列名城
且嘗爲廢人職亦自分秉耒歸田無意人間事矣
東裝甫就流寇陷城夾拷慘毒骨脛折斷闔門投
井爲居民救甦裹痛扶傷逃命山谷恭逢

殿下義旗迅指醜類宵奔一時臣民欣離湯火當
先帝發喪之日職亦忍死隨諸父老後匍匐入城
感激

隆恩報名

廷謝於報單內卽註有建言革職四字蓋亦自明
其身爲棄物擯絕班行矣嗣是抱病逡巡半依牀
褥越鳥顧翼不能奮飛雖心已若死灰而形未離
京輦清夜循省腸爲九迴然竊自意猖狂庸妄之
人決無洗濯瑕玼之理輒披肝膈乞放餘生今蒙
殿下諭以原官供職且責以盡心圖報苟可力鞭
其駑蹇何敢自外於

甄陶然而下愚不移自知已審性誠慙劣命復奇
窮一年之間九死備歷再塵仕版必致僨轅旣不

能追縲紲於前朝又安能效忠讜於今日頁

先帝教戒玉成之德昧人臣進禮退義之閑徒積
詬譏奚裨塵露此所由低徊往事而益凜乎其疚
心也又職原籍廬肥介在江北前年五月獻賊破
城職父職母僅以身免今且雲迷子舍何處庭幃
淚染溫裾竝疎魚鴈夢餘心動每如急火蒸騰以
斧摧肝難名斯痛怔忡昏眩體攢百疴註籍杜門
惟以藥爐送日神理頓失曠廢滋深本因父母而
偷生反以憂思而速死烏私耿耿實自悲憐伏見

殿下寬仁愛士旁求賢雋一時彈冠振羽者接踵
國門如職之輩所謂車載斗量僅同鳧鷖旣負夙
戾兼懷至情卽使矢報於環珠業已自迷其方寸
用是不避頻瑣再懇

恩慈伏乞

俯軫愚誠

特賜罷斥俾得息黥補劓養病全身卽目前道路
未通願且爲近郊布衣以歌詠太平少安愚分倘
從此有菽水承歡之望寧忍忘

生成錫類之仁職鼎鼐可勝激切待

命之至奉

令旨龔鼎鼐旣奉旨盡心圖報何得復以私情陳
請著速出供職該部知道

THE UNIVERSITY OF MICHIGAN



漈陳哀苦至情懇乞代題回籍守制以伸子
情以廣孝治呈

職於本年二月二十五日聞丁母憂卽於是日具
呈本監堂臺乞爲代題回籍守制蒙移咨吏部具
題本月初十日奉

旨龔鼎孳著在任守制欽此職聞命自

天惶悚無地犬馬尙知報主職雖微眇寧無依戀
君父之忱但痛念職夙遭閔凶幼而失恃職母王
氏育職於孩穉無知之時顧復拊摩恩勤備至每

佐職父課子誦讀以慈母而兼嚴師職賴教養深
恩幸獲成立迨職父奄忽見背距今十有五年爇
熒孀居艱辛備歷職浮沈宦路莫遂烏私瞻望庭
幃寸心如割湯藥未嘗於生前舍殮未親於身後
揆諸子道已無地可以自容若竝不得徒跣奔喪
憑棺灑血盡報本之微誠守三年之定制拊心自
問非惟無以對職母亦實無以對職父矣

皇上化理維新方以孝治天下職一官令散無關
重輕班行中去職一人不爲少而子情獲展則職

之受賜實多伏乞堂臺特賜代題

恩允回籍守制職從此不卽填溝壑馳驅犬馬報國之日尙長也因奉在任守制之

旨職係本監屬員不敢違例徑奏相應一并呈明本監堂批守制自屬至情但已經奉

旨未便代題仍遵

旨任守制可也

漶陳哀苦至情懇乞天恩俯允回籍守制以
伸子情以廣孝治疏

臣鼎孳至愚極陋荷

先皇帝知遇誓竭涓埃奉職無能自干譴謫銜

恩悔過頂踵難酬恭逢我

皇上盛治維新普天瞻戴正思隨分盡職少補愆
尤不意臣罪孽深重於本年二月二十五日痛聞
母喪當經吏部具題奉

旨龔鼎孳著在任守制欽此臣聞命自

天悚惶無地犬馬尙知報主臣非木石寧無依戀
君父之忱但念臣幼遭閔凶行年十四母楊見背
顛連疾苦貌無依恃臣母王氏歸於臣父鞠育拊
摩恩踰已出拮据膏火課臣誦讀雖當貧瘁口不
言勞臣賴教養深慈幸獲成立迨臣父棄養十有
五年熒熒孀居艱辛備歷臣又浮沈宦路溫清闕
疎每望庭幃寸心如割今一旦溘焉長逝遺慟終
天湯藥未待於生前舍殮不親於初沒揆之子道
已無地可以自容若竝不得徒跣奔喪憑棺擗踊

盡報本之微誠守居廬之定制清夜循省何以爲
心非特不可對臣母竝不可以對臣父矣我

皇上方以孝治天下海隅臣庶喁喁向風烏烏私
情必蒙

矜惻伏乞

天恩仍准臣回籍終制從此不卽填溝壑馳驅自
効報

國之日尙長也臣閒署小臣分不當徑瀆

天聽因奉

旨後卽以至情具呈堂上官未允代奏只得昧死
自鳴竝乞

睿慈鑒宥臣不勝悚息待

命之至

本投通政司蒙傳喚賫本僕人面諭云已經吏
部具題奉

旨著在任守制此本不便封進仍令帶回止留
副本存案

遵例呈乞代題給假葬親呈

職於順治十八年二月二十五日痛聞職母王氏
在籍病故蒙部臺據例具題奉有龔鼎孳著在任
守制之

旨欽此職以至情迫切當卽具呈國子監堂乞代
題回籍復具本投通政司俱未蒙允行茹痛含悲
籲

天無路凜遵

成命在任守制已經一年矣今職母安葬屆期負

士經營實非他人可代之事晝夜徬徨五內崩裂
烏烏私情萬難自己伏讀順治十八年八月十八
日

上諭有云父母之喪天下通義治喪守制人子至
情又云在內各官尙得躬親治喪在外各官不得
回家躬親送終之禮揆諸子情殊爲未慊仰見
皇上孝治天下體恤臣子無不周至職送終之禮
已虧營葬之期復迫雖身爲小臣不敢妄援戶部
尙書王弘祚在任守制復准假歸葬之

特恩而情事適與相同且京官五年遷葬原係見
行定例職自順治十年父喪服闋歷任京邸已踰
十年比照給事中王命岳御史朱紱等給假葬親
事例實相符合取具同鄉鑾儀衛經歷司經歷徐
元文印結伏祈俯賜代題准職回籍葬親事畢卽
依限前來候補供職庶子情稍展於萬一而
天恩均被於歿存矣

吏部題爲遵例呈乞代題給假葬親事據國子
監助教今在任守制龔鼎孳呈前事云
云等因

具呈到部該臣等察得國子監助教龔鼎孳於
順治十八年二月內報丁母憂臣部具題回籍
守制奉有龔鼎孳著在任守制之

旨 在案今本官復以在任守制已經一年母葬
屆期負土經營萬難自己援戶部尙書王弘祚
例請假又云京官五年遷葬係見行定例職歷
任京邸已踰十年比照給事中王命岳御史朱
紱等給假葬親例前來查戶部尙書王弘祚係
在任守制後奉

旨准假歸葬今龔鼎孳所請及葬親年分雖俱
與例相符但其在任守制係奉

特旨不便給假葬親相應不准行可也奉

聖旨依議

親喪久停未葬子情迫切難伸再瀝哀鳴懇
祈代題給假呈

職叨蒙

特恩宥過錄用起補原職復

簡任今官供事將及三年陳力實無寸效正當忘
身報

國何敢求便私圖但有萬不容已之至情不得不
披瀝於

君父者竊念職母王氏於順治十八年正月二十

五日在籍病故蒙吏部准職回籍守制奉有龔鼎
擎著在任守制之

旨康熙元年三月內職援例請假葬親吏部具題
仍令在任守制奉有依議之

旨職凜遵

成命勉抑哀情又四年於茲矣今服制久滿官爵
屢遷而職母喪柩尙停寢室蹉跎歲月安葬無期
爲此寢食不寧方寸如割伏思

皇上方以孝治天下職身爲人子旣不能奔喪於

前又不克營葬於後昧養生送死之道冒忘親戀位之譏且五刑之罪莫大於不孝若不能律已安能律人即使醜顏服官終有虧於

聖化查定例京官在任五年准給假遷葬職自順治十四年奉

差回京已歷九年卽比引遷葬事例亦相符合懇乞洞察前後懃陳至情竝非假托查照戶部尙書王弘祚終假歸葬近例俯准代題咨職回籍葬親事竣卽星馳前來候補誓竭頂踵仰答

天恩爲此取具同鄉京官北城兵馬司指揮汪琬
印結激切具呈

吏部題爲親喪久停未葬子情迫切難伸再瀝
哀鳴懇祈代題給假事准刑部尙書龔鼎孳呈

前事內開

云

云

等因到部該臣等查得龔鼎孳

前任國子監助教於順治十八年二月內報丁
母憂臣部具題回籍守制奉有龔鼎孳著在任
守制之

旨 在案後龔鼎孳於康熙元年三月內因在任

守制已經一年援戶部尙書王弘祚例具呈請
假葬親前來查戶部尙書王弘祚係在任守制
後奉

旨准給歸葬龔鼎孳所請及葬親年分雖俱與
例相符但其在任守制係奉

特旨不便給假葬親相應不准行等因具題奉
旨依議在案今龔鼎孳復以母柩尙停寢室奉
差回京已歷九年事例亦相符合呈請給假安
葬前來但尙書龔鼎孳前以在任守制曾奉

特旨今所呈不便遽准可也奉

聖旨龔鼎孳除往來行路日期准假三箇月安葬
事完之日速來照舊辨事

臣父勞瘁殞身微臣援例哀籲仰懇天恩俯
賜優卹以光泉壤疏

原任禮部尙書降一級留任

予告後已故臣龔鼎孳長男候

選正六品京職廕生臣龔士稹

臣父鼎孳自順治元年蒙

世祖章皇帝錄用由科員洊厯今職服官三十年
仰荷

生成殊恩異數夙夜兢兢積勞成瘁舊春病勢難

支具疏請告奉

旨慰留感戴

皇仁深厚勉出供職於五月二十九日在署陡發眩暈一病瀕危復邀

聖慈遣官遣醫

君恩愈渥鏤刻愈深終是病體漸增精神日耗卽如誤折紅本一案適因入侍

經筵舊疾忽發卧榻恍惚未及詳察日供參差部議分別降調蒙

恩銷去所加一級仍降一級留任今春會試大典
復蒙

簡用主試

聖恩浩蕩勉圖報稱今秋病篤始敢乞休奉

旨卿才品優長効力年久簡任秩宗正資料理覽
奏患病情詞懇切准解任回籍調理病痊起用仍
著馳驛去該部知道欽此臣父捧讀

綸音感激涕零正擬銜

命就道而夙疾轉劇自知不起口授遺疏於九月

十二日具奏上

聞奉

旨覽卿奏病勢危篤朕心深爲軫念這本內事情知道了該部知道不意臣父卽於具奏之日身故聖眷溫綸痛臣父已不及見矣臣父易簀時猶握臣手惓惓以

大恩未報死有餘慚一語不及家事身沒之後舍歿無資戚友賻助咸爲心惻一生茹蘗飲冰知必爲

宸衷所矜念者伏思大臣病故例有

卹典格外優異又出

特恩如臣鄉原任吏部尙書王永吉以降五級調用後疾終京邸蒙

世祖章皇帝復其原級恩禮屢加臣草土餘生冒死哀鳴叩乞

天慈鑒念先臣勞瘁殞身

曠恩優卹俾勞臣得叨身後之榮臣闔門老幼鏤心刻骨世世頂戴

音三十三
鴻施臣父九原之下更銜結

皇仁於無旣矣臣父病故尙在京邸無原籍督撫代題之例臣隨於九月十二日具呈吏禮二部未蒙准收又具呈北城兵馬司轉報吏部亦未蒙代題臣謹援例奏

聞緣係泣陳下悃字稍逾額仰希

鑒宥奉

聖旨龔鼎孳才品優長効力年久遽爾奄逝深軫朕懷其銷去并所降之級著與復還應得卹典察

例從優議奏該部知道

跋

門人華亭張守撰

人生大節莫重於師師以義合而所以作合之故未始不係乎人王子之役守計偕北上兄宸請假在籍曰當今海內具瞻負人倫之鑒者莫如大宗伯龔公愛才禮士汲引後進無倦色郵弟之詩文以執經門下我知其必有合也守入都時

聖眷仍倚公典南官試各自引嫌撤棘後始得日依函丈沐夫子之教甚悉常謂守曰自見子文章

言論已知爲端人正士然一時之得失命也平日
之砥礪性也命不易性子必勉之臨去慰誨再三
執手曰行矣我亦且歸耳守聞言感泣銘之心至
今不忘也不意南旋未久遽接訃音唯有中心負
疚今幸量移金斗與仲圭叙世好甚篤因得讀吾
夫子立朝諸疏稿志在

君父憂深民社要皆大經大法之所存有善必陳
無弊不晰皆足以勒丹書而垂金鑑雖史冊所書
未有能及者今去夫子數十年而其言炳若金石

使國家長治久安百世猶被其賜而況臣黎也哉
況其子孫也哉授梓之始命守校訂前旣親炙於
面命之時今復私淑於遺編之內人不及料者誠
若有天焉以主之是夫子裁成夫守者正未有艾
而仁人之澤由國以及天下先溯本於家繩繩振
振而克昌厥後天耶人耶有與世共信者耶伏惟
師門諄切不揣固陋援筆以紀後之覽者或能畧
其文而存其意焉是猶藉夫子以不朽也已

跋

後學武進楊通佺撰

古來章疏之最著有補於當時而可法於後世者在漢有賈太傅治安策在唐有陸宣公奏議雖所遇之主或賢與否所言之事或行與否後人未嘗不爲兩公惜而兩公之言則固千古不磨者也余到淝陽龔子仲圭以其先端毅公奏疏付較余焚香浣手三復卒業不覺掩卷而歎端毅公忠君愛國之誠勤勤懇懇溢於紙上垂於後世可法可傳

比之賈陸兩公亦何多讓尤可羨者所值之時遠
邁漢唐遭逢

聖天子明良一德吁咈都俞不減二代則我端毅
公之遇主更出於兩公之上而爲千載一時也通
佺以草茆賤士韋布寒儒其於掖垣補袞之才何
敢置喙但高山景仰竊有慕焉因贅數語附於卷
尾云